



ইন্দ্রকুমার সিংহর
গল্প সংগ্রহ





ইন্ডুকুমাৰ সিংহৰ গল্প সংগ্ৰহ



Internet of People

সৃষ্টিকোণ
amarmanu
foundation

তৰুণোদয় পথ, বেকিৰপাৰ-৭৮৮১২৩, শিলচৰ, অসম

INDRA KUMAR SINHOR GOLPO SONGROHO

A collection of short stories written by Indra Kumar Sinha in
Bishnupriya Manipuri

Published by Sristikon, Amarmanu Foundaion, Tarunodoy Road,
Bekirpar-788123, Silchar, Assam

© Indra Kumar Sinha

* পইলা প্রকাশ

২৩ জুন, ২০১৬ ইং

প্রকাশনাৎ

সুনন্দা সিংহ

সৃষ্টিকোণ

আমার মানু ফাউন্ডেশন

তবুগোদয় পথ, বেকিরপার-৭৮৮১২৩, শিলচর, অসম

মেয়েকর সাজেলে

সঞ্জয় সিংহ, সৃষ্টিকোণ, গৌহাটি

ছাপানিৎ

টাইকল ষ্টাইল ট্ৰেক, তেজপুৰ

মলাটর সাজেলে


শঙ্কুকুমার সিংহ

মূল্য

বৃপা ১০০ হান

ISBN : 978-93-84388-09-6

উৎসর্গ



যে গিরকগর সাহিত্য প্রতিভা বার সাধনা বিষ্ণুপ্রিয়া
মণিপুরী বার বাংলা সাহিত্যে ইঙাল ঙালকরেছে,
হাবির সুপরিচিত কবি, সাহিত্যিক, নাট্যকার, গল্পকার
শ্রীব্রজেন্দ্রকুমার সিংহর থাম্পালসাপা দ্বিয় আতে লেরিক
এহান কাৎকরলু।

শ্রী ইন্দ্রকুমার সিংহ

ইন্দ্রকুমার সিংহর গল্প সংগ্রহ

লেখকর দ্বি-আক কথা	V
ইন্দ্রকথা	VIII
সতী	১
ছবি	১০
আরি	১৯
আবিষ্কার	২৭
রাজার গাং বারো মাদৈ গাং	৩৪
যে প্রশ্নর জুরাব নেই	৩৮
কোট	৪২
ম্যাজিক ছাতি	৪৬
পোস্ট অফিস	৪৯
খুৎতল	৫৬
দলা চিঠি	৬২
দ্বাপরর গদা থেংনাপা কলির গদা	৬৮
ইমা	৭০
হুনার অরিঙী	৭৩
খামতলর হজকারি	৭৮
পরিশোধ	৮২

লেখকর দ্বি-আক কথা

সাহিত্যর জগৎ এহান আচানকর জগৎ আহান। আশি বছর বয়স লালয়া যৌবনর হারৌপা সময়র নিজর ইকরা য়ারি এতা পাকরলে আচানকর অনুভূতি আহান সৃষ্টি অর। ঔ অনুভূতি উহান কথালাে মাতিয়া তৃপ্তি নার। এরে ঘটনা এহান প্রত্যক্ষ নিজরাং ঘটিল আর এহানর বিষয়ে খানি আহান মনর কথা প্রকাশ করানিৎ বাধ্য অইলু। আগে সাহিত্য এহানরে অন্তরগলো বানা পাছিলাং। ঔ কারণে ইকরা ইকরি করতে বাধ্য অছিলাং। কিন্তুমান সমাজে সাহিত্যিক বুলিয়া মানুরাং পরিচিত অনা এহান নাউ খালকরেছিলাং। কালচক্রে এবাকা সাহিত্য সাধনা এহান জীবনর পরম জিজ্ঞাসার পথ আগ বুলিয়া ঔ পথেই ইলয়া চলেছি।

বিষ্ণুপ্রিয়া মণিপুরী সমাজ এহান সংখ্যাও যাৎ, রাজ্যও নেই, রাজনীতিতৌ নেই, ধন পইসাও কম। এরে অবস্থাৎ আমার ভাষালো সাহিত্য সৃষ্টি করিয়া পৃথিবীর আর আর জাতরাং আপন সন্তা এহান ফৌকরে দেনার সালেদে দাপা আহান লাভ ক্ষতির চিন্তা নাকরিয়া ইমে ইকরতে আছি— ইকরতে আছি। এহান অইলতাই সাহিত্যর ক্রিয়াহান। গুণীবান মানুরে মাতে গেছিগা 'সাহিত্যই সাহিত্যর উদ্দেশ্য।' ফুল এগ কিয়া শাতর, মহাশূণ্যে ধূমকেতু এতা কিয়া দাবদের? এহানর উদ্দেশ্য বাখ্যা করানির উপায় নেই। কিন্তুমান কামান, বন্দুক, গাড়ী হংকরলে উতার উদ্দেশ্য মাতে পারিয়ার।

পৃথিবী এহানর মহাসত্যহান অইলতাই— জরম অইতে মানু এতা আত এহানি মুষ্টিবন্ধ করিয়া জরম অইতারা। বার মরানির থাংনাৎ আতহানি মুকেয়া থইতারা। এহানরে রাশিয়ার লেখক লিও টলস্টয় গিরকে 'How Much Land Does a Man Need (মানু আগরতা কতিহান মাটি লাগের)' য়ারি এহান ইকরিয়া পৃথিবীর বুকগৎ ফিরাল আহান ফরদুরা দিল। ঔ কারণে সাহিত্যর ক্রিয়া এতা লেখকর মাধ্যমে সাহিত্যর প্রয়োজনে সৃষ্টি অয়া য়ারগা। জন মিল্টন শেষ বয়সে অন্ধ অয়াও পৃথিবী বিখ্যাত 'পেরাডাইস লস্ট' ইকরিয়া গেলগা। অন্ধ অবস্থাৎ ইকরতে তার নিঙল ঔতাই কিসাদে পরিশ্রম করেছিলা, উতা খালকরলে জ্ঞানির কথা। সাহিত্য সৃষ্টি অনির পিছেদে এতার রস পিনার সালেদে পাঠক দাপা আহান ভ্রমরার সাদে নিকুলতারা। এহানও প্রকৃতির ঘটনা আহান। থাম্পাল

এগ শাতইলে দূর-দূরান্তত পুরি মধুকর আয়া মধু পিতারা। কিন্তুমান থাম্পালর
পাতাৎ বয়া হাজার হাজার কেরবং মধুর উৎসগ হারনাপেয়া ইমে বয়াই
থাইতারা। এসাদে রসিক আকতা বেরসিক আকতা সমাজে থাইতারা। বিষ্ণুপ্রিয়া
মণিপুরী জাতীয় সাহিত্যর উদ্দেশ্যহান অইলতাই— আমার হুরকাং সমাজ এহানর
গতি প্রকৃতি, ভাব, আচরণ বার সাহিত্য পৃথিবীর আর আর মানুরাং পরিচয় করে
দেনা। তানুর লগে আমার ভাবর বিনিময় অনা, তানু আমারে হারপানি বার
চিনানি, আমিও তানুরে হারপানি বার চিনানি।

বহুদিন আগে রাশিয়ার লেখক আগর ইকরা য়ারি আহান এবাকাও নিংশিং
অইলে আচানক লাগের। য়ারিহানতে সাধারণ গরার গাড়ি চালার মানু আগর
হুদিয়ৌপা তাপিতুর য়ারিহান। তার জিলক আগ আছিলি। ঔ জিলক ঔগ খাংতা
মরানির থাংনাং তার সীমাহীন তাপিতুর কথা কুনোগরাং পুরা করে মাতে
নুরারল। থাংনাং ঘরে আয়া তার গরা উগরে ঠালি আগং হবা করে দানা দিয়া
খৌআনি অকরল। হাতে হাতে তা গরা ঔগরাং তার জিলকর য়ারি উতা মাতে
নেরগা। গরা উগই হুনে হুনে তারে চেয়া চেয়া দানা ঔতা চিবার। তা মাতের—
তা মাতের। কী আচানক দৃশ্য, ঔ জ্বালার কথা ঔতা পৃথিবীর সমগ্র মানুর হুদিং
জাকরন আহান দিতে বাধ্য। এহানেই সাহিত্যর ব্যাপ্তিহান। কালিদাসর মেঘদূতে
যক্ষই মেঘরাং তার বিরহ ব্যাখ্যা করেছিল। ঠিক ঔসাদে গরার গাড়ি আলা উগ
গরাগর মাধ্যমে তার আবেগ ব্যক্ত করেছিল।

সাহিত্যর জগৎ এহান এসাদে নানান কুটিল ঘটনার মাধ্যম আহান। মোর ইকরা
য়্যারি এতা হৌ আগেকার দিনর মানুর ছবি। ভারতর স্বাধীনতার আগে হুরকাং
অছিল্যাং ঔবাকার মানুর য়ারি। ঔবাকা গাঙে প্রায় হাবি শনর ঘর আছিল। বের
হাবি ইকররতা। বেয়াপাই হুতা ধুনলা, ফুতি বুনলা। মুনিয়ে খেতি করলা, মাছ
ধরলা। প্রকৃতি সম্পদলো বুজেছিল। চাকুরি নাকরলা। কলাকৃষ্টিলো সময়
কাপলা। এবাকা ঔ চরিত্র হাবিরে বিসারেয়া পানা চিলছে। ঔ মানু ঔতা সমাজে
আর নাও আহিতাই। তানু সাহিত্যর হাকহানাং তেরার সাদানে রাতি চক্চক্
করতাই। পিছেকার পাঠক ঔতাই তানুরে চিনানির হন্না করতাই। তানুরে
নিংশিং অয়া আরাকৌ সাহিত্য ইকরতাই। এসাদে করিয়া সাহিত্য সমাজর
পাঠকরাং জিংতা অয়া থাইতাই।

মোর ছোটগল্প এতা আকদিন লেরিকহান অয়া নিকুলতই এহান মি কুনোদিনও কল্পনা নাকরেছিল। কিন্তুমান আজি হুৎতুমেও উহান শাতয়া উঠিল। এহানও সাহিত্যর আরাক অদৃশ্য শক্তি আহান। মহামুনি ব্যাসদেব 'ব্রহ্মসূত্র' লেরিক এহান রচনা করানির থাংনাৎ প্রায় চারি হাজার বছরর গজে লুণ্ড অয়া আছিল। উতার থাংনাৎ গৌড়পাদ বুলিয়া গিরক আগই এহানর অর্থ হারপেয়া আছিল। কিন্তুমান, শংকরাচার্য জরম অনির মূল তাৎপর্যহান আছিলতাই এ ব্রহ্মসূত্রর কঠিন ব্যাখ্যা প্রচার করানি। বর্তমান 'বেদান্তসূত্র' এহানেই ব্রহ্মসূত্র। স্বয়ং ব্যাসদেব তার ভাষা হুনিয়া আরাকৌ যোল বৎসর আয়ু প্রদান করেছিল। এ কথা এহানর সত্যহান ফলিলতাই ড° স্মৃতিকুমার সিংহ গিরকর মাধ্যমে। তা শংকরাচার্য স্বরূপ। এ লেরিক এহান একমাত্র তার পরিশ্রমর ফলহান। এহান একমাত্র দৌর ইচ্ছাহান। পুরাণা পত্রিকা এতা খমকরিয়া হাবি আকপেইং করিয়া বহু বছর পরিশ্রম করিয়া যে উপহার দিল, উহানর ফল একমাত্র ইমা সরস্বতীরাং নিবেদন ছাড়া কুনো বিকল্প নেই। উতার লগে উদীয়মান লেখক শ্রী প্রভাসকান্তি সিংহ গিরকও ভ্রমরাগর সাদে আয়া লেরিক এহানর যাবতীয় খরচর ডাঙর বাট আহানর দায়িত্ব নিলগা এহানরকা তারে মোর অন্তরর শ্রদ্ধা বার বানা নুংশি জানাউরি।

এ হারৌপার মেল এহানাৎ মোর সাহিত্য কর্ম এতারে যে যে পত্রিকার সম্পাদকে তানুর পত্রিকাৎ প্রকাশ করিয়া মোরে ধন্য করেছিল তানুর প্রতি শ্রদ্ধা থয়া অন্তরগলো নিংশিং অউরি—

ঊর্মদনমোহন রাজবংশী — 'ফাগু' পত্রিকা

শ্রী ব্রজেন্দ্রকুমার সিংহ — 'প্রতিশ্রুতি'

শ্রী চন্দ্রকান্ত সিংহ — 'নুয়া এলা'

শ্রীমতী অঞ্জনা সিংহ, শ্রী শান্তিকুমার সিংহ — 'নুবা দৃষ্টি'

শ্রীমতী শান্তি সিংহ — 'চিন্তা'

শ্রী মনীন্দ্রকুমার সিংহ — 'বিঃ মঃ সাহিত্য সভা পত্রিকা'

হাবি এতার খামতলে হুরুয়ারির সংকলন এহান পাঠক গিরিগিথানীর হুদিৎ কতিহান রেখাপাত করানি পারতই উহান তানুর গজেই সমর্পন করলু। ইতি

ওঁ শান্তি ওঁ শান্তি ওঁ শান্তি

০১।১২।২০১৫ ইং

ইন্দ্রকুমার সিংহ

ইন্দ্রকথা


ইন্দ্রকুমার সিংহ বিষ্ণুপ্রিয়া মণিপুরী কথাসাহিত্যর ইন্দ্রগ। সারা জীবনের সাধনাল সমাজে অমূল্য অবদান থ্যা এসাদে নামাকরণর সার্থক অর্থ কতিগ মানুরে প্রতিষ্ঠা করানি পারেছি, বিসারেয়া চেইলে আঙুলিৎ লেহানি য়াকরব। কিন্তুমান আমার এ কুৎতিরাং সমাজ এহানাৎ ইন্দ্রকুমার সিংহ এসাদে সার্থক গিরক আগ। গিরকর ইমাবাবাই জরম পরে কিহান খালকরিয়া নাংহান থদেছিলা হারনেই। কিন্তুমান গিরকে নিজর অবদানল বিষ্ণুপ্রিয়া মণিপুরী কথাসাহিত্যর ইন্দ্রর আসনহান ঙালকরেছে। বিংশ শতিকাত্ গোকুলানন্দ বার আর আর দৌ গিরিগিথানির জাগরণী এলাৎ বার ইকরাৎ য়েবাকা আমার সাহিত্য হজাক অয়া টটরা সাহিত্যৎত ইকরা সাহিত্যর বেদে কাকেই কারল, ঔবাকাই ইন্দ্রকুমার সিংহর জরম বারমুনি বা নরসিংহপুর লয়াৎ আকুপীসেনা দেবী গিথানকর উরে, নিংথেম সিংহ গিরকর ঔরসে - ১৯৩২ ইংরেজিৎ। আমার কথাসাহিত্যরে পৌরাণিক বার লৌকিক য়ারির ঙাল বৃত্তগৎত গিরকেই আতহানাৎ ধরিয়া আধুনিক গল্প উপন্যাসর আরাক ইঙাল ঙাল বৃত্ত আগৎ আনেদিলগ। ইন্দ্রকুমার সিংহ বিষ্ণুপ্রিয়া মণিপুরী সাহিত্যর পইলাকার সার্থক বার এবাকাও হাবিৎত জনপ্রিয় গল্পকারগ। টলস্তয়, এড্গার এলেন পো, মঁপাসাঁ, হেমিংৱে, শেক্সপিয়ার, রবীন্দ্রনাথ, শরৎচন্দ্র বার বিশ্বসাহিত্যর আর আর সাহিত্যিকর অমর সৃষ্টির মুন্দু-দুন্দু বরনে দিনর পিছে দিন তিঙেছে বার শেঙেছে সৃষ্টিশীল মন আহানল গিরকে বিষ্ণুপ্রিয়া মণিপুরী সাহিত্যরে আধুনিক মাত্রা আহান দিয়া বিশ্ব-জগতে কাকরানির সংকল্পল ছাত্রজীবনেই কলমগ ধরেছিল। গিরকর সাহিত্য-যাত্রা সার্থক অছে। আজি ইন্দ্রকুমার সিংহ গিরকর ইকরা গল্প বার নাটকর ভান্ডার এগরে মইবংগর সাদানে কানহানাৎ দিলে হুনিয়ার হৌদিন দিনে হাতুরেছিল বিশ্ব-সাহিত্যর সুমুদ্রর রৌ, অটগিৎ ধরিয়া ফুদিলে নিকুলের বিষ্ণুপ্রিয়া মণিপুরী জনজীবনের আহানি, কাদানি বার বানাপানির মৌলিক শংখধ্বনি; লপহানাৎ লয়া কূপকরে চেইলে দেহিয়ার বৌদ্ধিক বার শৈল্পিক কারুকার্য। হৌদিন দিনে আলোড়ণ সৃষ্টি করেছিল গিরকর ইকরা অমর 'হুনর অরিঙী' বার এক্সাকা ইকরা 'সতী' নাঙর গল্পহানিৎ আমি পেয়ার নিপুন কথালিঙ্গী আগর ঘটনা-বিন্যাস, চরিত্র-গঠণ, ডিটেলিৎ, পরিণতির বেদে হজাক কাকেই, হাবির গজে বলিষ্ঠ নারী চরিত্রর অপূর্ব সৃষ্টি। ব্যংগরস সৃষ্টিৎ গিরক পরিপক্ক কারিগরগ। গিরকর ইকরা নাটকও আমার সাহিত্যর সম্পদ আকেইহান। গিরকর নাটকল আমি আজি গর্ব করিয়ার, সাহিত্যর মঙলীৎ পরিচিত অয়ার। গিরক নিজে চিত্রশিল্পী আগও। গিরকে য়েকরা ভুবনেশ্বর সাধুঠাকুর, গোকুলানন্দ গীতিস্বামী গিরক গাছির চিত্র ঔতা

আমার ঘরে ঘরে আজিও ঝালয়া আছে। গিরকর 'ছবি' গল্প ঔহানাৎ ঝলক আহান পেয়ার। ইন্দ্রকুমার সিংহই ষাইটর দশকে শংখধ্বনি দিয়া বিষ্ণুপ্রিয়া মণিপুরী আধুনিক কথাসাহিত্যর যে জয়যাত্রাহান অকরেছিল ঔহান আজি আন্তর্জাতিক মানর পাংচেলগ সকইলগা। ঔহানে পথপ্রদর্শক ইন্দ্রকুমার সিংহ বিষ্ণুপ্রিয়া মণিপুরী কথাসাহিত্যর ইন্দ্রগ। ঔহানেই আজিকার এ ইন্দ্রকথা।

আজি তিন বছর ধরিয়া গিরকর ইকরা গল্প ঔতা পুলকরিয়া ষোলহান গল্পল ফঙইল 'ইন্দ্রকুমার সিংহর গল্প সংগ্রহ' নাঙর লেরিক এহান আমার হাবিৎত বুজন বা আর্থ কথাসাহিত্যিক গিরকর থাম্পাল আতে উত্তরসুরী কনাক কথাসাহিত্যকর্মীর পক্ষৎত কৃতজ্ঞতা-বুজা খুৎতল আহান। গিরকর ইকরা গল্প এতা আকপেইৎ পুলকরিয়া দিলে মূল্যায়ণ করানি নুঙেই অইতই বার আজিকার চিরির যেতাই 'ফাগু' পত্রিকাই নাদেহেছি ঔতাই ইন্দ্রকুমার সিংহরে নুরাকরে চিনতে বার আবিষ্কার করতে নুঙেই অইতই এ নিংল এ লেরিক এহানর পরিকল্পনা করানি অছেতা। এসাদে আরাকও লেরিকর পরিকল্পনা আমারতা আছে। যে যে গিরিগিথানিয়ে গিরকর ইকরা দুস্ত্রাপ্য গল্প ঔতা বিসারেয়া দিয়া পাংকরলা, বার যে যে গিরিগিথানিয়ে রূপা পইসাল পাংলাক করলা, তানুরে আমারমানু ফাউন্ডেশনর পক্ষৎত হৃদয়ৌপা ধন্যবাদ জানাউরি। কথাসাহিত্যিক প্রভাসকান্তি সিংহ গিরকে নিজে আগ বারিয়া আয়া রূপাল পাংলাক করল ঔহান এসাদে কামে ডাঙর প্রেরণা আহান। গিরকরে আমারমানু ফাউন্ডেশনর পক্ষৎত ধন্যবাদ। কথাসাহিত্যিক ইন্দ্রকুমার সিংহর জেঠা পুতক ইলাবন্ত সিংহ গিরকও পিতৃদেবর এ মহৎ কাম এহানাৎ যৌঅক বুলিয়া জলার রূপা আনিয়া দিলগা। গিরকরেও ধন্যবাদ। এ লেরিক এহানর গল্প এতার ফামে ফামে লেখক গিরকে তঙাল করল। ঔহানে আগেদে নিকুলেছিল ঔতার লগে ফামে ফামে তঙাল আহিৎ পড়তই। এ পরিবর্তিত রূপ এহানিয়েই আমার পক্ষৎত খুৎতলহানি।

গিরকর ইকরা আরাকৌ য়ারি থা-থাইলেও আমি পুলকরানি নুরারলাৎ। ঔতার গজে গিরক এবাকাও নুরা উদ্যমল ইকরানিৎ লাগেছে। ঔহানে এপেইৎ নায়ৌঅইল কিতাপারা গল্প ঔতা ভবিষ্যতে গিরকর কুনো রচনা-সমগ্র নিকুললে আশা থয়ার যৌকরানি অইতই।

স্মৃতিকুমার সিংহ
আমারমানু ফাউন্ডেশন
২৩ জুন ২০১৫ ইং



সতী

টেঙারার বুকগ চিরে চিরে জরিশৌ আহান সমতলে আয়া লামেছে - লুবুলাংছ।
মনজিলি কার্বি গাং উহানর ঠইগ বুললেও যাকরের। ঔ জুরিহানর পানি পিয়া
গাঙহানর মানু জিংতা অয়া আছি। লুবুলাংছ জুরিহানর বারাদে বাহা আগরে
আহিয়া নেইকরিয়া বহা দেছি। ঔ বাহা উগর হাদিয়েদে পানি লামিয়া আহের -
আকপেইং আয়া ঝর ঝর পড়ের, তেং নেই... দিনরাতি ঔ পানির শব্দ। পানি
পড়ের উপেইং ডাঙর ডাঙর হিলর লুম্পাক মাহেই পুলকরিয়া থছি। উতার গজে
বয়া হিনেইতারা, ফুতি ধইতারা - মনজিলির নিঙলশৌ হাবি তিলয়া য়ারি পরি
দিতারা। য়ারি লমইলে পানিলো ঘরে যিতারাগা।

আরার দিনর সাদে কাদম হাণ্ডেপী পানি নেনাং আহেছে। বাহার বেতর হংকরা
চেংপাই আগর ভিতরে ডিগল ডিগল ডাঙর বাহার চুং কতগ - উতার লগে লাংবং
কতগ। লাংবং মানে জংগলি খল্টুমর ডুম্বা। ঔ চুঙ বার লাংবং অইলতাই তানুর
পানি থনার পাত্র।

কাদম তেইর লাংবং বার চুংগি পানিলো বুজিয়া চেংপাইগর ভিতরে লেইসিল
করল। নিরালহানাং বেতর পেটিগাছ থয়া পানির চেংপাইগ তুলানির হন্না
করতেই খাংতা শব্দ আহান পেয়া তেই পিঠিয়েদে বুলন দিল। অচিনা মূর্তি আগ
দেহিয়া ঙাকইলী।

‘পানির ডক আহানে আহিলুতানা-’

‘ঘরতে কুরাং?’ কাদমে ঙাকয়া আংকরল।

‘ঔনা, কাদার উমদাপ গাঙে।’

‘অ..., মিতে নাউ চিনলু।’

‘মি গাওবুড়া লুমজং তেরনর পুতক। মোর নাং লুমছে তেরন।’

কাদমে লুমছেরে খানি আহান বিভুলা অয়া চেয়া থাইলী। লুমছেই মুরগ খাজুরা
খাজুরা মাতের, ‘ঔরে টেঙারা উগং জুমর কাম করানিং আহেছুগ। পানি
ডকপেইলুহানতে তোরে দেহিয়া...’

‘অ, থাক থাক। আমরাং যিকগা। কামে হিনপাছং, পানিয়ৌ পিতেই বারো বং ফুটি আহানৌ পিতেই। হিনহানৌ ককইতই-’, কাদমে অনুগ্রহর সুর আগলো মাংল।

‘নিয়াম হারৌর কথাহান।’ লুমছেয়ে জুরাবহান দিল। কাদমে মাটিহানাং বয়া নিরালহানাং পেটিগাছ থয়া পাংকাল যৌঅয়া কেজন আহান দিয়া পানির চেংপাইগলো উবা অইলী।

‘হুঃ, এমাটিক বরি জাত এহানলো টেঙারাগদে কাইতেইতা?’ লুমছেয়ে ঙাকয়া আংকরের। কাদমে বুলনদিয়া লুমছেরে আহিগিলো খেপাং দিয়া মাংল, ‘উঃ, এতাৎতও জিঙে নেনা পারুরিগতে।’

‘আচানক!!’ লুমছেই জুরাব দিল।

দ্বিগি তাপ্প তাপ্প আটানি অকরল। হাদি হাদিৎ দ্বি-আক কথা টটরা টটরা ঘরগং ফৌঅইলাগা। কাদম ঘরে হমেয়া পানি ইতু-পাজাল করিরা। লমছে দুরার টংগি ঘরগর বাহার মাচাংহানাং বহিলগা। কাদমে তাপ্প তাপ্প বং বইতল আগ, সেংসেঙর খেরি আগ, লগে লাংবং আগ বুজে পানিলো নিকুলিয়া অইলী। লুমছের মুঙে থয়া তানুর জাতর কার্বি নিয়মমতে মানহান দিল। লুমছেয়ে নিয়মমতে মানহান লয়া খেরিগং বং ডালে ডালে মন্ত্র সলকরের। তাপ্প তাপ্প খেরির থাংনাং খেরি পিনা অকরল। কাদমে কাদাত বয়া আংকরল,

‘হিজা মাংকারা খানি দিতু?’

‘আছেতা?’

‘আছে।’

‘দিলেতে হবা অর নাই’ - লুমছেইয়ে মাতে নেরগা।

কাদমে হিজা মাংকারা বারো নুন খানি কলার পাতা আহানাং হাজেয়া কাদাং থদিল, লুমছে নিয়াম হারৌ অয়া লইল। প্রায় বইতল আগ বং লমকরতে না লমকরতে নিশাহান ধরানি অকরল। লুমছে তাপ্প তাপ্প সি সি মুক্সি দেনা অকরল। নিশাহান আরাকৌ জবর অইল, নিজরে পাহুরে বেলল। নিশার ঘোরে নানানতা মাতানি অকরল। কাদমে কাদাং বয়া তারে চেয়া চেয়া মুক্সি দিল।

‘কাদম তোর রূপহান যেসাদে হবা নাংহানও উসাদে হবা। তোর আদরও হবা, চুলতলাও হবা, গারিগর মাচুহানও জবর হবা-’ লুমছে নিশার ঘোরে মাতে নেরগা।

থাকাং দিলেই বেয়াপা নিয়াম হারৌ অইতার। কাদমও বেয়াপাগ। তেইর মনহান হারৌরে বিভূলা অইল। আরাকও মনর কথা হারপানির ফন্দি করল।

আরাক বং আগ আনিয়া নিজে খেরিগৎ ডালে দিল। লুমছে হারৌর আর অন্ত নেই। খেরির থাংনাং খেরি বুজে বুজে বং আসুলানি অকরল। নিশাহান আরাকৌ জবর অয়া আহের। আহিগি রাঙা অইল। মাংলা মাংলা অয়া টটরানি অকরল। তার পেটর কথা জন্দ করিল আর উপায় নেই। মাংলা অয়া মাতের, 'কাদম, নুংশিপী কাদম, মি মি বিয়া করতৌ তোরে - যেসাদেউ বিয়া....' কাদমর লৌশিংহানে কাম দিল। মুক্সি আহান দিয়া তারে খানি আহান কূপকরে চেয়া মাংল, 'হাদি হাদিৎ আহিছ। মি হারৌ অইতৌ।'

'জবুর জবুর, হাদি হাদিৎতে কিয়া? নিক্কা আহিতৌ, তি মোর...' লুমছে মাংলা অয়া মাতে মাতে উঠিল। তাপ্প তাপ্প হেইফেই নাইফেই অয়া কত কাকেই দিল। কাদমে তারে ধরে ধরে চাংহানাৎত মাটিং লামাদিল। লুমছে কাকেই কতহান দিয়া বুলন দিয়া কাদমরে চেয়া চেয়া অর্থনেই শব্দ করে করে ঘরেদে সালগেলগা। উদিনেৎতপুри আগরে আগই নাদেখলে নিংশা মাঙনি অকরল। রাতি-দিন লুমছেই কাদমর মেইথংহান দেহানির সালে জুরিহানর কাদাং বয়া থার। কাদমেও দিনে আকফিরর বদলা পাচ ফির জুরিহানাৎত পানি বহানি অকরল। পাচ মাহা লাল গেলগা। আগর গজে আগর বিশ্বাস পুরা মাত্রাৎ শাতয়া উঠিল। তানু দ্বিয়গি আজি আত্মা আগ। আগরে আগই পাহুরানি তানুর কল্পানার অতীতহান।

আকদিন হারৌ অয়া কাদমে লুমছের কাদাং হিল আগৎ বয়া পৌ আহান দিল।

'হুনলেগ? কাদমে মাংল।

'কিহান?'

'হারৌপা পৌ।'

'এতাৎত হারৌপাতাতে কিতা?' লুমছেইয়ে ঙাকয়া মাতের।

'আছে। তি মুনিগই এতা হার নাপেইতেই। আমিতে বেয়াপা, আমি হারপেয়ার। এবাকাতে হুন, মোর পেটগৎ তোর শৌ আগ আহিল। চা কতির হারৌপা পৌহান।'

'মোর শৌগ তোর পেটগৎ!!' লুমছে খাংহানপারা অয়া হিলগর গজেৎত লামিয়া উবা অইল। তার মেইথংহান খাংতা কালাধারাগ অইল। উদাস অয়া চারিয়বারার জঙ্গলহানি চেইল। মেৎতমহানাং যেমন আলাদা মানু আগ অইল। কাদমর অন্তরগ ছেৎ করল। তেই নিজরে কুনোমতে তেমজেয়া মাংল,

'কিতারতা খালকররতাতে? ডরেইলেথাং?'

'হাইদে খালকরতৌ' বুলিয়া লুমছে চির চির আটিয়া গেলগা। কাদম আচানক অইলী। 'হাঃ এহানতে কিহান! কি আচানকর ব্যবহারহান!' তেই ঙাকয়া

খালকরী। অজানা ডর আহান আহিল। তেইর গারিগ রমকাটা দিল। কল্পনার
হংকরা হারৌপার জিনাহান মেৎতমহানর বৌহানাৎ ফরদিয়া গেলগা পাৰা।
দুঃখৎ অপমানে আহির পানি তেৎনায়া গালগিয়েদে পাহে য়ারগা। কুনো কাম
আহানাৎ মনহান লেপকরানি নারল। তাম্ব তাম্ব উঠিয়া ঘৰেদে সালইলী।

কাৰ্বি সমাজৰমা বিয়া এহান অমাটিক সমস্যাহান নাগই। আগরে আগই য়াকরলে
নুঙেই করে হেইমাক অয়া ঘৰ-সংসার করিয়া থাংনাৎ বিয়া অইলেও চলের।
উহানেতে লুমছেই মনেইলে ইলেই লেইকরে লগে থনা পারের। কিন্তুমান
লুমছেৰ মনর গতিহান কাদমে ধরে নারল। লুমছেৰ ডরহান অইতাই তার
সমাজ। তানুর সমাজে মামাকর লগে সম্পর্ক থনা অতি প্রয়োজন। মামাকর
জিলক যেসাদেও বাগিনাকে বিয়া করানি লাগের। সমাজর নিয়ম বাগানির তার
ক্ষমতা নেই। লুমছেৰতা বাধ্য অয়া কাদমর বানাহানাৎত সেচানি ছাড়া আর
কুনো পথ নেই।

কাদম ইজ্জু বারো সরলমতি নিঙলগ। লুমছেই যে এসাদে করতই এহান তেইর
কল্পনারমাও নেয়ছিল। প্রবঞ্চিত প্রেমর তাপিত্তৎ তেই তিলে তিলে ডহানি
অকরল। বহু হন্না করিয়াও তেই আকদিনকারকাও তারে ধরে নারল। তেই
বাধ্য অয়া তেইর হমাজক আগরে লুমছেৰাৎ দেপেঠাদিল। জুমর কামর হাদিৎ
হমাজকে লুমছেৰে হাবিতা মাতে গেলিগা। যেসাদেও আকফির কাদম্বরে উনা
অনা লাগের বুলিয়া হেইচা করল। লুমছেৰ কিন্তু ইজ্জু জুরাবহান দিল, 'কাদমর
শৌগ কারগ মি হার নাপাছু। মি তেইরে আর উনা অনা নারতৌ।'
হমাজক মুরগ নঙেয়া আলথক অইলী। হমাজকরাংত কাদমে হাবিতা হুনিয়া
কান্ধিহানে রি রি জলানি অকরল। যেসাদেও এহানর প্রতিকার লাগের। অনেক
খলকরিয়া তেই বাপকরাং হাবিতা প্রকাশ করল।

সার্থে হাণ্ডে, কাদমর বাপক, ইজ্জু মানুগ। তা খালকরিয়া পথ নাপেইল। তার
মুঙে সমাজর বিচার ছাড়া পথ নেই। উহানেতে সমাজর গাওবুড়া, ব্রু তমেন বার
হাবাই হাবিগির শরণ লইল। হাবিহানে তার য়ারি হুনিয়া বিচার করানি থক
বুলিয়া স্বীকার করলা। লগে লগে মনজিলি গাঙর গাওবুড়া লংছিং তেরাঙর ঘরে
বিচারর ফামহান লেপকরিয়া তারিখহান বেললা। লেপকরা তারিখে লংছিং
তেরাঙর ঘরে বার্তন পাছি মানু হাবি তিলইলা। লংছিং তেরাঙ গাওবুড়াগ - তার
দায়িত্ব দলাগ। মেইঙক করানি সেবা করানি হাবিতা তার গজে। খরচহান কিন্তু

কাদমর বাপক সার্থে হাষ্টেরতা। এহানেই তানুর পইলাকার রীতিহান। বঙর লগে হুররর মাংস। মুরগৎ কয়ৎ আহান বাধিয়া, গারগৎ কার্বি মাফলার আহান বেয়েয়া, কালা কোট আহান উরিয়া বিয়ানেতপুরি হন্থন্থ করিয়া সার্থে হাষ্টে লংছিঙর ঘরে কামে লাগেছে। আহিতারা মানুরে 'কারদম কারদম' বুলিয়া বাতরবারার আতহান তুলে তুলে মেইঙক করে।

পুলছি অতিথি হাবিরে পইলাই বং কত বইতল মুঙে থয়া মানহান দিল কাদমর বাপক সার্থে হাষ্টেই। এহানেই তানুর পইলাকার রীতিহান। বঙর লগে হুররর মাংস। হাবি হারৌ অইলা। তাপ্প তাপ্প তানুর ঠারলো মন্ত্ৰ সলকরে সলকরে খেরিগিৎ বং ডালে ডালে পিনা অকরলা। হাবির আহি রাঙা অনা অকরল। বঙর নিশাহান হাতে হাতে হাবিরে কাবু করে নেরগা। আগরে আগই চেয়া মুক্সি দিলা, নানানতা টটরানি অকরলা।

এ অবস্থার ভিতরেও বিচারহান চলিল। গাওবুড়া বুতমেন বারো হাবাই কথা টটরা টটরি করতারা। হাবির গজর হাবাই কাদম বারো লুমছের জবানবন্দী লইল। হাবাই খানি আহান খাল করিয়া থাইল। তানুর দ্বিয়গির কথাৎ কুংগ হুৎতুমে দোষীগ হারপেইল কুনো উপায় নেই। আকেইগির কথাই আকেইগি চুম। কিন্তুমান আগরে যেসাদেও লাল বুলিয়া চিনৎ করানি লাগের।

কাংবুরা কামচা প্রধান বিচারকগ - আরবারাদে হাবির গজর হাবাইগ। উহানেতে তার গজে মাতেকুরা নেই। বিচারর ধারাহান অন্যবারাদে সালকরল। হাবিহানর যাথাং লয়া পূজা আহান লগে লগে লিংখাৎ করল। তার কথামত পূজার মালপজা যোগাড় অইল - চৌল, সিন্দুর, তুলসীগাছ, বাহাশৌ আকজার, বাঘর দাত, ভল্লুকর নখ কিতাকিতি। মুরুক আগ কাপিয়া উতার রকতলো মন্ত্ৰ সলকরানি অকরল, পুরা ঘন্টা আহান তেৎনায়া সলকরল। উতার থাংনাৎ উবা অয়া লুমছেরে ডাক দিল। হাবাইর কথামত লুমছে মুঙে আয়া উবা অইল। হাবাইয়ে মুঙে বহানির আদেশ দিল। লুমছে বহিলগা। হাবাই মন্ত্ৰ সলকরে সলকরে লুমছের মুরগৎ চৌল ছিটা দিল, হাবির মুঙে মাংল, 'যদিচৈ লুমছেই মিছা মাতের উহান অইলে পনরো দিনর ভিতরে তারে বাঘে নাইলে ভল্লুকে খেইতাই, নাইলে হরপে কামারতাই।'

হাবিহানে লগে লগে সমর্থন জানেইলা। বিচারহান আলথক ষোল দিনকার দিন উহান লেপকরিয়া হাবিহান উঠে গেলাগা।

হাবাই বিচারমতে কাদমর মুঙে আকগ ছাড়া দুগ পথ নেই। তেই আলথক

লুমছেরে পানার কোন আশা নেই। তেইরে সতীগ প্রমাণ করানি মানেই লুমছের মরণ অনিবার্য। ঈশ্বর যদি সেতা পালর, মন্ত্র যদি মিছাতা নার, লুমছে যদি মিছা আচরণ করে - লুমছে এ পৃথিবীত বিদায় লনা লাগের। তেই হাবিতা খালকরানি উরা বেলেয়া দিনে-রাতিয়ে লুমছের মরণর পৌ পানারকা বাছেয়া থাইরী। ঈশ্বররাং তার মরণর প্রার্থনা করিরী। তাপ্প তাপ্প আচানক প্রতিহিংসা আহানে তেইরা জাপদিয়া থইল। তেইরে তেই আংকরিরী - যদিচৈ লুমছে নামরের? কি উপায়? না না তেইরে তেই যেসাদেও সতীগ প্রমাণ করতই। মনহান হিলগর সাদে দরা করিয়া উবা অইলী।

চেইতে চেইতে পনরদিন লাল' গেলগা। ষোলদিন আয়া ফৌঅইলহা। লংছিং তেরাং গাওবুড়ার ঘরে বারো বিচাররকা হাবিহান তিলইলা। কিয়া বুললে, তারিখহান আগেই লেপকরা আছিল। পইলাকার বিচারর দিনে যেসাদে সভারে মান দেছিল আজিও উসাদে কাদমর বাপকে বং বারো হুররর মাংসলো হাবির তুম্টি বিধান করল। বিচারর ফামে লুমছে আয়া বহিলগা। হাবিহানে কৃপকরে লুমছের মেইথংহানাদে চেইলা। লুমছে নামরিল- আচানক! লুমছের দোষ নেই - লুমছে সত্যবাদী। হাবিহানে এ ভাব এহানলো খালকরাং আছি।

কাদমর কান্দিহান আরাকৌ জবর অইল। গারিগর রোম চপ্ চপ্ উবা অইল। মিছাহানে জয় অইল, সত্যহান পাতালে গেলগা! হায় কলিকাল, এযুগে সেত্যহানর কুনো মূল্য নেই। এতা কিতা খালকরিয়া তেই জুমমারিয়া কোণ আগদে বয়া নানান লৌশিং খালকরিরী। বিচারহান অকরলা। সভামাপু কাংবুরা কামচা হাবাই হাবিরে আংকরল,
'কিহানতে করতাং গিরিগিথানী?' রং বং ফাংচ মুরগর কয়ংহান ঠিকঠাক করিয়া আহিগি রাঙা করিয়া মাতের,
'বিচারতে আর কিতা। মানুগ নামরিল। এবাকাতে রায়হান বেলা দে। বিচারহান লমকরে দে।'

হাবিহানে রংবং ফাংচার কথাহানাং সন্মতি জানেইলা। হাবাই খানি আহান খালকরিয়া রায়হান দিল,
'কাদমর রূপা হাজার আহান জরিমানা। লুমছের দোষ নেই। জরিমানা রূপা হাজার উহান পনর দিনর দিন উহান দেনা লাগতই।'
হাবাইর বিচারেই শেষ বিচার। এহানর কুনো হেরফের নেই। কাদমর বাপক সার্থে হাঙে মুরগ নঙেয়া রায়হান গ্রহণ করল।

কাদম বিচারর ফামর কোণ আগদে বয়া আছে। লাজে, অপমানে, দুঃখই তেইর মেইথংহান কালা অনা অকরল। কিন্তুমান আহিগিৎ পানির ফুটা নেই। চুল হেইফেই নাইফেই - বারাদে সিতারাছে। খানি আহান জুমমারিয়া থাইলী। তাপ্প নিজরে তেমজেয়া উবা অইলী। হাবাইরে প্রার্থনা করিয়া তেই কথা আহান মাতানিরকা হেইচা করল। হাবায়ে কথাহান মাতানিরকা যাথাং দিল। কাদমে হাতে হাতে মাংল,

‘সভাহানর রায়হান মি য়াকরলু। কিন্তুমান মন্তুর ফলহান যদিচৈ ঔ পনরদিনর বিতরে ফলে যারগা উহান অইলেতে জরিমানা দেনা নারতৌ। কিয়া বুঞ্জে, মন্তুর ফল তাপ্প তাপ্প ফলতেও পারে।’

কথাহান্তে নাগইহান নাগই। হাবায়ে মুরগ জাকারেয়া যুক্তিহান য়াকরল। লগে লগে ব্রু তমেন গিরকে তেইর যুক্তিহান য়াকরিয়া সভারে আরাক পনরদিন সময় দেনারকা হেইচা করল। হাবাহানে য়াককরলা। কিন্তুমান ষোলদিনর ঔদিন যেসাদেও রূপা দেনা লাগতই বুলিয়া ঠিক করলা। সভাহান ভংগ অইল।

কাদমর বাপকরতা হুদা মইষ দুগ আছে। দ্বিয়গি বেছানি ছাড়া রূপা যোগাড় করিল আর পথ নেই। অথচ দ্বিয়গি বেছলেই খেতিহান বন্ধ অর। কিন্তু কি উপায়? সমাজর বিচার যেসাদেও য়াকরানি লাগের। নেপালি পাইকার আগর লগে কথা ঠিকঠাক অইল। রূপা ষোল দিনকার দিন উহানাৎ দেনা লাগের উহানৌ লেপইল। মনর দুঃখং তাপিত্তং, অপমানে কাদমর বাপক মনহান তেমজানিরকা দিন রাতি বং আসুলানি অকরল। নিশার ঘোরে কাদমরে নানানতা গালানি অকরল। থাংনাৎ মারিৎ দুহিং বুলিয়া উবা অইল। কাদমে ঠইমামি চলয়া লুকানি অকরল। তেইর আহিগির মুঙে ইমার নাম আধার। ঔ আধারর বুকগৎ নাদেহিরী কুনো তেরা আগর মিঙাল আহান - হুদা আধার, আধার। যেবেদে চেইরী উবেদে আধারর হিনচাপা মূর্তি তেইরে গ্রাস করানিকা আহিতারা। লেইপাক বুলতারা শব্দ উগ আজি তেই ভৌ পেইল। আকসাটে দুহান শাস্তি। অসতীগ প্রমাণ বারো রূপা হাজার আহান। এতাৎত তাপিত্তরতা আর কিতা আছে? খাংতা তেইর রকতে আদিম ভাব আহান হজাক অইল। না না যেসাদেও তেইরে সতীগ বুলিয়া প্রমাণ করতই। এহানাৎ তেই মরলেও কুনো দুঃখ নেই, বরং মরানিয়ে জিৎতা অনার আকহান পথ বুলিয়া নিংকরিয়া থাইলী।

যতদিন লপুকে ধানর নেরা উবা অয়া থার অতদিন কার্বির ঘরে ধান থার - নেরা পড়ানির লগে লগে ধান নেয়র। এরে কথা এহান তানুরে বারারতাই

মাংতারাহান । অবশ্য কথাহান নিয়াম মিছাহান নাগই। ধান পানার লগে লগে ঘরে পুজা বারো বং পিনার হুংগ চলের। এহান যতদিন ধান না লয়ইতই - ততদিন চলতই। ধান নেয়নির লগে লগে হাবিতা কমইতই। তাপ্প তাপ্প জংগলে হমেয়া জংগলি আলু পুলকরতাই। উতা খেয়া দিনহান লালইতাই- সংসারলো অমাটিক খালকরানি নেই। বরিষা এহান তানুরাং জবর হিনর মাহান। কতদিন বরন দিলেই ঘরে ঘরে দলাগ সমস্যা।

দ্বি-তিনদিন চুংগর সাদে বরন ডালল। এসাদে অবস্থা এহানাং লুমছের ঘরে খানারতা নেয়েছে। ঘরগর হাবিহান ম্যালেরিয়ার তাপে কেকানিং লাগেছি। নিরুপায় অয়া তক আহানলো জংগলে আলু বিসারানিং নিকুলিল। চেপ চেপ বরনহান বেলাছে। লুমছে ঘরেংত মাইল আহান দূরেইং জংগলহানাং তকহানলো আলু মেইকখুগ অয়া খুলাং লাগেছে। দিকবিদিক নেই আলুর মারা আসুলানিং লাগেছে। হাদি হাদিং আকখুলাগই দেহগং পাংকাল বরানিরকা হেই হেই বুলিয়া লৌ আহানৌ দেব। বরনর পানিয়ে দেহগ হাবি তিঙেছে। কিন্তু কোনো আকবেদে খেয়ালহান নেই।

খাংতা লুমছের মুরগং অতি জবর বারি আহান পড়িল। তিন পাক দিয়া বুলিয়া পড়িল, লৌদিল শক্তি নেয়ইল। আহিগিং জিনজিনি দেখল - অজ্ঞান অয়া পড়িল। আর ডিল নেই। গারগং ভল্লুকর থাবাহানর ক্ষতহান পড়িল, গারগর শিংলেই হাবি নখর লগে নিকুলিয়া আহিল। পিচকারি দিয়া রকত নিকুলানি অকরল। আচানক ডরপেইল মাচাক দুশ্য আহান। উতার থাংনাং পেটগ, বুকগ বারো মেইথংহানাং আরাকৌ ক্ষতগ মাহেই পড়িল - দেহগ হাবি রকতে রকত।

ঔ বীভৎস মূর্তি উগরে আহিগি পাকদিয়া আগই মাতানি অকরল,
'চিন, চিন, এ কাচাখৌরীরে চিন - কাদম হি'ষ্টয়াপীরে চিন।'

কাদমর গারিগ প্রতিহিংসালো জ্বলিয়া আছে। কুপকরে লুমছের ঠইগ নেই ডরপেইল মাচাক দেহ উগ চেয়া হারৌপার মুক্সি আহান দিয়া আতহানাং ধরেছিলী ভল্লুকর থাবা উহান ফুতি আহানলো গুরিয়া ঘরেদে সালইলী।

'লুমছেরে ভল্লুকে খেইলা, খেইলা' - পৌ এহান টেঙারাংত টেঙারাং প্রতিধ্বনিত অনা অকরল। পৌহান পেয়াই কাংবুরা কামচা হাবাই দাবদিয়া ফৌঅইলাগা। লুমছের দেহগর অংতাহান দেহিয়া তাও খাঙ পড়িলগা। হুঃ মন্তুর গুণ এহান কি আচানকহান! হাবাই নিজরে নিজে থাকাং নাকরিয়া নারল। লয়াগো হাবিয়ে হাবাইর মন্তুর গুণে আচানক অইলা।

চির চির আটে আটে হাবাই মনজিলি গাঙে আয়া ফৌঅইলহা। হন হন করিয়া

কাদমর টংগি ঘরগর মুঙে উবা অয়া ডাকহান দিল, 'কাদম, কাদম!'

'হাবাই গিরক কিয়াকাথাং? কাদম মাচাংহানাৎত লামে লামে আয়া হাবাইর মুঙে উবা অইলী।

'জয় সতী গিথানক, জয়,' হাবাইয়ে হারৌ অয়া মুরগৎ আতহান দিয়া মাংল।

'হাঃ, কিতা অছেথাং?!' কাদমে পাংসায়া আংকরল।

'হা পৌ নাপাছৎ? লুমছেরে ভল্লুকে মারলা - খানি আহান আগে -চা মোর মন্তুর গুণ।

হাবাইর মেইথংহানাৎ তৃপ্তির ছবিহান বাহিয়া উঠিল। কাদমে বারাদে বুলন দিয়া মুক্সিদিয়া মাংল, 'আপনার মন্তুর গুণ - লগে তন্ত্রও আছেতাহে।'

হাবাইয়ে কাদমর কথার মর্মহান হারও নাপেইল । হারৌহানে 'কাদম সতী, কাদম সতী,' বুলে বুলে গাঙেদে সালইল।

নুয়া এলা, ৭ম বছর, ২য় সংখ্যা

ছবি

নিষ্কারলেহে মাদানে মেৎতম ঘুমশৌ আহান নাদলে বসন্ত খাংকরে নারের।
হবানেই অভ্যাসহান অইলেউ তা কিন্তুমান নিয়াম যতন করিয়া য়করেছেহান।
আর আর দিনর সাদে আজিও তা মাদানকার ঘুমে অচেতন। মুরগৎত জাং পেয়া
ফুতি আহান হাপদিয়া পড়েছে। হাদি হাদিৎ নাকগদে গর্ গর্ রৌ আহান
নিকুলের। ফামহানর মুংবারাদে টেবিল আহান। টেবিলহানর গজে নানান জাতর
রঙর টিউব, তুলি, চে, ফুতি, চীনামাটির প্লেইট, আরাকৌ দলাগ আকুপাতি।
হুরুকাং কুঠাশৌগ। নানান রকমর নিজর য়েকরা ছবি মাহেইয়ে কুঠাগ ঙালকরিয়া
থছে। টেবিলহানর আরাক কোণ আগদে উড় পেঙ্গিল বারো স্কেচ কতগ
সিতারেয়া আছে।

খাংতা আগর আতহান গারিগৎ পড়িল। তাপ্প তাপ্প ঝাকরনশৌ কতহান দিতেই
বসন্ত হজাকহান পারা অয়া বারাদে বুলন দিল। ঘুমর নেশাহান নাগেছেগা
হবায়া। খানি থায়া বারো দ্বি-তিন ঝাকরন দিতেই গারিগ কৌশালি করিয়া আত
জাং বাগিয়া থতাহানাদে রৌশৌ আহান নিকালেয়া ফুতিহান সেচেয়া আনিং সানিং
অয়া মূর্তি উগরে খানি চেয়া থাইল।

‘উঠ বেনাই, আপাংগর সাদে চেয়া থাইলেতাতে।’

‘তুমারাং আপাং নায়াতে কারাংতে আপাং অনি।’

‘হানতে কিয়াতে চার?’

‘চানা থকছে বুলিয়া চাউরিলাই।’

‘নিষ্কার দিন চেয়াতে লম নারথাং?’

‘নিষ্কার দিন নিকুলের বেলিহান চেয়া লমরথাং?’ বসন্ত মুকসিহান দিয়া
আংকরল। লগে লগে উবা অছিলী উগ হুরাবুরা নারিয়া বসন্তর উবেদে পিঠিহান
বুলেয়া মাতে নিরীগা...

‘আটেপ্লা মানুর কথারগাই ডিগল। হু থতাহানাৎত কথাহান নিকুলানি ফাৎনেই
চিলুনিগর সাদে ছবদের।’

বসন্তই তেইর পিঠিবারার ছিতারেয়া য়ালছে চুলতলা উহানাদে বিভোলা অয়া
 চেয়া থাইল। মেইথংহান বুলন নাদলহান দেহিয়া তাপকরে ডাকদিল,
 'মালিকা -মিঙালপা কার্পেটর টুমাহানর সাদে উবা অয়াতে কিয়া?'
 লগে লগে মেইথংহান বুলেয়া জুরাব দিল,
 'কার্পেটর লগে পান্তামনা দেনার কুনো যুক্তি নাদেখলু।'
 'তি হারনাপেইতেই। কোকিলগই তার নারগর মূল্যহান কিতা হারপার!'
 'মানে মোরাংত তি জিঙে হারপার-'
 'পেয়া মাংলে।'
 'হাইদে এবাকাতে দয়া করিয়া খানি আহান বুঝাদে। মিতে সুপ...'
 বসন্ত ফামহানাংত লামিল । বারো তেইর পিঠিবারাদে উবা অয়া মাতানি
 অকরল,
 'হুন কার্পেট টুমাহান, তোর মুরগর আইবরি ব্লেক্ চুল, ভার্মিলিয়ন্ যাবেবুনিলো
 ঝলকার চামহানর থাংনাং কোবাল্ট বু আঙালুরির মিঙালপা রঙে আহিগি মামনি
 অকরল - বাঃ কতির চুরা মিঙালপা রঙর সমারোহ!'
 'আর না গিরক এ -আর না।' মালিকা খিল্ খিল্ আহিয়া ফামহানর কোন
 আগদে বহিলী। বসন্ত চেয়ারহানাং বয়া সিগারেট আগ লাগেয়া ধূমা নিকালানি
 অকরল। দ্বিয়গিরাং কুনো কথা নেই। মালিকাই তেইর আহিগি কুঠাগর ছবিয়াদে
 বুলাছে। বসন্তই স্কেচ উতা উল্টা উল্টা মিল্লেং করে। মালিকা আর তাপথা অ
 নারল । বসন্তরে বারেয়া মাংল,
 'আরাকৌ আহানি নালাগতই পাউরি।'
 'হাঃ- কিয়া?' বসন্ত তেইর বারাদে মেইথংহান বুলেইল।
 'প্রদর্শনীতে আর নিয়াম বাকি নেই হানতে।'
 'অ, উহানরকা,' বসন্ত নিংশি অইল। চেয়ারহানাংত উঠিয়া তেই ললরকা দেছিলী
 ফুতি উহানি মলগর তলেংত নিকালেয়া আনল। কুনো আহান নামাতিয়া তেইর
 আতহানাং দিল। মালিকা মুক্খিহান দিয়া পেইরাক বসন্তই চেয়া য়েক্কা ছবি
 উতাদে দৃষ্টিহান বেলল।
 'তোরে বাক্কা আটুরেয়া হিন দিলু, না?' বসন্ত উদাস অয়া আংকরের।
 'ইঃ, মি বারো তোরে অসময়ে ঘুমেংত হজাক করিয়া দলাগ হিন দেউরি
 এতাতে।'
 'তোরে বহুরেয়া, নানা ভজিল উবা করুরেয়া স্কেচ করৌরি। দলাগ হিন দেউরি,
 না?' মালিকা নিরালহান কুচকরিয়া জুরাব দিল। 'এসাদে মাংলেতে আর নাইতৌ
 - নাইতৌ-'
 বসন্ত ফাক ফাক আহে বেলল। আর খোচাখুচি কথা বাদ দিয়া তেইরে

আংকরল,

‘ছবিহানতে কিমে অছেতা?’

‘হবা সাক্তি মোরাং আংকরিয়া কিহান লাভ।’

‘কিয়া?’

‘তোর আর্টর মূল্যহান মি হারপেইল কোন প্রয়োজন নাদেহৌরি।’ খোচাহান হবা করে দিয়া মালিকা মুকসিহান দিয়া মেইথংহান বুলেইল। বসন্ত খোচাহান পানা ফাৎনেই তার নিজর কোকিলগর পান্তামনাহার কথাহান নিংশিং অয়া আকখুলাগই আহানি অকরল। আহানিহান খামকরে নারিয়া কাহানি অকরল। থাংনাং মালিকাও মেৎতম আহান আহানিহান খামকরিয়া,

‘মোরতা ডিলইল’ বুলিয়া বাউ কথাসৌ আহান মাতিয়া কুঠাগৎত নিকুলিয়া আইলী। বসন্তর আহানিহান কিন্তুমান খানি খানি থায়া চলতে আছে... চলতে আছে...

ফুতিহান নেনার থাংনাং মালিকার দেহা নেই। পুংখাক আক্কুরিদিন লাল গেলগা তাপ্প তাপ্প। বসন্ত নিক্কার লেহে পথগদে চেয়া ডিগল করে নিংশাহান বেলার। ললর কামে নিয়াম চেপঠেং দেছে পাউরি - নিজে নিজে খালকরের। তেব দিন এতা হাবির হাদিৎ মেৎতমকারকাতে আহানি থকছিল। বারো আরাক আহান নিংকরের। হুরাবুরা নারিয়া আকখুলাগই কুঠাগর এবেদেৎত হৌবেদে আটের। আক্কুরিদিনতে লাল গেলগা। আজি আক্কুরি দ্বিদিন। বসন্ত চেয়ারহান্যৎ বয়া সিগারেট আগ লাগেয়া উদাস ভাবল ধূমা নিকালার। আহিগি ছবিয়েদে থছে। খাংতা আঙেইহানর জেপগৎ মেডেল আহান যালকরে দিতেই খাঙয়া উঠিল! লাঙয়া চার। গায়া মাতের,

‘হাঃ কিতা করৌরীতা!’

প্রদর্শনীৎ পইলাকার পুরস্কারহান।

‘মোরাংতে কিয়া?’

‘তোর আর্ট।’

‘তোর ললহানর গুনহানতে নাবুলিয়া।’

‘যতৌ মাং তোর আর্টর গুণ মি অস্বীকার করে নারতৌ,’ মালিকা জুরাব দিল। বসন্ত তাপথা অয়া চেয়ারহানাং বারো বহিল। মালিকা মুকসি দিয়া কাদাং চেপইলীগা। আরাক ফুতি কতহান তার আতহানাং থদিল। বসন্ত ফুতিহানি দেহিয়াও তেইর ইংগিতগ হারপেইল।

‘আরাকৌ য়েক্করানি?’

‘তোর মন।’

‘মোরে গালেইবে পথ নিকাল্লে হবা করে।’

‘কিসাদে?’

‘এতার কা আটে আটে থেপাৎ থেতইতেই তাঞ্জা উগৎ তি না গালেয়া থা পারতেইগ। অবশ্য দুরাদে নাইলেও ভিতরেদে।’

মালিকা সৌঅনি পারা অয়া তারাংত দূরেই অইলী। সৌঅনির কারণও আছেতারগাই। তেই তারে বারে বারে এসাদে কথা নামাতানিরকা হেইচা করেছিলী। তা কিন্তুমান সেপ পেইলেই উতা কথা মাংতে হাংকৈ নার। খানি আহান সময় কুঠাগৎ নীরবতা বিরাজ করল।

‘দাদা -’ বুলিল ডাকহানে নীরবতা ভাগে বেলল। বসন্ত মেইথংহান বুলেইতেই না বুলেইতেই হুচুরিগর সাদে কলা মানে কলালেইমা কুঠাগৎ হমেইলীহা। মালিকারে দেহিয়াও হারৌ অয়া মাংল,

‘গিথানক তোর লেইপাক। হাবিতাৎ তোর জয়। মি মা আহান হম্মা করিয়াও তোরাং কানা নাইলু। অবশ্যে তোর ললহানর লগে আটহানর চুঅনি উহান মূলহান। মোর ললে উতা নেয়ছিল -নাইলে...’ কলা নারগ নিকালেয়া আহে আহে মাংল। মালিকা কুনো কথা নামাতিয়া চেইৎক মুকসির জোরার ওষ্ঠাধরে তুলিয়া আঙুলিগল তার জেপগর মেডেল হানাদে সংকেত দা দিল। কলা তার কাদাৎ চেপয়া মেডেলহান চেয়া মাংল,

‘দাদা মোরেও খানি আহান দয়া করেদে। কুনোদিন আহান মিও এসাদে খুৎতল পেইমতা...’ কথাহান লম নাইল। বসন্তই লগে লগে আংকরল,

‘ফুতিহানতে আনেছৎ?’ মাতানি ফাৎ নেই কলা ফুতিহানি মুংহানাৎ থদিল। বসন্তই গাহাকহানাৎ ফুতিহানির গজে ছবিহানি য়েকরে দিল।

‘আরতাতে নেই?’ বসন্তই বারো আংকরল।

কলা সেপহান পেইলু বুলিয়া আরাকৌ কতহান ফুতি মুঙে থদিল। বসন্ত বারো য়েকরাং লাগিল। কলা কাদাৎ বয়া তার য়েকরা ছবি গাকয়া চেইরী - মেইথংহান চেয়া মুকসিশৌ আহান দিরা -শিল্পীর কুনোতাদে লক্ষ্য নেই। মালিকা উবা অয়া কলার মেইথংহানর ভাব- আহির মিল্লেৎ কূপ করে রাহিয়া আছে। য়েকরানির থাংনাৎ কলা ফুতিহানি পুলকরিয়া উবা অইলী। তার শিল্প প্রতিভার তারিফ খানি করিয়া কুঠাগৎত নিকুলিয়া অইলী।

মালিকা ইম্পানি অয়া হিলর দৌগর সাদে উবা অয়া আছে। তেইর মনর রাজ্যৎ কালা বরনর চাকা আহান উদয় অইল। আজি প্রত্যক্ষ কলারে দেখল, মাতানিতে ফাৎনেই ছবিহানি য়েকরে দিল। অথচ তেইরাংতে হপনহান পারা। তেমজেইতে তেমজেইতে - আটতে আটতে আকেইহান পেইরী। তেই না গাকয়া নারল।

তেই আর খাংকরে নারল - পরীক্ষাৎ লামলী। কলার সাদে তেইও মুকসিহান দিয়া ফুতিহানি থদিল। বসন্ত মালিকার ইংগিতগ হারপেইল। মালিকার আহিগিদে চেয়া কঙালা অয়া মাংল,

‘দেনে আজি নাক - আরাক আকদিন।’ মালিকা আর হেইচা নাকরল। তার কঙালা হুদিগরে কঙালা শনর হুচিগর সাদে বিধা আহান দিল। কোনো কথা মাতে নারল আর - ইম্পানি অয়া নিকুলিয়া আইলী। বসন্ত ঙাকয়া ডাকদিল - ‘মালিকা!’ কিন্তুমান ডাকহানর রৌহান কানর ভিতরে যানার আগেই তেই মাঙ গেলীগা। বসন্ত খালকরিয়া আলথক চেয়ারহানাৎ বহিল।

হাণ্ডা আহানর থাংনাৎ মালিকা বারো আইলী। কুঠাগৎ হমেয়াও খাংতা কলারে দেহে বেলল। কলা বসন্তর কাদাৎ বয়া আহে আহে টটরাৎ লাগেছে। বসন্তর কিন্তুমান উবেদে খেয়াল নেই। দিশা আহানল মেইকখুগ অয়া ফুতিহানির গজে যেক্করাৎ লাগেছে। পেইরাক মালিকারে দেহিয়া কলা খানি দূরেই পারা অয়া বইলী। মালিকার চহা দৃষ্টিহানে কিন্তুমান খেয়াল থইল। কলাই তেইরে বহানিরকা মাংল, কিন্তুমান তেই উবা অয়া থাইলী। কুঠাগৎ পানি হমেইল পারা। কোনো শব্দ নেই। বসন্ত যেক্করিয়া লম করিয়া মুরগ তুলতেই মালিকারে দেহে বেলল।

‘হাঃ, তিতে কতিহান অইল আহেছৎতা?’

‘না এক্সাকা।’

‘উবা অয়াতে কিয়া? ব বেনাই।’

‘না এহানে নুঙেই আছে।’ মালিকা ইমে উবা অয়া থাইলী। কলা কিন্তুমান মালিকার মেইথংহান দেহানি ফাৎনেই খাংকরে নারল থানা। ফুতিহানি পুলকরিয়া বসন্তরাংত বিদায় লয়া উবা আইলী। নিকুলানির আগে মালিকারে বারেয়া মাংল,

‘মালিকা যিংগা আজি - ঘরে কামও জবর আছে হান্তে।’

মালিকা জুরাব নাদল। হুদা মুরগ লড়েয়া সম্মতি জানেইল।

দ্বিয়গির মন দ্বিবারাদে চৈঅছে। মালিকারে কাদাৎ পেয়া স্কেচ কতগ করতৌ বুলিয়া বসন্ত হারৌ আছে। কলারে বিদায় করিয়া সাঙইলু বুলিয়া ডিগল করে নিংশাহান বেলল। মালিকার মনহান তারে বেলেয়া সুমুদ্রর লৈলাট চেউর হাদিৎ সালছে। দিশা নেই আদিম ভাব আহানাৎ আপ্পানে পুড়ে যেইরীগা। কলার কাদাৎ চেপয়া বহানি, হারৌপা মুকসি - নানান ভাব নিংশিং অয়া জ্বলতে আছে...

জ্বলতে আছে... তেই বসন্তরে কুনোদিন কিংতাও না নিংকরেছে। কিন্তুমান কলার সম্পর্কর থাংনাং তেইর মনে নানান ভাব মাহেই শাতনি অকরল। কিন্তুমান কিয়া? বসন্তই কলারে তেইরাংত জিঙে বানাপার- যাকরের । এহান তেইরাং সন্দৈহান নাগই। তেই প্রমাণে পাছেহান। যেহানরে তেই মেৎতম আহানও খাংকরে নারিরী - তেমজানি নারিরী-বাছানিরৌ। কান্থিহানে হুৰাবুরা নারিয়া কুঠাগর এবেদেৎত হৌবেদে আপ্পানে আটে নিরীগা। আকফির ছবিয়দে চেইরী - আকফির খেস্তারেয়দে বসন্তরে।

বসন্ত হাতে হাতে চেয়ারহান এরেদিয়া সিগারেট আগ লাগেইল। মালিকা ইজ্জু গিয়া তার মুঙে উবা অয়া মাংল,

‘আজিতে কাম মাহেই আছে -মোর ফুতিহানি দে।’

‘অঃ তোর কামে লম নার। নিতেইগানাই খানি বনে।’

‘না।’

বসন্ত না ঙাকয়া নারল। তেইরে কুনোদিন এসাদে জুরাব দিতে না হুনেছে। আপাং অয়া তেইরে চেয়া থাইল। মালিকা তেইর ফুতিহানি নিকালেয়া আনল । ফুতিহানি সালকরিয়া তেই আরাকৌ সৌ অইলী।

‘হাঃ না য়েকরেছংথাং এবাকাও!’

‘অঃ পাঁচ মিনিটর কাম আহানল গইগ অছংতাতে।’

‘তোরাং পাচ মিনিট -মোরাং হাপ্তা আহান।’

বসন্ত না আহিয়া নারল। তার আহানিহান দেহিয়া তেই উল্টা আরাকৌ সৌ অইলী। আজি শেষ পরীক্ষাং লামলী। তেই ফুতিহানি টেবিল হানির গজে থয়া ইম্পানি অয়া বইলী। বসন্ত ফুতিহানি দেহিয়াও হারপেইল। তাপ্প চেয়ার হানাং বহিলগা। থিং অয়া তেইরে মাংল,

‘এবাকা নিতেগা?’

‘ই-’

‘আগেকার উতা ললকরিয়া লমইলথাং?’

‘বাছানে, উতা অইলেতে আরাক আকদিন নিসগা।’ বসন্ত সহজ করে তেমজেয়া মাংল। মালিকা মনে যেতা যেতা নিংকরেছিলী উতা আতে আতে পেইল। কুনো কথা নামাতিয়া ফুতিহানি মচা করিয়া উবা অইলী। বসন্ত লাঙয়া আংকরল,

‘হাঃ যিতেগা করে?’

‘হাই।’

বসন্ত পথগ থেপ করিয়া উবা অইল। তেইরে খানি জিংকরে চেয়া মাংল,

‘কিয়াতে সৌ অইলেতাতে।’

মালিকার হৃদিগ ভিতরে ভিতরে তাপিতই জ্বলিয়া আছে। বনর ভিতরর জিগ বৌহান চলানির লগে লগে লেলিহান সহস্র শিখা বনহান হাপদিয়া যেসাদে ভীষণ অংতা ধরের, ঠিক উসাদে বসন্তর কথাহান হুনানি ফাৎ নেই তেইর ভিতর বৃপহান সা সা করে নিকুলিয়া আহিল। কান্থিপকপী হরপ জেলাগর সাদে ফুস ফুস করে মাতে বেঙ্গ,

‘না আর দরকার না লাগতই। মি চিনিয়া হদেইলু – মোরে বুললে হুদা কালি কালি – কিন্তুমান কলাই মাতানি ফাৎনেই...’

কথাহান লমকরে নারল, কান্থিহানে কাদে বেলল।

বসন্তর গারিগ রমকাটা দিল। মুরগর চুল চপ চপ উবা অইল। তার কল্পনাৎ নেয়ছিল মূর্তিগ আজি দেখল। মেৎতমহানাৎ উপায় নাপেয়া আতহানাৎত ফুতিহানি আসুলদেনারকা আতহান ডিগল করল। কিন্তুমান ফুতিহানির লাগাল পানার আগেই তেই পেইরাক বৌহানর সাদে কুঠাগৎত নিকুলিয়া আইলী।

মালিকা নিয়াম সরলীগ কিন্তুমান কম জেদীগও নাগই। তেই আর বসন্তর কাদাৎ আহিতই বুলিল কুনো আশা নেই। বসন্তও কুনোদিন আহান তার মনর কথা তেইরাৎ মাতানিৎ নাযিতইগা। অথচ তানুরে বারো তিলকরে দিতাই উসাদে হাদিরতাও নেই। কিয়া বুল্লে দ্বিয়গির কৌলিহান দ্বিয়গি ছাড়া আর কুংগয়ৌ হার নাপাছি। উহানেতে বসন্ত তেইর আশা পুংথাক এরে দিল। উদিন তা তার তুলি, রং, চে, ফুতি কিতা পাজালেয়া উপুগর ভিতরে ইতু করল। আর আর কামে মনহান দিল।

হুৎতুমে করে দ্বিয়গির কৌলিহান মীমাংসার কুনো পথ না ধরল। চান্না অনার আর আশা নেই। পুংথাক ছয় মাহ দ্বিয়গির মেইথং দেহা দেহি নাইল। মালিকা কান্থি পকয়া, যারৌ করিয়া গেলেগাও কত দিন পিছে মনহান বারো থিং অইল। তেই ভিতরে ভিতরে অনুতপ্ত অইলী। মনে মনে দেহানি মনেয়া ঠিক ঠাক অইলীক পুরি লাজপেয়া বারো আলথক অইরী। কিয়া বুল্লে নাযিতেগা নাযিতেগা লাজহান আরাকৌ নিয়াম অপরিলাগা – আর যানা নারতে নারল।

যেদিন মালিকার বিয়া লেপইল উদিন তেই নুরা চিন্তাৎ বিভোলা অইলী। নানান ভাবর রাজ্যৎ তেই খেলেইরী। হুৎতুমেও বসন্তরে উনা নায়া ঘর পাৎতইগাতা? নিজরে তেই আংকরিরী। যেগর লগে কনাকেৎত তিলয়া আহিরী – নানান যারি, খেলা, যারৌ কততা! যেগরে নাদেখলে থা নারল। যেগর তুলিগর আছুল আকেইহানাৎ সৃষ্টি আকেইহান সম্ভব অছিল, যেহান তেই মুখ আহিগিল চেয়া অছিলী। আজি তুচ্ছ কারণে হাবিতা ছেৎ আহানাৎ তুপ করে দিল তেই নিজে!

খাংকরে নারিয়া নীরত ফাম আহানাৎ বয়া আহির পানি পুছে পুছে খালকরিরী।
হাতে হাতে বিয়ার দিনহান কাদাৎ ফৌঅইলগা। তেইর মনহান আরাকৌ
তাপিত্তর জিগল ডহানি অকরল। তেই আর কিসাদে বসন্তর মুঙে উবা অইতই!
চিন্তার থাংনাৎ চিন্তা -কুনো পথ নাপেইল।

আকদিন কলা তেইরাৎ যৌঅনিৎ বুলিয়া আইলী। নানান কথার হাদিৎ মালিকা
বসন্তর কথা আনল। কলা গাকয়া আংকরল, 'হাঃ তিতে উনা নাছৎথাৎ হাদি
এহানাৎ?' মালিকা কলার মেইথংহানর ভাবহান দেহিয়া উতলা আইলী।

'কিতা অছেথাৎ?' কলারে কুপকরে চেয়া আংকরল।

কলা নিংশা আহানাৎ মাংল, 'আজি দ্বিমাহার চুরা নুরারা অয়া ঘরেৎত
নানিকুলের। আগর সাদে ছবি কিতা য়েক্করানিয়ৌ নেই। আকদিন গিয়া আহান
য়েক্করানিকা কতি হেইচা করতু -নাকরতে নাকরল। আগর বসন্তদা নাগই।
এবাকা তারে চানা মানে কাল বৈশাখী চানাপারা।'

কথা আকেইহান মালিকার অন্তরগরে লিশিং লিশিং তাসেলর সাদে বিধানি
অকরল। কলারে বিদায় দিয়া ফামহানাৎ আশ্রয় লয়া বারো নানান চিন্তাল
বিভোলা আইলী। তেই উনা অনিরকা খালকরে নিরীগা। খামতলে তেই হাবি
লাজ, দুঃখ, যারৌ আকবেদে সেচেয়া বসন্তরে উনা অইতৌ বুলিয়া উবা আইলী -
আর আংচিল নাইতই।

মাদানকার সময়হান। বসন্ত লেরিক আহানাৎ মনহান দেছে। খাংতা শব্দ আহান
পেয়া আহিগী বুলেইতেই কল্পনাৎ নেই ছবি আহান দেখল। দ্বিয়গির আহি
পড়াপড়ি অইতেই আগই লাজহানে মেইথংহান তলেদে নঙেইল - যেসাদে
বেলিহানর মিঙালহান পানার লগে লগে থাম্পালগ নঙিয়া তলেদে চেয়া থাইরী।
বসন্ত তাপথা অয়া চেয়ারহান এরেদিল। বেতর মোড়া আগ মুঙহানাৎ থদিয়া
মাংল,

'উবা অয়াতে কিয়া? ব বেনাই।'

কিন্তুমান তেই নাবহিলী। ইমে উবা অয়া থাইলী। পেইরাক ঘরগর চারিয় বারার
ছবিয়েদে মিল্লেং করল। কুনো নুরা ছবি নাদেখল। তেইর বুকগ দুক্‌দুক করানি
অকরল। বসন্ত আটে আটে তেইর মুঙে উবা অইলগা বারো সেচিয়া খানি
দূরেইং উবা অয়া তেইর লাজহানে রাংবারি দেছে মেইথং উহানাদে চেয়া মাংল,
'মালিকা - তি যে অইতেই এহান ঠাচা নাকরেছিলু মি। যেতাউ অক তি যে
মোরে নাপাহুরেছং উহান আজি হারপেইলু। ঈশ্বরে তোরে হারৌ করক - নুঙেই
করক। কিন্তুমান মোর গজে কুনো দুঃখ নাথইছ। মি তোরে কিয়াকা নাইকরিয়া
আটুরেইলু উহান আজি প্রকাশ করিং। কিয়া বুললে, এ জীবনে তোরে আর

মাতানির সময় নাও পেইতৌ। আজি ঈশ্বরর ইংগিতে যেমন এ সেপ এহান পেইলু। তোরে হিন দিলুতা মোর কারণ আহানাৎ। তোর ছবি হানি য়েক্কে দিলে মোর এপেইৎ নাইতেই বুলিয়া -কিয়া বুঞ্জে, মি আর্ট করিং বুলিয়া কামে ধরলে দিন আহানাৎ বছর আহান ললকরে পারতেইতা য়েক্কে পারৌরি। কিন্তুমান তি বছর আহান নাইলে মোর স্টুডিয়রমা দলাগ ক্ষতি - উহানে হিন দিলুতা। বারো কলারে আহানি ফাৎনেই বিদায় করে দিলু - মোরে নাবেরাক বুলিয়া।' বসন্ত হিনপা হিনপা জিরা জিরা কুনোমতে কথাহানি নিকালেয়া তেইর বারাদে পিঠিহান দিয়া কত কাকেই কারিয়া তেইরাংত দূরেই অইল। কুঠাগর ছবিয়েদে খানি আহান মিল্লেং করিয়া, মালিকার উবেদে বুলন দিতেই দেখল - তেই মুরগ নঙেয়া মাটিহানাৎ বয়া আছে।

'হাঃ মালিকা, মাটিহানাৎ বয়াতে কিয়া?' তুরা অয়া তা কাদাৎ চেপইলগা। মালিকা থক্ক বারো উবা অইলী। দেহগরে তেই ধরে নারল। খুটি আগৎ গুয়া থাইলী। বসন্তর গারিগও পাহাৎ করে নেরগা - তাও তেই গুছে খুটা উগৎ ধরিয়া কুনোমতে উবা অয়া থাইল। কুনোমতে ডাক আহান দিল, 'মালিকা!!'

কুনো জুরাব নাপেইল। জুরাবরমা পেইলতাই আকফুটা তপ্তা আহির পানি। যে ফুটাগ তার আতহানাৎ পড়ানির লগে লগে তার অন্তরগ হাবি চিলা চিলা অইল। মালিকা মুরগ তুলিয়া বসন্তরে আকফির চেইল। দ্বিয়গির আহি চেইৎক পড়াপড়ি অইতেই তেই বারো মুরগ নঙেইল। বসন্ত তেইর তিঙা, রাঙা থামপালগ পারা আহি উগিদে চেয়া আর থাকেবাকে নারল। তা দূরেইৎ সেচানিরকা দ্বি কাকেই দিতেই মালিকা ইম্পানি অয়া নিকুলিয়া আইলী।

বসন্ত পিছে পিছে আটিয়া আহিল। মালিকা হাতে হাতে দারিগ বেলেয়া উঠানহানাৎ ফৌঅইলীগা। তা দারিগত হিলর মূর্তিগর সাদে উবা অয়া থাইল। জাঙহানি চলানি নাকরল। তেইরে আকফির ডাহানির হন্না করল, কিন্তুমান অদৃশ্য হক আগ আয়া খামতলর রৌহান পেয়া নিকালানি নারল। হুন্দা জিংধরে আহি দ্বিয়গিল চেয়া থাইল-

অস্তাচলর বেলিহান পশ্চিম দিগন্ত হাপদিয়া আবিরল হোলির খেলারমা বিভুলা। হমবুকুৎ সূর্যদেব রকতর সাদে রাঙা অয়া আবিরর হেইরাপ মিঙাল সিতারাছে। গাছর হাদিয়েদে আতর তারা দ্বিয়হানিল মেইথংহান গুরিয়া মুরগ নঙেয়া মালিকা হাতে হাতে কাকেই বেলেইরী। বেলিহানর ঠুমপা মিঙালহান আয়া তেইর পিঠিহান মাঠিয়া দের। তাল্প তাল্প রঙিন কাপেটর টুমাহান বসন্তর দৃষ্টিত মাঙ গেলগা। শিল্পীর চিত্রপট সেইক্ষাৎ আহির মুঙে মুঙে অদৃশ্য অইল।

আরি

নিজরে মানুরাং বরি করে দেহুরানি এহান প্রায় হাবি মানুরে পুংনিংহান দিয়া মনেইতারাহান। বরমংগলরাং এ বরি অনির আশা এহান রঞ্জআগ কম নেয়ছিল। বরং নিয়াম হে বুলানি যাকরের। মুটার বাগা ডাম আহানাৎ তা মহাভারতহানলো বহের। আহিগিৎ আনকহান লাগেয়া তা হুৎতুমে করে ঔ লেরিক উহান থিকরের উগরে ডাঙরিয়াগ নাবুলানি কুনো ক্ষেমতা নেই। উতার থাংনাৎ আরাকও কত কাম। যেতাৎ তা নাইলে সুপ নাচলের। যেমন ধরিক, শৌ লেপ নাইতারা বহকলকেই, মুনিশৌ নাপাছি মালক লকেই, বিয়া নাছি নিঙলপী গিদেই - এতাহাবির বিপদ-তারণ-কারণ অইলতাই বরমংগল। তানুর দশার কাম, গ্রহ শান্তি, মানুর আত, যাদু, দৌর বারি কিতা কিতির বন্ধন খন্ডন করানি তা নাইলে নার। উতার থাংনাৎ, শৌ নুরারার চাপাল, নুরারাগ জবর অইলে খইতৌ বাধানি, ঠৈ কিতা চৈ অইলে ঠৈ ডাহানি, আত জাং কচকিলে থৌ সলকরানি - কত কিতা। হুদা এতাই লয় নাছে, গণাবাছা বারো আত চানাতও কম হেইনাগ নাগই। আরাকৌ খানি আছে। মেইপারল। হাবির খামতলে অইলতাই তার পাণ্ডিত্য। রামায়ণ, মহাভারত, চৈতন্য চরিতামৃত কিতাকিতির অর্থ দেনাৎ তা বার্তন পার। এতা হাবি গুণে বরমংগল পালয়া আছেগ। উহানেতে তা যে সাধারণ মানুর দলাগ গজে আছে এহান মানুরে তারে নামাৎলেও তা কিত্তুমান হবা করে বৌপার।

কিত্তুমান ঠেকাহান অইলতাই আকহান। খেতির বি বুলতে টুমা আহানও নেই। লেইরা অয়া চলের। তেব ইশ্বরর কৃপায় থতাহানতে বন্ধ নাছে কুনোদিন। দুগ শৌ বারো মইলকরে খেতিং নালামেয়া চলে পারের। ঘরেৎত নিকুপ্পেই রূপালো অরং অরং। কিয়া বুপ্পে তা কুনোদিন বড়ি আকগলো শিকারে না নিকুলের। তার দলাগ বড়িং নানান মাচেলর মাচাক। মেইপারল, কবচ, চাপাল, আত চানা,

ঠিক চানা কিতা কিতি মাচেলর মাচাক আগৎ না আগৎ শিকারগি থেঙনি লাগতই। এহান তা নিয়াম ফাৎকরে হারপাছে।

এবাকাতে হুদা আনকহান আহিগিৎ দিলেই না চলের। আনকহানর গুরুত্ব নিয়াম করতে গেলেগাই লগে উপযুক্ত কলর আরি আগ কাদাৎ লিংখাৎ অনি লাগের। ঔ আরি উগর লগে চুহিগ সংযোগ করানির থাংনাৎ থতাহানাদে ধূমার কুন্ডলী নিকালেয়া কথার জুরাব দিলেহে ওজনহান থারতানাই - নাইলেতে হাবিতা ফরসা। এ ছবি এহান হনুমানে রাম-সীতারে যেসাদে হুদিগৎ থছিল উসাদে তাউ নিয়াম নিংকরিয়া খেৎকরিয়ারগাই থছে। মানুরাং কথা এহান পাতলা অইলেও বরমংগলরাংতে জবর ডাঙর চিন্তাহান। আরি আগ তারতা যেসাদেউ লাগের - লাগের। কিন্তুমান কিসাদেতে যোগাড় করানি? নিজে লনাতে এজনমে নাইতই। ধনলো কুনোদিন কুলা নারতই। কিন্তুমান তারতা লাগের। মনর এ আশা এহান থুংকরানিরকা নানান ফিকির বিসারেয়া থার। রাতি আহিৎ ঘুম না ধরের - ঘুমজের মলপাকগ ভীষ্মর শরশয্যাহান অর।

যেদিন কাবকনুগাছিরাং বুলাৎ গেলগা উদিন বরমংগলর মনর রাজ্যৎ বৌবলুনিরগর সাদে চিন্তা আহান বুলানি অকরল। পইলা ঘরে হমেয়াও খুটির চকিহানাৎ থছি কলর আরি উগদে পাংখাক তার দৃষ্টিহান পড়ে পড়িলগা। তা আহির পট নামারিয়া খানি আহান চেয়া থাইল। আরিগর দৃশ্যহানও চানার দেখিহান আছে। আন্দুকা রঙর প্লাস্টিকর চুহিআগই কালা ডাহুনি উগরে 'তি তরু মি লতা' বুলিল ভাব উহানল খাজুরাহর মিথুন মূর্তিগর সাদে কলকরিয়া থছে। আরিগর ঔ মোহিনী রূপ দেহানি ফাৎনেই তার নিংশাহান পিংগলা নাড়ীয়েদে বুলন দিল। তা নাকগৎ আতহান দিয়া শ্বরফামহান চা বেঙ্গ পেইরাক।

'অবাই ইপু, কুম্বাকা আইলেতা? ব বেনাই।' খাংতা কাবকনুর নারগ হুনিয়া বিভোলাহান বাগিল। লগে লগে তেইর কথাহানর জুরাব দিল, 'হিঃ আপাংপী তি কিতা হারপেইতেই - এ আরি এগ দেহানি ফাৎ নেই তিলোত্তমার বাপকরে নিংশিং অইলু। অঃ ইশ্বর, হবা মানু এতা তুরায়া মরতারা, জিংতা নাইতারা নিয়াম দিন। আঃ কিসাদে মানুগ আছিলতা! আদপে বচনে ফাজায়েনে।' কথাহান লয়করিয়া তা বেতর মুড়াগৎ বহিল। কথাহান হুনানিয়ে কাবকনু মুরগ নঙেইল। হেয়কর প্রশংসা তারাং হুনিয়া তেই মেৎতমহানাৎ কঙালা অইলী। মনে মনে ডাঙরও খানি অইলী। লগে লগে জিলক তিলত্তমারে ডাহিয়া তুরা করে হজক

গুরা পানা দেনারকা মাংল। তেই নিজে চাহা রাধানিং হমেইলীগা।

তিলোত্তমা বাপকর কলর আরি উগলো হজকারি মুংহানাং খদিল। হারৌহানে তা টিকিগ ফুআহান দিয়াও চুহিগ ওঠ দ্বিয়গির হাদিং দিয়া বেলেয়া ধূমা আসুলানি অকরল। ধূমা নিকুলতে না নিকুলতে কাবকনু চাহা খেরি আহান মুঙে মাটিহান লেপিয়া খদিল। বরমংগল ব্রহ্মাডগর হাবি বর খমকরিয়া মালক জিলকর গজে ডালানি অকরল। তার তাংগর ইচেলগরমা মালক জিলক বাহানি অকরলা। তাং দিল মাহেই জেলেইর মনহান মমগর সাদে গলের এহান তা দলাগ দিন আগে হারপাছেগ। উহানেতে লেইহান হারপেয়া জাত জাত হজক বেলানি অকরল। খামতলে তা খৌরালগং খছিল একাঘাতি কার উগ জিলকর গজে এরেদিল, 'মোর ইমা এগর লেইপাকহান ফারেনে। কিন্তুমান -'

'হাঃ ইপু কিতা অছেথাং?'

'না আজি থাক।' তা গারি বেলেয়া মাংল।

'না ইপু, কুনোদিন আহর ঠিক নেই - মাতিলহান অইলে আজি মাং।'

বরমংগল শিকারগর অবস্তাহান হবাকরে হারপেইল, তাপ্প আনকহান জেপগৎত নিকালেয়া নাকগর গজে সংস্থাপন করিয়া থতাহানাদে ধূমা নিকালা নিকালা মাংল - চেইকতা তোর আতহান।

লগে লগে তিলোত্তমা আতহান সমজা দিল। তা কুপকরে আতহানর রেখা ক্ষেত্র , তেরার চিন, বজ্রর চিন, আঙুলির পাপ, নকর রং, আঙুলির মুদ্রা কিতাকিতি চানা অকরল। তিলোত্তমা তার কথা হুনানির আশাই বাছাকাছা নারিয়া থাইলী। তা উহানও মিল্লেং করেব। পইলাই তা মালকরে বাবেয়া মাংল, 'কাবক খানি পিছে আহিছনে।'

লগে লগে তেই তার মুঙেৎত নেয়ইলী। এবাকাতে আর চিন্তার কারণ নেই। হাতে হাতে ফলহান মাতানি অকরল, 'তোরতা ইমা হাবিতাও হবা, কিন্তু তোর শনির ফাম এহান নিয়াম সাক্তি। এহানলো তোর কুনো কথা চললেই অইতই অইতই বুলিয়াও নার। জোড়া লাগিয়াও না লাগের। কত হবা ফাম আইতারা - কিন্তুমান ছেদরগুরিং ফরসা। মুলে এ শনি গিরক।' তিলোত্তমার মেইথংহান গম্ভীর অইল। কুনো আহান জুরাব নাংল। তা যাতেয়া আংকরল, 'মাং বেনাই হাইহান না নাগইহান।'

'হাই ইপু।' তাপকরে জুরাবহান দিল।

'হিঃ আবেরী, বরমংগলে কী আপ্পানে মাতেরতা? এতাতে কীতা -মোহিনীর

জিলকর বিয়াতে মিহে লেপকরে দিলুগতে। রামবাবুর মইলক শৌ নায়া আছিলী
উগরে জড়িগ দেনাই মা উহানাৎ সট। ঠাচা নাকরলে আংকরিসগা। উগর থাংনা
গন্ধরাজর মরণ ফাঙছিল শৌ উগর উসেল সিলকরে দেনার দ্বিদিনর ভিতরে
দাবদানি অকরেছিল - হুঃ কতি য়ারি - কতি হুনতেইতা - মোরে নাচিনেছৎ
ইমা - নাচিনেছৎ।'

তার কথা হুনিয়া তেই নিজরে পাহুরে বেল্প। মুঙে সেইক্ষাৎ দৌগ দেখলপারা।
তেই আরাকখানি তার কাদাৎ চেপয়া মাংল, 'ইপুরে পানা এহানও লেইপাকহান
বুলতে অবিশ্বাসর কথাহে মাতর।'

বরমংগল চুহিগ আরিগৎ থয়া ডিগল করে নিংশাহান বেল্প। খানি আহান ইম্পানি
অয়া থাইল।

তিলোত্তমার বিয়ার কথা আহান তা হুনেছিল। তম্বীর পুতক জগতরকা কাবকনু
কতদিন হন্না কেরেছিলী। কিন্তুমান বাপক নেয়নির সালেদে তম্বী বিয়া এহানাৎ
খানি হাংকৈ আহান অয়া আছে। পাত্রগ হিসাবে জগতরে পানা কিন্তুমান নিয়াম
ভাগ্যর কথাহান। তা এহানরে ভিত্তি করিয়া আগুরান অনা অকরল। তা তাপ্থা
অয়া মাংল, 'দক্ষিণর বারাদে শুভ কাম এহান অনার কথা কিন্তুমান
খানিপ্পারাৎ...'

'ইপু কিসাদে করলেতে কাপানি য়াকরতই?'

'তিলোত্তমা লাজ উরা বেলেয়া এহান পেয়া ফৌঅইলীগা। তা আর ডিল নাকরল।
তেইরে পথগ দেহুরা দেনাৎ উবা অইল। হাতে হাতে বারো অকরল,

'গ্রহ শান্তি আহান করলে এ ফাল্লুন লাল নাইতই।'

'শান্তিহান করেদে বেনাই ইপু।'

'অঃ দলাগ খরচ - তি আপ্পানে হিন নাপেই।'

'ইপু বৃপারতে কি চিন্তা - কামহানহে করেদে। বরমংগলে দেখল তার লৌশিং
বৃথা নাগেলগা। মনে মনে তার লৌশিং হাবিরে তা তারিফ করল। তিলোত্তমারে
দলা চে টুমা আহানাৎ পূজার মাচেল ইকরিয়া থনারকা মাংল। তেই লংলেইগর
সাদানে ঘরে হমেয়া চে টুমা আহানে কলমগই নিকুলিয়া আহিলী।

বরমংগল মাচেলর নাং মাতের, তেই ইকরিরী -

'পাচ জাত ফুল, এইরা পাচ তাংখা, নীলুরা ফুতি, খৈ পাচ মুঠি, কলা পাচ কান্দা,
চিরা পাচ পৌরা, পইসা পাঁচ সিকি, মধুর, ঘি, ধান পাচ কাঠি,' মাতিয়া খানি
থামিয়া খাংতা বারো মাংল, 'অঃ আরাক মূল জিনিষ আহানতে নাও মাতেছুহে-'

‘ইপু কিহান থাং?’

‘আরি আগ লাগতই।’

‘হাইদে নারিকলর আগ দিতাঙাই নাই।’

‘আঃ উসাদে নামাতি - গমনেই। কীজাত মানু খৌরা দৌগ, তারাং খেলি মেলি অনা নাকরের।’

‘হাঃ ইপু, নারিকলরগ গমনেই হান্তে কিতাতে...’

‘দূর আবেরী, দৌর কামে ধাতুর জিনিষ নাইলে নার।’

‘হানতে ইপু কলর আরি দেনা।’

‘উম্।’ তা কথাহান ডিগল নাকরিয়া অঙ্কর আগৎ লয় করল। কিয়া বুজ্লে তা হারপার, আরিগ পেইতই। বিয়া নাছি নিঙলপীরাংত পারিলতা আদায় করানির লৌশিং তার নখগর আগাগৎ। তিলোত্তমা খানি খালকরিয়া মাতানি অকরল, ‘ইপু কলর আরি নুরাতা নায়া পুরানাতা য়াকরবতা?’

‘ধাতুর জিনিষে কি মাঙরথাং? বরমংগল জুরাব দিল। তিলোত্তমা খানি আহান খালকরল। আকবেদে বাপকর সাংহান দেহানি পারা করে থনা - আরাক আকবেদে জগতরে বেলানি। আরিগর মায়া বেজ্লে জগতরে পানা। শ্যামরে ধরতু না কারে ধরতু। খামতলে তেই জগতরে ধরানি মনেইল। তেই আরিগ দেনাং লেপইলী।

‘ইপু, উহান অইলেতে এ বাবার আরি এগল চা বেনাই।’

‘অইতই।’

‘কুনোদিনতে ইপু?’

‘যে কুনো ঠাংচার দিন আহানাং।’

‘উহান অইলেতে ইপু, আইব ঠাংচাং সৈ নাক। বরমংগল আনকহান কারিয়া যেপগৎ থইল। হজকারি হবা করে আসুল আহান দিয়া বং বং ধুমা নিকালেয়া তাম্ব মাংল, ‘মি রাতি আহিতৌ তি হাবিতা লিংখাং করিছ - এবাকা যিংগা মি।’ তা উঠিয়া ঘরেদে সালইল।

ঠাংচার দিনে কামহান করিয়া বরমংগল আরিগলো ঘরে হমেইলগা। ঙাঙ্ল ভাত পানি খেয়া ফামহানাং পড়িলগা। ডাঙর করে হজক আন্ধারি লাগেয়া তা ঘুমজে ঘুমজে ধুমা নিকালানি অকরল। জীবনর আকহান আশা আজি থুংকরল। হুংতুমেও নিংশিং অনার দিনহান আজি। আকখুলাগই আপন মনে আহে আহে

খালকরের। কিন্তুমান জগতর লগে বিয়াহানতে সামকরে দেনা লাগতই। বারো উহানিতে কিহানথাং? বরমংগল আতে হাবিহান কুরু সুমইতাই। তা মনে মনে খালকরিলতা খালকরিয়া ঘুমজিল।

বিয়ানে ঘুমেৎত উঠিয়া তা মুরগৎ কৈয়ৎ আহান বাধিয়া - হবাকরে কলর আরিগৎ হজক আন্ধারি লাগেয়া - তমালর কাটা আলা বেকা লাঠি আগ ধরিয়া তম্বীর ঘরগদে ধারা করল। পেটগৎ লৌশিং থ্যা থতাহানাদে ধূমা নিকালা নিকালা তম্বীর উঠানহানর মুঙে ফৌঅইলগা। তম্বী তারে দেহানি ফাৎনেই মুকসিহান দিয়া ঙ্করল। তারে খুটির চকি আহানাৎ বহুয়েয়া তেই তাপ্প আংকরল, 'ইপু, বিয়াত্ততে কুংবারার দৌ মরিয়া?'

বরমংগল কূপকরে তেইর মেইথংহান চেয়া মাংল, 'তুমিহে আমারে নিংশিং নারাইতা - কিন্তুমান আমিতে তুমার হবা সাক্তি আহান মিল্লেং নাকরিয়া নারিয়ার।'

'খানি বিপদ কিতা দেখলেথাং ইপু?'

'উহানেহে বিয়াত্ত ফৌঅইলুহানাই - মনহানাৎ শান্তি নেই।'

'ইপু কিতা অছেথাং?' তম্বী লাঙয়া আহিগি বাহিয়া তারে চেইল। তা মুরগ হেইরাপ তলেদে নঙেয়া মাতানি অকরল, 'কালি রাতি হবানেই হপন আহান দেখলুতা। মইষ গুট আহান খেদে খেদে নেউরিগা বুলিয়া। এসাদে মইষ খেদানি এহান নিয়াম সাক্তিকো।'

তার কথাহান তেইর কানহান পর্দাহান ফাটেয়া হমেইলগা। তেইর গারিগ রম কাটা দিল। কুনো রকমে তারে হমা দিয়া মাংল, 'মোরাং মাতিয়া ইপু কিতা লাভ - ইপুয়ে কিহান করানি থকরতা করেদিয়াদে।'

তা মনে মনে বারো আহানি অকরল। হাবিতা জাতা দিয়া অন্য কথাং পড়িলগা। 'বাছাহে উতালো হিন নাপেই। মি থাইতে কুনো হিন নেই। মরণতে ঈশ্বরর আতরহান - মানুরে করিলতা কিংতাও নেই। এবাকাতে হাবিতা থ্যা বহক আগ আনিয়া নুঙেই অয়া থাক। তোর লগরতাই নাতি-নাতল পিঠিং বাধিয়া আটতারা। তুমি কইনা বিসারতে বিসারতে জম্মু দ্বীপ এগ ছাকলাই। কিন্তুমান হারপেইছ, নিয়াম বাছলে কানা নেই। লেইখাং পড়তারাই।'

'না ইপু উহান নাগই, তা বিয়া করানি নাকরের এবাকা।'

'অহোঃ উহানিল - তার ক্ষেমতা আছে - বিয়া নাকরানি।'

‘ইপু করুৱা পাৱতেইথাং?’

লাঠিগ মাটিহানাৎ ঠক কৰে বহুয়েয়া - খুটি চকি হানাৎ বুকুৰ আগ লাক্কৰিয়া
নংশাগৰ সাদে হুংকাৰ দিল, ‘মোৰ আতে বেলাদিলেতে - আজি বুদ্ধে আজি।’

‘হে ইপু তি যেহান মাংতেই উহান। বিয়া দেনাৰ থাংনাৎ ইপুৱে দশআতি
ফেইচম আহানলো হমা দিতৌ।’

‘ফাৱে ফাৱে, নুঙায়েদা - এতাহে জাতিলা নিঙলৰ কথা নাই।’ বৰমংগল হবা
কৰে ফংহান ঠিক ঠাক কৰিয়া ঘৰেদে সালইল।

বৰমংগলৰ কথামত তম্বী হজক ঠাক আহান খেয়া নুৱাৱা অয়া পড়লী। অবশেষ
তা যেতা কানে মন্ত্ৰ দেছিল উতা তেই পুংখাক পালন কৰে কৰে যেইৱিগা।
পুতক জগৎ মালকৰ টেলিহান পেয়া ঘৰে ফৌঅইল। ঘৰে আহিয়াও মালকৰ
অবস্থাহান দেহিয়া ডাঙৰ ডাক্তৰ আনানিৰ সিজিল কৰল। বৰমংগল নুৱাৱাগৰ
কাদাৎ বয়া তেইৰ মিহুল পৰীক্ষা কৰেৱ। তা দুৱাদে নিকুলিয়া জগতৰে ডাক
দিল। জগত কাদাৎ আহিল। বৰমংগল মেইথংহান গম্ভীৰ কৰিয়া মাংল, ‘বাবা
ডাক্তৰগ আনিছগা। মিহুল খানি চৈঅছে পাৱা - এবাকাতে মনে আশা কিতাকিতি
থাইতে পাৱে, আকফিৰ... হাট, মিও থাইতৌ।’

জগতৰেল তা মালকৰ কাদাৎ বহিলগা। বৰমংগলৰ ফাপগৎ জগৎ আপাং
অপড়িলগা। তাৰ কথামত চলতে তা হাংকৈ নাইল। বৰমংগল তম্বীৰে ডাকল।
তম্বী আহিগি মেলিয়া আকফিৰ তাৰে চেইল। দ্বিয়গিয়ে আহিল মাতামাতি
লয়কৰলা। তা তম্বীৰে মাংল, ‘তম্বী এৱে জগতও আহিল। থাইতে দ্বি আক কথা
হুনানি থকৱ। তোৱ মনৰ আশা কিতা থাইলেও মাং, ‘না লুকেই মি আছু।
যেহান মাংতেই উহান কৰতৌ।’

‘হাই ইপু, বহক আগৰ মেইথংহান দেহানি মনাউৱি।’

‘কাৱে লেপকৰেছং মাং বেনাই।’

‘হাই এৱে কাবকনুৱ জিলক তিলোত্তমাৱে - মালক উগই দিবানিশি গেৱেং
গেৱেং কৰিয়া লাগেছিলীতাই...’

‘তেস - লয়ইল - হাংকা ৰাতি দেখতেই। সুপ না খালকৰি।’ বৰমংগল জগতৰে
আকফিৰ চেইল। জগৎ লাজপেয়া মেইথংহান তলেদে দিল। বৰমংগল মনে
মনে মাংল - বাছা কুকীৰ ফংহানাৎ বেঙ্গুতাৱ মাজে - বিয়া নাকৰিয়া ক্ষেমতা -
তা দুৱাদে নিকুলিয়া জগতৰে ডাকদিল। জগত নিকুলিল।

‘হুনলেনাই বাবা তোৰ ইমার কথা।’

‘ইপু হাই কিত্তুমান কিসাদেতে?’

‘হিঃ কিতাৰ বিয়া – হুদা মেইথংহান দেহানিরহে কথা নায় – বিয়া এহানতে মাংতে গেলেগা লোকাচারহান – হারপেইলে?’

জগত লাজুৰাগ। কুনো জুৰাব নাদল। তাৰ মনৰ ভাবহান দেহিয়া বরমংগল হারপেয়া হদেইল। লাঠিগ আকফিৰ মাটিং বাৰেয়া জগতৰে হুনুৰেইল, ‘বাবা সুপ না খালকরি। মি হাবিতা ঠিক করতৌ। তি ইমে বয়া থাক। ডাক্তর আনিয়া লাভ নেই। এবাকা ঘৰে গিয়া তেইৰ উছিল হান ছিলকরে দেনাই কালি হানাং খারাং। বাবা মোৰ নাঙ বরমংগল – যেহান মাংতৌ উহান করতৌ। কথাহানি লয়করিয়া ঠিকঠাক করিয়া ঘৰেদে সালইল।

ৰাতি তিলোত্তমারেলো বরমংগল হুংতুমেও হমেইলগা। লগে কাবকনু। তম্বী তাৰে চেয়া চেইংক মুক্সি আহান দিয়া মেইথংহান বুলেইল।

বরমংগলে মাতেৰ, ‘এৰে চা, তোৰ বহকর মেইথংহান চা – কইতে তিলোত্তমা – তেইৰে হমাদে – জাঙৰ ধুলি ল।’

‘তিলোত্তমা হমা দিয়া জাঙৰ ধুলি লইল। তম্বী আহিৰ পানি বেলেয়া মুরগ মাঠিয়া দিল। বরমংগল আর ডিল নাকরল।

‘তিলোত্তমা, লাজ নাপেইছ – মূলগরে হমাদে।’

সাপুড়িয়াগৰ মুঙে হরপগ যেসাদে ফনাহান নেইকরিয়া তুমিল অর জগৎ গিরকও আজি বরমংগলৰ মুঙে হিলগৰ সানে উবা অইল। তিলোত্তমা জগতৰে হমা দিয়া জাঙৰ ধুলি লইল।

বরমংগল লগে লগে চুহিগৎ যৌকরিয়া আছুল আহান দিল। আছুলহানৰ চোটে টিকিগৎ জিগ লাগেছিল। তাপ্প তাপ্প আরিগদে চেয়া মুক্সি আহান দিল।

বিষ্ণুপ্ৰিয়া মণিপুৰী সাহিত্য সভাৰ মুখপত্ৰ

আবিষ্কার

শিলচর মেডিকেল কলেজর ১৫ নং কুঠাগর মুণ্ডে উবা অয়া গোপাল মিকুপ আহান তালাং তালাং অয়া বারাদে চেইল। বারো কিহান আহান খালকরিয়া বারাদে আর আর নুরারার কুঠা চেয়া চেয়া আটানি অকরল। মনহান থিং নেই। আলথকবারি বারো উবা অইলহা ১৫ নং কুঠাগর মুণ্ডে। ঠক্ ঠক্ করে আঙুলিগলো বারি দুহান দিল। দুরারহান আঙইল খানি থায়া। যোগেন্দ্র দুরাদে নিকুলিয়া গোপালরে দেহিয়া নিংশাহান বেঙ্ক পারা।

যোগেন্দ্র হারৌ অয়া মাৎল, 'জিংতা করলে, কতির চুরা আর কাদাং বয়া থাইতু। এবাকাতে তি খানি আহান সিলকর, কাদাং ব - মি খানি আহান দুরাদেৎত আহিংগা।'

গোপালর 'না' বা 'হাইদে' শব্দ হুনানির প্রয়োজন না নিংকরল, ইজ্জু দুরাদে কাকেইহান দিল যোগেন্দ্র। গোপাল কুনো আহান নামাতিয়া তাপ্প দুরারহান চেপকরিয়া নুরারাগর কাদাং চেয়ারহানাং বহিলগা। অচিন ডর আহানে বুকগ দুকদুক করানি অকরল। খাংতা হুরাবুরা নারল পারা - চেয়ারহানাংত উঠিয়া ডিগল নিংশা আহান বেলেয়া কুঠাগর ভিতরে আটানি অকরল। চপ্পল বারো অস্থির মনহান। চেয়ারহানাং বারো বহিল। এখুরুম মনহান খানি দরা করিয়া নুরারাগর মেইথংহান চানার হম্মা আহান করল। পইলাই আহিগি পড়িল রইদর তাপে উমাহিজা সিংগারেইর সাদে ক্লান্ত মেইথংহানর গজে। কাপকলেইগর সাদে দলা তুল্‌তুলা ফাম হানর গজে দলা ফুতিহানলো জাপদিয়া আছে দেহগো - আহিথম জিপেছে, মলগর বারাদে সিতারেয়া পরেছে হেইফি নাইফি চুল কতগাছি - নুরারাগর ক্লান্ত দেহগর লগে ক্লান্ত অয়া পড়িয়া আছি পারা। যতই কূপ করে চার ততই হুদিগর ভিতরে অজানা বৌবরণ আহান বহানি অকরলপারা। আর খাংকরে নারল - চেয়ারহান এরা দিয়া উবা অইল, বারো আটানি অকরল। সিগারেট আগ লাগেয়া ধূমা এরে দিয়া আপ্পানে ফরদিয়া যারগা ধূমা চেয়া চেয়া

থাইল। অশান্ত হৃদিগর বৃকে অজানা ঘটনাপুঞ্জর বৌ আহান খাংতা সন্ধরিয়৷
 গেলগ৷। উংখাংহান পৱ৷ অয়৷ কুঠাগর ভিতরে আটানি অকরল। খাংতা
 কেকানির শব্দ আহান কানহানিৎ বৱি দিল। গোপাল তুর৷ অয়৷ কান্দাৎ
 চেয়ারহানাৎ বহিলগ৷। মেইখংহানাদে বৱো মিল্লেংহান বেঙ্ল। নুরৱাগর জিপেছে
 আহিগি তাপ্প তাপ্প মেলানি অকরল। চৱিগ আহির পূর্ণ মিলনে নিস্তব্ধ কুঠাগরে
 হজাক করে দিলপৱ৷। আহির পট নামৱিয়৷ গোপালরে কূপ করে চেইল।
 খাংকরে নৱিয়৷ গোপাল মুরগ নঙেইল। মনহানরে দৱ৷ করিয়৷ হাবি পাংকাল
 আকসাটে পুলকরিয়৷ জোরহান করে দিয়৷ নৱগ নিকালল, 'রাধিকা - কিমে?'
 দুগ শিচ্চিল শব্দ। কিন্তুমান গোপালর হৃদিগ চিলা চিলা অয়৷ নিকুলিল পৱ৷।
 কিয়৷ বুঙ্লে, পুংখাক দশ বছরর পিছে দিল ডাকহান রাধিকার আহি দ্বিয়গিদে
 তপ্পা আহির পানি ছুটানি অকরল। গোপাল নিজরে সংযত করিয়৷ মাংল,
 রাধিকা, মনহান দৱ৷ কর। কুনো ডর নেই। চৱে, অপৱেশন করেছি গৱিগ -
 কাদানি খালকৱানি মোটেই থক নেই। মি আছু, মি আছু - তর যতি অসুবিধ৷
 মি...'

'যে থামপালগর পাত৷ জঙিয়৷ গেলগ৷ এবাকা ঔ থামপাল উগর কথা মালিয়৷
 লাভ নেই। কিন্তুমান আজিতে কিয়৷?'

রাধিকা তাপ্প তাপ্প জুরাবহান দিল।

'মানবিক কৰ্তব্যবোধ, মোর মাৱুপগর বনক হাসপাতালে - যেসাদেও মোরতা
 উনা অনি থকর - থাক, নিয়াম নাখালকরি, মি আছু...'

হেইরাপ মুকসি আহান রাধিকার অটগিরমা খেলা গেলগ৷। হাতে হাতে জুরাব
 দিল,

'এবাকা মি চতুর্দশির জোনাকহান - ডিল নেই আর অমাবস্যৱ! মোরেলো না
 খালকরি - প্রভুরে হমা দেউরি - আজি তোরে মেংতমহান কাদাৎ পেইলু।'

গোপাল হৱপেইল, আর তেইরে তেমজানি নাইতই। মুরগ নঙেয়৷ বয়৷ থাইল।
 দ্বিয়গি খানি তুমিল অয়৷ থাইল৷। বৱো নিরবতা বাগিয়৷ শব্দ কতহান নিকুলিল-

'গোপালদ৷, কি দুঃখে এতদিন মোর লগে না টটরলে? যদি দোষ থৱ যানৱ
 আগে ক্ষমা কর, মাং - করতেইত৷?'

ডিগল নিংশাহান বেলেয়৷ কুঠাগর ছাদহানাদে দৃষ্টিহান বেঙ্ল গোপালে। জীবনর
 আচানক ঘটনার পরিসমাপ্তি অনৱ পথ আগ ইলইল পৱ৷, যেহানরকা কুনোদিন
 তা নাখালরেছে বৱো প্রস্তুত নাছে। রাধিকার লগে জীবনে তার এমন সম্বন্ধ নেই

যেহানর গজে তা খানি আহান মাতে পারের। তবে হাই, নাটটরানির ভিতরে ডাঙর ফারাক আহান আছে - উহানেই আজিকার আবিষ্কার আহান।

রাধিকাই আজি ক্ষমা বিসারেইরী! কিন্তুমান কারণ বিসারেয়া নাপার। কিয়া বুঞ্জে, কুনোদিন এমন ঘটনা নাঘটেছিল যেহানরকা ক্ষমার কথা উঠের। গোপালে নিজরে সংযত করিয়া তাপ্ত তাপ্ত ডিগল করে মাতে নেরগা জীবনর অধ্যায় আহান -

‘রাধিকা, পইলাই মি তোর বাবার গজে কৃতজ্ঞতা কাৎকরৌরি। তোর বাবার ঋণ অশেষ, মোর জীবন এহান গড়নিৎ। মোর সাদানে লেইরাপা এগরে বি এ বি টি পেয়া তামকবুরেইতেগা তা দলাগ সাহায্য করেছিল। অবশ্য মোর বেয়কে তাপ্ত তাপ্ত ঋণ হুজেদেছিল। তেব, তার সাদে উদার আত্মার মানু মিল্লেঙে নিয়াম নাপরের। উতার গজে আছিলতাই তোর বেয়কর লগে মোর আন্তরিক মারূপানা। আজি পেয়া আমি দ্বিয়গি আত্মা আগ। কিন্তু রাধিকা... আকদিন খাংতা প্রস্তাব আহান আহিল - তোর বিয়ার প্রস্তাব। মি অসম্মতি জানেইল কুনো কারণ নেয়ছিল - কিয়া বুঞ্জে, রূপে গুনে, বংশ মর্যাদাৎ হাবি বারাদে তি পূর্ণ - উতা ছাড়া, তোর বাবার কথা বেলানির মত সাহস মোরতা নেয়ছিল... কিন্তুমান হাবি আশা হপন অয়া থাইল। আকদিন তোর বেয়ক যোগেন্দ্র নিয়াম চিন্তা করিয়ায়য়া আছিল। মি কাদাৎ গিয়া বহিলুগা। মোরে চেয়া গম্ভীর অয়া মাৎল - বাছাহে গোপাল, বাবার প্রস্তাব এহান মি নিয়াম খালকরলু। এ বিয়া এহান অইলেতে তোর মোর সম্পর্ক নেয়নিত পড়ের - আকবেদে নিঃস্বার্থ মারূপানা, আর বারাদে স্বার্থজড়িত সম্পর্ক - দ্বিয়হানি সম্পর্কতে আকসাটে নাচলের। উহানেতে মি খালকরলুতাই তোর মোর প্রেম জিৎতা অয়া থাক - বিয়াহান বাতিল অক -’

নিংশা আহানাৎ কথাহানি মাতিয়া খানি আহান তুমিল অইল গোপাল। বারো তাপকরে অকরল, ‘উতার থাংনাৎ তোর বিয়া অইল কৈলাশহরে। দ্বিবছর থাংনাৎ আকদিন তোরে দেখলু - মুরগৎ বাড়ি চুল, গারিগৎ দলা ব্লাউজহান, মুরগৎ দলা ইনাফিহান বারো পিদানিৎ দলা আঙালুরি আহান। তোর মোর আহি পড়াপড়ি অইল। তিও কুনো কথা আহান নামাৎলে, মিয়ও নামাৎলু। তি লাজহানে মুরগ নঙেয়া গেলেগা - মি টটরানির হম্মা করিয়াও মাতে নারলু। আজি পেয়া মি তোর লগে না টটরেয়া আছু... কুনোদিন তি মোরাং দোষ নাকরেছৎ বারো মোর জ্ঞান-বিশ্বাস মতে কুনোদিন মি তোরাং দোষ নাকরেছু।’

রাধিকা নীরব অয়া হুনিরী। আজি তেইর লাজ, দুঃখ, ডর হাবিতা নেয় গেলগা

পারা। আকবেদে উরাদিয়া থ দিল। তেই মাতানি অকরল, 'গোপালদা, মি হাবি হারপাছু। নিঙলপীর হুদির কথা কিতা হারপেইতেই? ফুলর কুড়িগর ভিতরে যময়া থার ফুলগর রং, গং, সৌন্দর্য বারো ভবিষ্যতর শাতনির খৌরাং। যেতাও অক, তোর দোষ নেই হাইহান - কিন্তুমান - মোর গজে কি তোর কোনো দুর্বলতা নেই?'

'দুর্বলতা?' গোপাল ঙাকয়া চার।

'নেইতা?' রাধিকাই আংকরিরী।

'কইতে - নেই!' গোপালে জুরাব দিল।

অতি মিমুত মেইথংহানাং মুকসি আহান অটগিরমা দেহা দিল। হেইরাপ মেইথংহান বুলেয়া গোপালরে মাতানি অকরল,

'গোপালদা তি হুদা মিঙালর য়ারি দিয়র - আধারর কথাতে আকহান নামাংলে।

তি থংমেইহানর সাদে জলেছিলে, কিন্তুমান তলর আধারহান নাদেহেছং - মি কিন্তু ঔ ছেয়াগর তলে থায়া হাবিতা হারপেয়া তোরে চিনেছিলু। তি নিংশি অ আজিৎতপুরি দশ বছর আগর ঘটনা আহান।'

'ঘটনা? কিহান?'

'তি পাহুরতেই হাইহান। কিন্তু মি নাপাহুরেছু। যে নাটকহানে তোরে সময় আহানাং বিভুলা করিয়া থছিল।'

'কুন নাটকহান?'

'নিংশিঙে নেই?'

'না কইতে...'

'রমা...' রাধিকায় জোরহান দিয়া মাংল।

গোপাল ফিঙয়া ঘুমেংত হজাক অইল পারা। তার নিংশিঙে শাতয়া উঠিল রমার ছবিহান। শরৎচন্দ্রর পল্লী সমাজর নাট্যরূপ দিয়া তা হদাছিল বারো অভিনয়রকা যোগং করেছিল। কিন্তুমান ইকরিয়াও কানা নাইল - লেরিকহান কুংবেদে মাঙো পড়িলগা। তা থাকেবাকে নারিয়া আংকরল,

'রমা নাটকহান পাছিলেথাং?'

'হায়, মি ঔ নাটক উহান লুকাদেছিলু - থাংনাং কান্দিহানে পানিং বেলা দিলু - তি মোর গজে কান্দি মিটাছিলে - মি তোর গজে মিটাছিলু মোর কান্দি। মোর জীবনে এহানেই তোরাং দোষহান - এহানরকা ক্ষমা চাউরি।' রাধিকা খামতলর অস্ত্রগ এরা দিয়া তাঞ্জাহান চেয়া থাইলী।

‘রমা’ ‘রমা’ শব্দ দ্বিগুণি গোপালর কানহানিৎ বারি দেনার লগে লগে গারিগ হিরিঘাম-পাহাৎ অনা অকরল। তা উবা অয়া পড়িল... তাপ্প দ্বি আক কাকেই দিয়া খালকরানি অকরল। তার নিংশিঙর ছবিৎ বাহানি অকরল জীবনর পইলাকার অধ্যায় আহানর যারি আহান। শরৎচন্দ্রর ‘পল্লীসমাজ’ এ তারে নিয়াম আর্কষণ করেছিল। তারে হজাক করেছিল রমার রূপ উহান। কনাক-য়ারি রমা বারো রমেশর সম্পর্ক। রমেশর লগে রমার বিয়ার প্রস্তাব আছিল; কিন্তুমান নাইল। থাংনাৎ যারী অয়া রমেশর গজে দলাগ কান্ধি মিটাছিল। কিন্তুমান ঔ কান্ধির মূলে কিহান? গোপাল ঘোরগ অয়া খালকরের। জেলেইর যারি হারপানি উপায় নেই। তা আজি প্রত্যক্ষ ভৌ পেইল যে তার অলক্ষ্যে রাধিকা-রমা গোপাল-রমেশ। তার নাটকহান অলক্ষ্যে তা লেংকরেছিল - যেহান তা হারনাপাছিল।

আজি খাংতা দেহের - তার মুঙে গোপালর আরাক প্রতিচ্ছবি আহান। প্রতিচ্ছবিহানে গোপালর ঠৌনা, লৌশিং, জ্ঞান হাবিরে ঠিচালাই করিয়া মুকসি দিয়া চেয়া আছে। গোপাল নিরুপায় অয়া চেয়ারহানাৎ বহিল। তার পাহাৎ আছে মেইথংহান চেয়া রাধিকাই হাবিতা হারপা গেলিগা। যুদ্ধ জয় করিয়া যোদ্ধাগই মরণর চিন্তা নাকরিয়া জিঙানির হারৌর চিন্তালো মরণ-যাতনা যেসাদে পাহুরের, রাধিকাও উসাদে জিঙানির হারৌহানে মরণ-যাতনা পাহুরে গেলিগা। তেইর দেহগৎ নুরা পাংকাল আহান উদয় অইল। তেই বারো মাতানি অকরল,

‘গোপালদা, হারপেইছ, বাহিরর দুরার এহান বন্ধ অইলে ভিতরর দুরার এহান আপ্পানে আং অয়া থার। বোবার থতাহান বন্ধ অইলেও অন্য ইন্দ্রিয়লো ইজিত করিয়া ভাবহান প্রকাশ করের। আধাররতাও দলাগ রূপ আছে - যারি আছে - কথা আছে - ভাব আছে! মি হারপাউরি, মোর তাপিত্ব এহানরে পাহুরানিরকা মি এলা দিলু, রাসে নাছলু, খুপাখুচেইৎ নাছলু, দৌ নিংকরলু, দৌর নাঙে কততা কাংকরলু। কিন্তুমান কই, শান্তিতে কোরাং? এ জীবনে আপন আত্মা এগর সাদে আরাক আত্মাগর সঙ্গ ছাড়া কুনো শান্তি নেই। মি হারপাউরি তি আচানক মনভোলা মানু আগ - ডাঙর আত্মার সাক্ষী আগ। মি তোর চিকছে ছেয়াগর তলে বয়া হারৌর নিংশাহান বেলাছিলু। আমার ঘর উগ অছিলতাই সাহিত্যর কুঞ্জ আগ। দাদা, বৈজি বারো তি তিনগি হুদির ধারার মিলনে সৃষ্টি অছিল সাহিত্য-সংগম। তি সাহিত্য আলোচনা করেছিলে - বিশ্বর শ্রেষ্ঠ সাহিত্যিকর সৃষ্টি - অশ্ব ঘোষ, কালিদাস, সেক্সপীয়র, চেকভ, বার্ণার্ডশ্ব, টলস্টয়, নুটহাম্‌সুন,

আর্নেস্ট হেমিংওয়ে - কত লেখকর কথা! তি গীতাহানর সঞ্জয়র সাদে মাতেছিলে, মি অন্ধ ধৃতরাষ্ট্রর সাদে মোর কুঠাগৎ বয়া হাবি হুনেছিলু। মি হুৎতুমেও মহাভাগ্যবতীগ। তি হার নাপেইতেই তোঁর সেবা অলক্ষ্যে কিসাদে করেছিলুতা। তি আহানির লগে লগে তোঁর চাহা গুরাপানা হিনে দুখে লেইলেক নাকরিয়া সেবা করেছিলু - অবশ্য তি উতা মিল্লেং কররগ নাগই। শরৎচন্দ্রর তি ভক্ত আগ - তার 'বড়দিদি'র ভূমিকা মি নেছিলুগা। নিয়াম নিংকরা এলাহান আছিলতাই রবীন্দ্রনাথর - আমার না বলার বাণী, ... কতকিতা। আচানক। মি আকখুলীগই মোর হারৌএ বিভুলা অছিল। এবাকা খালকরিয়া চা - এতা হাবি কারাং - কার সালেদে করেছিলেতা ? তলে তলে মোরাং, না কারাং?

দাবুণ চহা চহা কারে গোপালর হুদিগ বিধানি অকরল। তার গারিগ রমকাটা দিল। তার অজান্তে তার ভাব রাধিকারাং কিসাদে গেলগাতা?! জীবনর আচানক আবিষ্কার। আজি হুৎতুমেও রাধিকারাং পরাজয় বরণ করলতা? নানান চিন্তালো তুমিল অয়া মুরগ নঙেয়া বহিয়া থাইল।

'রাধিকা, গেরিলা যুদ্ধর কৌশলর কথা হুনেছিলু - কিন্তুমান আজি নিজে উহানর মর্মহান হারপেইলু।' গোপাল মুরগ তুলিয়া মাংল।

'মোরাং হুৎতুমেও পরাজিত অইলেথাং?' রাধিকাই আংকরল।

'রাধিকা মোরে আরাক জগৎ আহানর মিঙাল আহান দিলে - আচানকর রাজ্য আহান!'

'গোপালদা, মানুর দৃষ্টিরমা মানুর রূপ আলাদা। ধর্ম প্রচার করেকুরাং মানু এতা পাপী, যুদ্ধার্থীরাং অন্য পক্ষ দুষমন, ডাক্তররাং রোগী, রাজনীতিবিদরাং ভোটর - কিন্তুমান সাহিত্যিকরাং মানু এতা আত্মা, ঈশ্বরর সৃষ্ট হাবি জীবর আত্মার প্রতি তানু শ্রদ্ধাশীল। উহানে তানু যুগ যুগ ধরিয়া অমর। তি সেত্য, সুন্দর বারো সাহিত্যর ভক্ত আগ। তোঁর আত্মা অলক্ষ্যে আরাক আত্মারে বানাপেইতই। আশা থউরি, এ কথা এহান তি যাকরতেই। আজি মোর হুদিগর হাবি জ্বালা, তাপিত্ব, যেতা বহুদিন বুকগর তলে যময়া আছিল - হাবিতা তোঁরাং কাংকরিয়া মি উরাই সাঙইলু। মি লালফামে লামেছিলু - জিঙানির সালেদে। কিয়া বুঞ্জে - প্রেম, যুদ্ধ বারো রাজদনীতিরমা জিঙানিয়ে ধর্মহান। জিঙানিৎ গিয়া নানান পথ, লৌশিং অবলম্বন করানি লাগের - উতাং পাপ নেই -'

আকসাটে ডিগল কথাহানি মাতিয়া রাধিকা তুমিল অইলী। মুরগৎ হিরিঘাম দেহা দিল। গোপাল উৎখাতহানপারা অয়া তাপ্ত তাপ্ত বেসুনিহানলো বৌদানি অকরল।

সিতারেয়া পড়েছে চুল মাঠিয়া দিয়া ফামে থদিল। তাপ্প তাপ্প ডাকদের -
'রাধিকা - অ রাধিকা -'

'কইতে মোরকাতে কিতা...' আহিগি মেলিয়া রাধিকাই আংকরল।

'দ - আংগুরর রস -'

গোপালে ছিটা আহান রস পিরাদিল। রাধিকাই হাতে হাতে গিলে বেলল। নিস্তব্ধ
কুঠাগরমা বারো হুচিকাং শব্দ আগ নিকলিল।

'আরতাতে?'

'তোর চিকিৎসারকা তাংখা হাজার আহান আনেদেছু।'

'চেইক।'

গোপাল তাপ্প তেইর আতহানাং তাংখার বাডেলগ দিল। রাধিকাই হাতে হাতে
বুকগর গজে থইল। খানি থায়া ডিগল নিংশা আহান বেলেয়া আলথক গোপালর
আতে দাদিল। গোপাল পুতুলগর সাদে বয়া আছে। রাধিকার আহি দ্বিয়গিত
নিজে নিজে তপ্তা পানির ধারা গালগ তিঙা দেনা অকরল। গোপাল উঙয়া মাতে
নেরগা, 'রাধিকা না কাদি - থক নেই।'

'গোপালদা মোরতা হাবি পাগেলুগা- এতাংত জিঙে পানা থক নেই! উঃ - নার্স,
নার্স - রাধিকা কেকা কেকা বুলন দিল। গোপাল দাবদে দুরাদে নিকুলিল।
নিংশা মাঙয়া নার্সর কুঠাগং হাজির অইলগা। পৌহান পানা ফাৎনেই নার্স
ইরাইরি কুঠাগদে সালইলী।

টক্ টক্ টক্, নার্সর জুতার হিলগির শব্দহান কঠিন পাক্কাগর বুকগরমা রহানি
অকরল। পানি হমাছে ঘরগর সাদে চিকছে - কুনো শব্দ নেই। নার্সগই
রাধিকার কাদাং উবা অয়া পরীক্ষা করল। তাপ্প কুনো আহান না টটরেয়া দলা
ফুতিহানল মেইথংহান ঘুরে দিল। মুরগ নঙেয়া যানারকা বুলন দিল। কাকেই
দুহান দিয়া আলথক গোপালর উবেদে বুলন দিয়া চেইল। গোপাল হিলর দৌগর
সাদে উবা অয়া আছে - মাতানিরকা অটগি লরেইল - কিন্তুমান হক আগই
কুনো আহান মাতে নারল। নার্স কুনো কথা নামাতিয়া আতহানলো ইংগিত আগ
দিয়া জুতার হিলগি রহা রহা দুরাদে নিকুলিয়া আইলী...

গোপাল জিংদরে দলা ফুতিহানে গুরেছে মূর্তিগরে চেয়া আছে ... হিয়রগর গজে
ধূপদানীহানাংর জ্বলেছিল ধূপকাঠির গংহান তাপ্প তাপ্প লয়নি অকরল...
ধূপকাঠিগ জ্বলিয়া পুড়িয়া ছালিগ অয়া তলে পড়িয়া গেলগা।

রাজার গাং বারো মাদৈ গাং

নুঙেইর কথাও মাং, শান্তির কথাও মাং বা হারৌর কথাও মাং - হাবিহানি পুলয়া চন্দ্রকলা বারো শংকরর সংসারে আকতা অয়া আছি। চন্দ্রকলা ত্রিপুরার হালালির নিঙলগ বারো শংকর সিংগারিরমা জরম অছেগ। শংকর গৌহাটিং মোটর মেকানিকগ। বার্কশপ আগ লিংখাং করিয়া উগর গজে নুঙেই অয়া চলের - সংসার চলানিরকা ধনর অভাব নেই। ধন থাইলেই সংসার নুঙেই অরহান নাগই - সাধারণ মানসিক বিকৃতির কারণে লিশিং লিশিং হেইমাকর জীবন অসার বারো অশান্তির মাও আছি। কিন্তুমান চন্দ্রকলা বারো শংকরর জীবনরমা ধনর যারি নেই - মনর যারিতে আছে। ধনে হারৌ নেই - তিলপা হিদির হারৌ এহানতে স্বর্গর হারৌহান বুলিয়া নিংকররতা। উহানেতে মহাদেব গিকরর মুরগরমা চন্দ্রকলা যেসাদে থাইরী শংকরর বাস্তব জীবনেও চন্দ্রকলা মানুবুপী শংকরর হুদিগৎ আছে বুললে ভুল নাইব। শংকর মূলত রসিক জন আগ। তা চন্দ্রকলারে বিয়া করানির একমাত্র কারণহান মাদৈ নিঙলগ বুলিয়া। মাদৈ ঠারে হেক আগ আছে উহান হুনানি নিয়াম মনার। বিয়ার পিছে অবসর সময়ে রাজার গাং বারো মাদৈ গাঙর শব্দ এতালো কৌলি আকেইহান হাঞ্জেইতারা। রাজার গাং ডাঙর না মাদৈ গাং ডাঙর? চন্দ্রকলাই মাতিরী, 'মাদৈ গাং ডাঙর। কিয়া বুঞ্জে, মাদৈরে দেবরাজ ইন্দ্রই পেয়া বিভুলা অয়া বিয়া করেছিল।'

শংকরে মাতের, 'মাদৈ এতা রাণীর লগে সহচরী আছিলাতা। উহানেতে বেয়াপার যেসাদে কুল নেই - উসাদে মাদৈ এতার কুনো কুলনেই।'

শংকরর কথাহান হুনানি ফাৎনেই চন্দ্রকলা জিগ শৌঅইলী। লগে লগে শুক-শারীর থেংনা আরম্ভ অইল।

চন্দ্রকলাই মাতিরী, 'তুমার রাজার গাং এতা নিয়াম আতলপাতাহে। তানু রাজার গাস কাপলাতা। তানুর কুনো কুল নেই। আমারে লোহঙ করিয়া জাতে কাছিতা।

থতালো রাজা রাজা বুলরাংতা, কামেতে কিংতাও নেইতা হে। রাজ্যনেই, প্রজানেই, সৈন্যও নেই - তুমি তাসর রাজা উতাহে।

চন্দ্রকলার জোরাবহান পেয়া শংকর খাংতা থুতুবুতু খেয়া তুমিল অইল। চন্দ্রকলা হারৌ অয়া আরাকৌ মাতে নেইরীগা, 'তুমার ঠার উতা কতিতে দরা। তুমার কথাং রস নেই - মাত বাং কথাউতা উবা উবা বলমলো বিদেইতার পাৱা - উহানলো তি গালেইলে মি সুপ করে খাংকরে নারৌরী।'

'মাদৈ এতা সুপ লংকরিলতা নাগই। এতার জীবন এহান বেয়াপার চুল আচুরেয়া, ফুতি ধয়া, গারিগং খৌগছিয়া আছিলতা। কুনো ডাঙর কাম আহান এতাই করেছিতা নাগই।' শংকর চন্দ্রকলারে আরাকখানি শৌঅনিহান বরা দিল।

'উহান অইলেতে মোরেতে কিয়া লোহং করলে?'

'কোট ব্রাশ করানি, ভাত রাধানি, ফুতি ধনা এতা কিতারকা।'

'না উতা নাবে - মি তলুইয়া এগরে কিয়াকা আনলে?'

'হবা পেয়া।' চন্দ্রকলা শংকরর ইজু উত্তর পেয়া তুমিল অইলি। হবা পেয়া শব্দ তেইর কানহানর ভিতরগো লিংফাং করিয়া হুদিগর ভিতরে তাসেলগ বিধেইল পাৱা। তেই শংকররে চেয়া মুকসিহান দিয়া চাহা আনাং গেলীগা। সংসাররমা নানান ঘটনা ঘটিয়া যারগা। ও ঘটনাপুঞ্জীর হাদিং মানু এ জীবন-সুমুদ্র এহান পার অইতার নানান ঘাত প্রতিঘাতর মাহাকে। কিন্তুমান এরে হুরকাং হেইমাক এহানর জীবনর নৌগ তাপ্ত তাপ্ত দারা আহানলো চলে যারগা। হাদি হাদিং জীবনহান রসময় করানির সালেদে যেসাদেউ রাজার গাং বারো মাদৈ গাং আহের। শংকরে হাদিং মাদৈর শব্দ উতার অর্থ করের - যেমন বেংকিগরে বাবারগরা বারো টিকিগরে বাবার অচ্চিহান।

'এতা রাজার গাঙর গরেইপা কথা। আমি বেংকিগরে ডেনকিগ টিকিগরে তিকিগ বুলিয়ার।'

'ছাতিগরে পেহান বুলরাই বারো বালতিগরে বায়লাগ বুলরাই নাগইতা?' শংকরে বারো আংকরের।

'তুমার ছাতি উগ মিয়াঙর ঠার। পেহান বিষ্ণুপ্রিয়া মণিপুরী। উসাদে বালতি এগও মিয়াঙর ঠার। এবাকাতে খালকর, তুমার রাজার গাং এতা ঠিক নেই। আমার বায়লা শব্দ এগ খাটিগ।'

তানুর কৌলিরমা আকফির রাজার গাং হুনা অইলে মাদৈ গাং তামা অর। মাগৈ গাং হুনা অইলে রাজার গাং তামা অর।

এসাদে করেই তানুর হংকরা গাং দিয়হানর কাব্য হঙয়া য়ারগা বারো যিতইগা।
আকদিন শংকর বাজারে গিয়া সিলটী উরি দেহে বেল্প। খানা মনেয়া কেজি
আহান উরি লয়া ঘরেদে আহিল। রাতি চন্দ্রকলারে সিলটী উরি বিয়ানে
রাধানিরকা মাংল। বিয়ান ৯ বাজিৎ শংকর কামে য়ানার সালেদে হিনেয়া,
পোষাক কিতা লাগেয়া চন্দ্রকলারে আংকরলো,

‘হই, কিতার হৌতে রাধলে?’

‘সেন্দাং থৈ।’ চন্দ্রকলাই জুরাব দিল।

সেন্দাং থৈ হুনানির লগে লগে শংকর খাংতা নিয়াম শৌঅ পড়িলগা। তার কথা
মত হৌ নারাধেছে বুলিয়া কান্ধি পকয়া আটে আটে কিহান করতু নাকরতু
বুলিয়া খামতলে ভাত নাহেয়া য়ানার সিদ্ধান্ত নিলগা। চন্দ্রকলারে বারেয়া মাংল,
‘মি নাও খেইতৌ। তোর সেন্দাংথৈ তি খা। মাদৈথৈ এখুবুম রাধিছ।’ উতা বুলিয়া
শংকর হন হন করিয়া দুরাদে নিকুলিয়া গেলগা।

মেৎতমহানার ঘটনা। চন্দ্রকলা উপ আপ নারিয়া লৌশিং মাঙয়া বহিলী।
হেয়করে হারৌ করিয়া খৌরেইতৌ বুলতে হাবিতা পানি সানি অইল। খাংতা
বসন্তর হারৌপা নীলুরা হক হানাং যেন কালা বরণ মেঘ দেহাদিল পারা।
নিজর কর্মদোষ বুলিয়া আহির পানি বেলা বেলা নানান তা খালকরিয়া থাইলী।

শংকর কারখানাং গিয়া খানি আহান তুমিল অয়া বয়া থাইল। কানখিহান হাতে
হাতে কমে গেলগা। ভাতর ভকহানও লাগে আহের। ভাত খানার চিন্তা আহানও
নিকুলিল। - কুরাং গিয়া পেটগ তেমজানি? খালকরতে খালকরতে খাংতা
ঘড়িগদে আহিগি পড়তেই আরাকও সমস্যাং পড়িল। ঘড়িগর কাটাগ বারোটর
গজে গিয়া হদাছেগা! হোটেলৈ ভাত খেইলে ঘরে খানা নালাগতই। রাতিকার
আট বাজিৎ গেলেগাও ক্ষতি নেই। কিন্তুমান চন্দ্রকলা দিন এহান ভাত নাহেয়া
থাইতই এহান খাল করের। বারো খালকরের আজিকার সেন্দাংথৈ এতা
কিজাতর ডাইল অইলতা? সাকলখৈ, উরিখৈ, সামুখৈ এতা খাছে - কিন্তুমান
সেন্দাংথৈ এতা কিতা? নানান প্রশ্নরমা বিভুলা অয়া খালকরের।

রসিক জন এতাই হেইমাকর কৌলি এতারে খেরর জির লগে পান্তামনা দিতারা।
শংকর মনর জিগও খেরর জিগর সাদে। মেৎতমহানাং শালিগ অইল। ঘরে

গিয়া ভাত খানার সিদ্ধান্ত নিয়া হুদেইলগা। এবাকাতে মানভঞ্জন পালা আহানও আহিল। চন্দ্রকলার মুণ্ডে কিসাদে অভিনয় আহান করতই এহানও চিন্তা করে। তবে তা নিশ্চিত - চন্দ্রকলাই দেহানি ফাৎনেই মেঙয়া খানার সালেদে নানান ভংগিলো তারে তেমজানির হন্না করতই। উহানেতে তা লেইনার বুলিল ভাবহানলো ঘরেদে সালইল।

শংকরে যেহান খালকরল উহান অইল। ঘরে হমানি ফাৎনেই চন্দ্রকলা আহির পানি বেলেয়া এমন ভাবে কঙালা অয়া মাতানি অকরল যে তা মেৎতমহানাং গলে পড়িলগা। চন্দ্রকলা মাটিহান লেপিয়া ফিটা পারে দিয়া ভাত চালুক হাজেয়া কাদাং বহিলী। শংকর অবশ্য সুপ না টটরেয়া কান্দিহানর অভিনয় করিয়া ভোজনে বহিলগা। মনে মনেতে সেন্দাংথে এতা কিসাদেতা বুলিয়া নিয়াম খালকরেরগ। কিন্তুমান হৌ খেয়া চার হান্তে সিলটি উরির হৌ আছে - ইমে আনেছে ঔতাই রাধে দেছে। এবাকাতে তার খতাহানর বাধগ বাগিল। তা ঙাকয়া আংকরল, 'এতাতে সিলটি উরির হৌ নাই - তিতে কিয়া?'

'হাইতাহে হিজাছু নাই। আমিতে এতারে সেন্দাংথে মাতরাং নাই।'

শংকর আর নাআহিয়া নারল।

'দূর আপাংপী, আপ্রানে আহানলো জি লাগিল পারা।'

যেতাও আক, রাজার গাঙর সিলটি উরি মাদৈ গাঙে সেন্দাংথে অয়া হৌর মাহৌহান আরাকও নিয়াম করে দিল। আপাংপা বারো আপাংপী হেইমাক এহানে আগরে আগই চেয়া আহে আহে আজিকার ঘটনা এহানর অর্থ করাং বহিলা।

বিষ্ণুপ্রিয়া মণিপুরী সাহিত্য সভা, ১ম বছর, ৩য় সংখ্যা, ২০০৪ ইং

যে প্রশ্নর জুরাব নেই

বলরাম বার শ্রীকৃষ্ণ দ্বাপর যুগে লীলা করিয়া গেলাগা। দ্বিয় বেইবুনির যারিল কলিযুগ এহান এবাকা পেয়া বিভুলা অছি। তানুর যারি দিয়া কাদতারা, হারৌ অয়া আহিতারা, মন তাপথা করতারা, আত্ম জিজ্ঞাসা করতারা, অর্থ করতারা, এলা দিতারা বার নাছতারা। মানুর জীবনে, মনর মেংশেলে, চিন্তার আবেশে, যেহানি পেইতারা ঔহানি সমাজ জীবনে শাৎকরিয়া রূপ দেনাৎ যতন করতারা। সমাজ জীবন এতা কিতাল জিংতা অয়া অছি।

বলরাম জেঠা বেয়কগ। জেঠা বেয়ক এগ প্রায়ই ইজ্জু প্রকৃতি বার সরলা হুদির মানু অইতারা এহান মানুর থতাৎ চলেছেহান। খুলা-খুলি এতা চালাক অইতারা এহানও মানুরে মাৎতারা। প্রমাণহান, বলরাম-কৃষ্ণর চরিত্রৎ পেয়ার। বলরামে লাঞ্জলহান লেম্পালে থয়া বুলের বার শ্রীকৃষ্ণই বাশীগ ধরিয়া। বলরামর জীবনীহানাৎ নারী-পুরুষর কুনো রোমান্স নেই। কিন্তুমান অন্যবেদে শ্রীকৃষ্ণর বারাহান চেইতে সমুদ্রহান দেহিয়ার। লিশিং লিশিং বেয়াপা এহান তারে পানার সালেদে লাজ, ডর, হাবিতা বেলেয়া পিঠিং পড়েছি। তারে প্রেমর চূড়ামণিগ লেপকরিয়া কবি এহানে এলা, কবিতা লেংকরিয়া তানুও শ্রীকৃষ্ণর লগে নাং বার ফিটা পেইলা। এ কলিকাল এহানাতও এরে দৃশ্য এহান খেই নেই। এবাকাও বলরাম পার্টি বার কৃষ্ণপার্টি দুহান পুরাপুরি সমান্তরাল অয়া চলেছি। যত খেতিআলা এতা বলরামর দলে, বার কাম নাকরিয়া কলম বার রাজনীতিল পদবীৎ থায়া চলেকুরা এতা শ্রীকৃষ্ণর দলে।

রামপুর গাঙর মৈরাং চাউবা গিরক বলরামর দলরগ। ঔহানেতে তার জীবনে রোমান্স কিতা হারপানির সুযোগ নেই। কুনোমতে বি দ্বি কিয়ার তার সম্পত্তি। ভাগ্য হবা, পাংকালপা বন্ডা জোড়া আহান আছে। ঔহানেতে ভাগি বি খেতি করিয়া চলের। মালক লেহাউনু গিথানক পুতকর বিয়ার সালে দ্বি বছর আটিয়াও কইনা আগ লেপকরে নারলী। উপায় নাপেয়া গাঙর মানুগ গলোকচান গিরকর

কাদাৎ চেপইলী। দিনরাতি লেহাউনুর কেরকেরানিয়ে গলোকচান মহা ফাপরে পড়িল। আজিকালি খেতি আলার কইনা বিসারানি বাঘর আহি বিসারানি পারা। ঔতার গজে রূপাও নেই। গলোকচান খালকরতে খালকরতে কুল নাপেইল। খামতলে হিংগালার গাং আহানাৎ তার সাকেই আগর কথা নিংশিঙে আহিল। নিয়াম লেইরা। ঔহানেতে তারে ধরলে তার নিঙল দুগ আছি ঔতাৎত আগ যেসাদেও আনানি পারতইহান দেখল।

গলোকচান লেইরাপার মারুপগ। যত লেইরাপার বিপদে আপদে লেম্পাল দেকুরাগ, ধর্মে বিশ্বাসীগ। জীবনর আয়র অংশ আহান দান করানি লাগের - এ বিশ্বাস হুদিগৎ থয়া লেইরাপারে সাহায্য করিয়া যারগা। হাদিৎ মইলকে এতাল টটরলে তা বুজেয়া মাতের, 'হে আপাংপী, দান করলেহে পেইতেনাই। যত আটকুরা, ঠকুরা এতার রূপা ভেলুরে ডাক্তররাং কাংকরতারা। আমরাং এতা ঘটনা নেই। আমার ডেকি নুঙেইপা, হারৌপা কুরাং আছিতা? যে মানুরাং নুরারা নেই ঔগর সাদে নুঙেইপাতা নেই।' মইলকে এতা কিতা কথা হুনিয়া হেয়কর কামে নিয়াম বাধা নাদিরী।

গলোকচান হুৎতুমেও মনহান দরা করিয়া ঈশ্বরর নাং লয়া কামে লাগিল। ফলহান ধরিল। ফাল্লুন মাহার ভিতরে মৈরাং চাউবার বিয়া দিল। অবশ্যি তার জেপেৎত ধনমাহেই খরচ অইল। কিন্তুমান, কীর্তন করিয়া যে হারৌহান পেইতারা ঔতাৎত জিঙে হারৌহান গলোকচানে পেইল। হেইমাক আহান জোড়া দেনা কতি পুণ্য। মানুর আহান দেনাৎত পুরি হারৌপাতা কিতা আছে?

মৈরাং চাউবা সৎ, বিনয়ী বার কর্মী মানুগ। গলোকচান তারাং ভগবান। গলোকচান তার শ্রদ্ধা ভক্তিং হারৌ অয়া নিজে কাকালি পানিৎ লামিয়া তার বিয়াহান জোড়া দিল। ঔহানেতে তা যেহান নির্দেশ দেব ঔহানেই মৈরাং চাউবাই মুর নঙেয়া যাকরের। বিয়ার থাংনাৎ মইলক বিনতার গজে মৈরাং চাউবা খিয়াল থনা অকরল। বিনতার নাংহানর লগে তেইর চরিত্রর মিল এহান তেইরে হবা থাক আহানাৎ কাকরে দিল। হৌরিয়কেৎত অকরিয়া গাঙর হাবিহানে তেইরে যাকরতারা। তেই খালকরিরী, 'লেইরা জিনাৎ থায়া ডাঙর আশার দরকার নেই। মোর কপালে যেতা ইকরেছে ঔতাও আকছে।' হাদি হাদিৎ বাপকর ঘরে অনাহারে দিন কাটাছিলা, পিদানির ফুতি নাপাছিলা ঔতা কিতা নিংশিং অয়া মনহান তেমজেইরী।

হাতে হাতে চারি বছর লাল গেলগা। বিনতা মুনিশৌ দুগ পেয়া আরাকও আগ

গারিৎ অইলী। বৃপা নেই দুঃখ নেই। কিন্তুমান দুগ অমূল্য ধন পেইল এতাৎত ডাঙর আর কিতা আছে? তেব, আর আর চাকুরিআলার মৌরেইর নাটক বার চলন দেখলে মনহান রাইচিল অর। জনমহান কানহানাৎ হুনর ইং আগ পেয়া লাগা নারলী। হবা ফুতিফালি পিদে নারলী। হবা স্যাভেল আহান লাগা নারলী। মানুর লগে তিলইতে খাংনা খাংনি অইরী। ঔহানেতে দুর্গাপূজাৎ পেয়া তেই আর আর বেয়াপার লগে নায়েইরীগা।

মৈরাং চাউবা মইলকরে আর আরতার লগে সমান করানির সালেদে দিনরাতি কাম করের। কিন্তুমান খরচর পথ নিয়াম অনিয়ে পইসা জমানি নুরারের। চেষ্টা করিয়াও বিনতার কানে হুনর রিংগ লাগাদেনা নুরারের। দামি ইনাফি, ব্লাউজ, আঙালুরি, তলফুতি - এসাদে নানানতা লাগেয়া আর আর বেয়াপা আটতারা ঔহান দেহিয়া তা মনে নিয়াম হিনপার। ভগবানরাং হমাদের - 'হে প্রভু! কুনদিন সাজেলর জিনিষ লদিয়া বিনতার মন এহান হারৌ করতৌতা।'

বিনতার মন এহান হাদি হাদিৎ চুচর জিগর সাদে জ্বলের। ভোগ, ঐশ্বর্য বার কামনার মিঙাল তেইরে ডাহের। কিন্তু নিরুপায়। তেই মৈরাঙর মনোভাব হারপেইরী, কিন্তুমান তার ক্ষমতার সীমাগ দেহিয়া তুমিল অইরী। হাদি হাদিৎ মানুর খেতিৎ বুঝা বেছিয়া বছরর ফিজের যোগাড় করিরী। সংসারর এরে তরেই এগৎ খাংতা কালা দিন আহান নজর দিল। বিনতার দেহগৎ নুরারা আহান দেহা দিল। ডাক্তরর শরণ বালা নাইলী। হাতে হাতে দেহগৎ রকত কময়া ফামহানাৎ পড়লী। দুঃচিন্তাই বিভুলা অইলী, মনহান বাগে পড়িলগা। আকদিন তাপ্প তাপ্প মৈরাং চাউবারে কাদাৎ ডাহিয়া হাতে হাতে মাংল, 'মি আর জিংতা নাইতৌ, শৌগিরে চেইছ।'

মৈরাং চাউবার গজে খাংতা হাকহান বাগিয়া পড়িল পারা। মনহান ধরে নারল। বিনতার আতহান বুকগৎ থয়া নারগ নিকালেয়া কাদানি অকরল। বিনতাও কাদানি অকরল। দিকবিদিক শূণ্য অয়া মৈরাং চাউবা তার ভগবান গ্লোকচানর ঘরে গিয়া তার জাংহানিৎ ধরিয়া কাদানি অকরল, 'বিনতা নেয়ইলে মি কিসাদে থাইতৌতা? মোরে জিংতা কর। খুড়া ছাড়া মোরতা আকগও এ জগতে নেই।' গলোকচান তার অবস্থাহান দেহিয়া আর থাকে বাকে নুরারল। লগে লগে বিনতারে চেয়া হাবিতা হারপেইল। তা মাংল, 'এতা নুরারা ডাক্তারি চিকিৎসাৎ বালা নার, গারালি চিকিৎসাৎ বালা অইতই।' গলকচানে তানুরে তেমজেয়া নিজে কবিরাজ আনিয়া হজক খৌরানি অকরল। লেইরাপার মারুপ ভগবানর কৃপা পড়িল। হুৎতুমেও কবিরাজি চিকিৎসাৎ বিনতা পুরা বালা অইলী। নুরা জন্ম

আহান পেইল।

তানুর প্রেম আরাকও লু অইল। বিনতাই মৈরাং চাউবা নাইলে কিসাদে চলতই। মৈরাং চাউবাও হাবি সময়ৎ বনতা নাইলে কিসাদে ঠই পালয়া থাইতই বুলিয়া নিংকরের। আগরে আগই এসাদে নিংকরিয়া চলতারা। বিনতারতা মানুরাং দেমাক করিয়া মাতিলতা কিংতাও নেই - কিয়া বুললে, ধন পইসা নেই। তবে আকহান কথাল মানুরাং গরবিনী অইরী যে তেইর পতি গিরকে কুনোদিন আতহানল তেইরে থাপর আহান নাদেছে, হবানেই ধমক আহান নাদেছে। ঔতার হাদিৎ আর আর বরা বালার নিঙলর ছবি তুলিয়া ধরিরী। যেমন, 'অমুকর নিঙল ঔগ কাঠিছুরির সালেদে হেন্টক অছে, অমুক ঔগর হুনা হেয়কে বেছিয়া কিলবারি দিয়া নিকাল দেছে, অমুক ঔগরে হেয়কে মদ পিয়া নিক্কা নিক্কা কিলার, অমুক ঔগ বাপকরাং হুদা রূপা মাগাৎ আহিরী। ঔহানেতে ধনে কিতার নুঙেই? মি নুঙেই অয়া আছু।' এতা কিতা মাতিয়া মনহান তেমজেয়া থাইরী।

দিন আহান মৌরাং চাউবা বার বিনতা য়ারি পরি দিতে দিতে তার আগেকার জীবনর আনন্দময় মাহা কতোহানর য়ারি অকরল। আঠার বছর বয়সে তার মামাক আগই আকফির ছয় মাহারকা ছুটিং য়ারগা পিয়ন আগর ফামে চাকুরিৎ বরা দেনার য়ারি দিয়া হুনুরেইল। ঔ তাঞ্জা ঔগৎ বেতন পেয়া কতি নুঙেই অয়া চলেছিল, অফিসারে কিসাদে তারে বানাপেইলা, এসাদে নানা হারৌর য়ারি বিনতারে হুনুরেইল। খামতলে মাংলতাই, 'যদি মোর পিঠিৎ মানু থাইলা অইছ ঔবাকাও চাকুরি পুরা ঠিক অইল অইছ।' তা তাপ্প মাংল, 'আঃ যদিচৈ মোর চাকুরি থাইল অইছতে তোর আতহান, গারিগ রাঙাগ করে দিলু অইছ। হবা ফুতি ফালিল পুরিজেলাগ করিয়া হাজেয়া দ্বিয়গি আকসাটে বুল্লাং অইছ, নাগইতা?'

বিনতা খানি আপাংপীগ। হেয়কর মনর আশা হুনিয়া নিজরে ধন্য নিংকরল। খাংতা আবেগল হেয়কর মুঙে মেইথংহান থয়া মুকসি দিয়া আংকরল, 'যদিচৈ তি চাকুরি পেয়া ঘর দুরার হংকরিয়া ধন পইসাল জম্জম্ করিয়া থাইলেইছ, ঔপেইৎ তি মোরে বিয়া করলেইছতা?'

মৈরাং চাউবার মুরগৎ বইচাল দিল। হুদিগিৎ তাশেলগ বিধিল, টটরানির শক্তি নাপেইল। মেৎতমহানাং তার দেহাগ অসাড় অইল। নির্বাক শৌগর সাদে বিনতার মেইথংহান চেয়া আহির পানি বেলল। কিয়া বুললে আপাংপীর এ প্রশ্নর জুরাব নেই।

কোট

সাজৌ অজা স্কুলে হমেয়া চেয়ারহানাৎ বহিল। ছাত্র হাবিহান থ্রি থ্রি ডরেয়া তুমিল অয়া বহিলা। ঔ সময়ৎ অজা গিরক এগ সেইক্ষাৎ যমরাজা স্বরূপ। তু তা করিল উপায় নেই। অজা গিরক খানি আহান চিকিয়া ডাকহান দিল, 'কইতে রামগোপাল—'

রাম গোপাল ফিংহান পারা অয়া উঠিল। লগে লগে ইংগিৎগ হারপেয়া জুরাব দিল, 'অজা লাগাদেউরি।' রাম গোপাল লগে লগে হবা করে হজকারি লাগেয়া মেঙয়া সাজৌ অজার মুঙে নিবেদন করল। অজা গিরক মুক্সিহান দিয়া মাংল, 'তেস্, এতাহে ছাত্র নাই।' বং বং ধূমা নিকালেয়া অজা গিরকে হাবিরে মাটিহানাৎ আঠিলো অক্ষর হাজানির আদেশ করল। হাবিহান মাটিহানাৎ বহিলাগা বারো অক্ষর হাজানিৎ মুরখুল্লি দিলা। পাঠশালা স্কুলগর ভিতরে তক্তা পারেছিল। ঔ তক্তাৎ বয়া লেরিক পাকরলা বারো ইকরলা। ছাত্র আগর সম্পত্তি বুলতে আছিলতাই বাহার স্কেল বারো বাটুরা আগ, চাংনিঙর থলি আগ, মুকখু আগ লগে জতা আগাছ, বারো শ্লেট আহান। বাটুরাগর ভিতরে আছিলতাই পেন্সিল, ফরির কলম বারো উড পেন্সিল আগ। অনেকগ ছাত্র নানান জাতর কালি ঘরে হংকরলা। উতারমা কেহুরিয়া পাতার রস নিয়াম ব্যবহার করলা। অজা গিরকর টেবিলহানাৎ বরাবর আছিলতাই মেপ পইন্টার বারো রকম রকম মাপর বেত। ছাত্রর শক্তি বারো বয়সর তুলনা করিয়া ঔ অস্ত্র উতার প্রয়োগ চলিল। রামগোপাল হিরিঘাম বেলেয়া রাঙা চাংনিলো অক্ষর হাজেইল। অজা গিরক আটে আটে চেয়া চেয়া আরার ছাত্ররতা নম্বর দিল। কিন্তুমান রামগোপালর অক্ষর চানা ফাৎনেই নিরালহান কুচকরিয়া জুহান কামারেয়া আকফির চেইল। ঔ দুর্কাসা-রূপ দর্শন মাত্র রামগোপালর বুকগ দুক দুক করানি অকরল। মেইথংহানাৎ বৌবরনর পূর্বাভাস দর্শন করিয়া জিংতা অনির পথ খালকরানি অকরল। সাজৌ অজা টেবিলহানাৎত আহির পট মারতে

নামারতে বেতগো আতহানাৎ ধরিয়া পইলা গৌরচন্দ্র অকরল, 'হেমানতো হেমান, অলম্বুষ, গেইঙিতকর পুতক, বলডাতো বলডা। তিন বছর শ্রেণী আহানাৎ থায়াও এবাকা পেয়া অক্ষরগি ফেলনহানর সাদে হাজাছৎত - অলম্বুষ!' আর ডিল নেই! ঝটিকা আক্রমণ চলিল। গল্পাগ ধরিয়া পিঠিহানাৎ বারি বেলানি অকরল। রামগোপালর লৌশিংহানৌ কম নাগই। কিল বারি খেইতে খেইতে উতাও জিংতা অনির কিসিম কিসিম লৌশিং তারাৎ পূর্ণ অয়া আছিল।

রামগোপাল লগে লগে দোরারর নাছার সাদে ফাল ফাল দিয়া 'হইম্মা মইলু' বুলিয়া লৌদিয়া কাদানি অকরল। লগে লগে থতাদে জল নাকেদে হিঙানি, বারো আহিগিদে রা রা তপ্তা পানির হোত নিকালানি অকরল। এমন অভিনয় করল, যেমন ঔনানেই আক্রমণ চলিয়া আছে পারা। ঔ অবস্থাৎ অজা গিরক বাধ্য অয়া অস্ত্র নিক্ষেপ বন্ধ করের। এসাদে আক্রমণ রামগোপালর গজে প্রায় নিক্কারকার ঘটনাহান। বয়সও তা হাবিরাংত সাক্কাল। প্রথমমান শ্রেণীৎ তার বয়স প্রায় দশ বছর আছিল। শ্রেণীহান লেহে প্রায় দ্বিবছর। উতার গজে তা স্কুলে নাগিয়া পথে লুকানির ফিকির হিকেছিল। স্কুলে এতা এতা কারণে অজা তার গজে দুহান ধারা প্রয়োগ করানিত বাধ্য অছিল। আহান -পড়া নারানি, অন্যহান- পথে লুকানি। ঔ হাকতাকে ছাত্রই জেপগৎ খুম আকেইগি বার দড়িশৌ আগাছ থইলা। রামগোপালার জেপগৎত খুম আগ দড়িগাছলো হাবি সময়ৎ বিদ্যমান আছিল। ছুটি অনা ফাৎ নেই য়েংকে বুলিয়া খুম বুলেইল। তার মেইথঙে কুনো দিন চিন্তার ভাব না শাতছিল - হাবি সময়ৎ হারৌপা ভাব ঙালয়া আছিল।

ভারতবর্ষর জ্ঞানর সাগর উপনিষদ লেরিকে দলাগ ধর্মতত্ত্বর ব্যাখ্যা করে গেছিগা। ঔতারমা প্রাণরক্ষা এহানে শ্রেষ্ঠহান বুলিয়া প্রতিপন্ন করেছি। ঠই জিংতা করানিৎ হাবি জীব এতা সচেতন থাইতারা। রামগোপালরাৎ এহানর পূর্ণ প্রমাণ ফলেছিল। লৌশিং বাট্টি অইলেউ তা সাজৌ অজার বেতগর প্রতাপর বৌ পাছিল। তার পিঠিহান পুংখাৎ অজার বেতগরাৎ রেজিস্ট্রি করানিৎ কiyাকাওবা য়াকরত? কiyা বুঞ্জে, ঠই জিংতা করানির ধর্ম এহান জগৎহান হাপদিয়া আছেহান। কতদিন পিছে খাংতা কোট আহান লাগেয়া রামগোপাল স্কুলে হাজির অইলহা। ছাত্র হাবির আহিগি তার উবেদে কম্পাসগর সাদে বুলে গেলগা। সাজৌ অজাই কূপকরে কোটহান চেয়া হারপেইলতা হারপেইল। কালা রঙর কোটহান, তারাৎ কিত্তুমান হচরৎ। কোটহান আঠুগ ফৌঅছিল - আতহান ঠিপকরিয়া বাট্টি করেছিল। কোটহানর বয়স মাতানির উপায় নেই। তবে

অনুমান করে পারিয়ার - এ কোট এহান তার বপাকর হাকতাকরহান অইতই।
উহানেতে তিন পুরুষ পেয়া জিংতা অয়া আছে বুল্লে লাল নাইতই।

সাজৌ অজা মুক্সি দিয়া মাতের, 'ফারে ফারে - আঃ আজিতে কর্ণর কবচকুডল
দেখলাং - রামগোপাল -'

'অজা-'

'এহানতে কুরাংত পেইলেহান হে?'

'অজা বাবাই পিদেছিলহান না।'

'হান্তে শৌকরার দিনেতে কিয়া? জারপার থাং?'

রামগোপাল ফাপরে পড়িল। খানি আহান তুপিং নাপিং অয়া অজারে চেয়া মাংল,

'অজা খানি তাপ তাপ করের হান্তে...'

'বেশ, আজিৎত তোর নাং লাংটিয়া রাজা।'

লগে লগে স্কুলর ভিতরে ছাত্র হাবির আহানির শব্দলো তক্দকার অইল।
রামগোপালর নাংহান য়েবাকা লাংটিয়ার রাজাং প্রমোশন পেইল, উপেইং তার
কানহানি হিঙারানি অকরল। পইলা পইলা সৌঅয়া জির আগ্ভারাগ অছিল।
কিত্তুমান তাপ্প তাপ্প সহজ ভাবে লনি পারল। এবাকাতে তার মূল উদ্দেশ্যহান
অইলতাই গল্লাগর আক্রমণেৎত পিঠিহান জিংতা করানির বর্ম স্বরূপ কোটহান
ব্যবহার করানি। তার এ লৌশিং এহান অবশ্য ফল ধরানি অকরল। সাজৌ
অজার মরিং দুহিং আক্রমণ সুপ নাগনানি অকরল। অজা গিরক হারপেইল যে
যতদিন এ কোটহান থাইতই ততদিন গল্লাগই কাম নাদতই। উহানেতে
পিছেকার আক্রমণর সালে চৌরর হংকরা মেপপইন্টার প্রয়োগ করানি অকরল।
রামগোপাল অবশ্য তার ঔনাকার দোরারর নাছা রঞ্জ আগ নাবেলাছিল। পাচ-
ছয় মাহার ভিতরে কোটহান ঠইমামি চেলইল। এবাকাতে কোটহানর শ্মশান
যাত্রা দেহানি বাকি থাইল। অজা গিরক ত্বরা করে ঔ কাম উহান রূপ দেনারকা
কাকালি বাধিয়া উবা আছে। অজা গিরকর আতে খাংতা ডাঙর সুযোগ আহান
আছিল। আকদিন গাঙর বুজন আগো কাদিল কাদিলগ অয়া অজা গিরকরাং
নালিশ করল। বিষয়হান - ধান কিয়ার আহান ক্ষতি। কিসাদে ক্ষতি? ধানহানর
ভিতরে পথে লুকাকুরা ছাত্রই ধানহানর ভিতরগ মারা দেছি। ক্ষতির সীমা নেই।
ধানহানর জাতহান অইলতাই মুল্লাহাইল। ঔ হাকতাকে লপুকগর মুল্লাহাইলর
ভিতরে মানু আটানি ডরেইলা। এমন কি বাঘ পেয়া ধানে লুকেয়া থাইলা। অজা
গিরক সরজমিন তদন্ত করানিৎ সালইল। লগে ছাত্র হাবি সেতুবন্দর কপি

সেনার সাদে পিছে পিছে লগ ধরলা। ইরাইরি আয়া ধানহানর পালপাকবারা চেয়া ভিতরে হমেইলাগা। ভিতরগর অবস্থা দেহিয়া অজা গিরক নাখাঙয়া নারল। ধানহানর হম্বুকুং ঘুমজানির সেপ করেছি বার দাবদানিরকা দলাগ পথ চারিয়বারাদে হংকেছি। মাংতে গেলগা দুর্গ আগ। ধানহান ক্ষতির বারাদে সালছে এহান হুংতুমেহান। সাজৌ অজা ঘুমজানির ফাম উহানাং চশমা মার্কা সিগারেট খালি পেকেট কতগ পেইল। লগে লগে হারৌ অয়া - 'চরগ ধরলু - চরগ ধরলু' বুলিয়া লৌদিল। আর ডিল নাকরল। চির চির স্কুলেদে যাত্রা করল।

অজার আটানির খংচেংহানাং হারপেইলা আজি দক্ষ যজ্ঞ নাটক অভিনয় অইতই। রামগোপাল আকখুলাগই স্কুলর বারান্দাগং খুম বুলানিং লাগেছে। অজারে দেহানি ফাংনেই ক্রাসে হমেইলগা। অজা ভিতরে হমেয়াও রামগোপালর গজে ইমারজেন্সি সমন জারী করল।

'হেই অলম্বুষ, গেইঙিতকর পুতক, তিতে কিয়া ধানহান চানাং নাহিলে - পথে লুকালুকা, বলদ - আজি লাংটিয়ার পাকহানি কাপতৌ দিনহান - হয় তি নয় মি -'

রামগোপাল দাবদানির সেপ করতেই অজাগিরক পাহিয়ার বাঘগর সাদে কোটহান ধরিয়া মেপ পইনটারগলো বারানি অকরলো। একেতো ঠইমামি চলছে কোটহান। উতার লগে এমন ঝটিকা আক্রমণ দেখলে মনে অইল যেন কার্তিকর পালির ডোলর ফাংনহান চলেছে পারা। আকবেদে আছুলা আছুলি, আরবারাদে বপ্ বপ্ শব্দ হাদিৎ 'হইম্মা হইম্মা' শব্দ স্কুলর ঘরগর ভিতরগ ধুমেলর তাললো তপ্তা অপড়িলগ। খাংতা চ-র্-র্ শব্দ আহান কানহানিং বারি দিল। অজার আতে কোটহানর অংশআহান থাইল - লাংটিয়া রাজা দাবদিয়া ঘরেদে সালছে। বরিগৎত মুকদিয়া মাছগ যানার পিছে বরিগৎ যেসাদে মাছগর থতাহানর অংশ আহান য়ালয়া থার - উসাদে অজা গিরকর আতেও কোটহানর টুমা আহান য়ালয়া থাগেলগা।

কতদিন থাংনাং যমরাজার বাহনগর গজে চড়িয়া বাশি বাজার আগরে দেহিয়া ছাত্রহাবির সন্দই আহান অইল। খানি বাছেয়া থানার পিছে মেইথংহান বুলেইতেই হাবিয়ে চিনলা - অঃ রামগোপাল!

ম্যাজিক ছাতি

‘গেইঙিতকর পুতক। আতহান পাত।’ থতাহানাৎত কথাহান এরাতিয়া আতহানাৎ লিকলিকা বেত্‌ভাঙর বেত আগ ধরিয়া সাজৌ মাস্টর ব্রজবেহারীর উবেদে ধারা করল। যদিও সাজৌ মাস্টর পক্ষে সাধারণ বেত্‌ভাঙর বেতগ কিন্তু ব্রজবেহারীর পক্ষে সাক্ষাৎ যমদন্ড স্বরূপ। উহানেতে ব্রজর অবস্থাহান সহজে অনুমান করে পারিয়ার। ঐ যমদন্ড উগ দেহানি ফাৎনেই ব্রজর বুকগ হুকিয়া গেলগা। খৌনিগৎত নিংশাহান নুকুলিয়া থতাহানাৎ উবা দাবদানি অকরল। তার কিন্তু উপস্থিৎ বুদ্ধি হবা। দেহগরে অষ্টবক্রর দেকি বেকা করিয়া আতজোড় করিয়া কাদিং কাদিংগ অয়া মাংল, ‘অজা আজি না কিলেইনে মোরে? কালি বেরেডি বার বেইনংগ মাহেই আনে দিতৌ।’

কথাহান হুনানির লগে লগে মাস্টর মহাশয়ে তার যমদন্ড উগ সামালেয়া। গারগর নারগো তারাৎত উদারাৎ লামেয়া মাতল, ‘আজি এরেদিলু, কিন্তুমান কালিতে বেরেডিয়ে বেইনঙে ভর না ধরতই। কথাহান লয়করিয়া চেয়ারহানাৎ বহিলগা। ডিগল বারো পাতালা চেহারাগ সাজৌ মাস্টরর। চামহানর রং পুলেই কচুৎত খানি কালা। বয়স যাংখেই পানা নাপানি। মুরগর চুল খানি আকতা কাচা, আকতা কলা পাকনা, বাকি উতা মজা। গজর পাটির দাত দুগ আহান নেয়ছিল। টটরতে থতাহানাৎ কাপক ফুটিং ফুটিং অবস্থা। স্কুলে পড়া নুরারলে বেত্‌ভাঙর কৃপা পরশন, গারগৎ অর্ধচন্দ্র সহযোগে পিঠিবারাদে ধনঞ্জয়র প্রক্রিয়া ছাত্ররাৎ সমান তালে চলিল। ত্রিদশাৎত পুরি জিৎতা অনা মনেইলেই ব্রজবেহারীর বেরেডির বীজো উগ থতাহানাৎ ফুটেইলেই বেশ। মাইকেলর ভাষাৎ - মহামন্ত্ৰ বলে যথা নম্রশির ফণী। মাস্টর মহাশয়র লগরতা বুলতে বিশেষ কুনোগও নেই। মানুর লগে আড্ডা দিতেও কুনোদিন নাপাছি বার নাদেহেছি। তবে হাই, আগরেতে হাবি সমইৎ দেখলাৎ। জার বারো সৌকরা দ্বিয়কালেই লগে থইতে আপত্তি নেয়ছিল তার। আগ বুলিয়ার উগ অইলতাই তার ছাতি উগ।

সৌকরার রইদর দিনে, বরিষার বরনর দিনে তা কুনোদিন ছাতি উগ সালকরিয়া মুরগর গজে না ধরের, অথচ আহাতুলির তলে ছাতিগ বিদ্যমান। তবে লোক পরম্পরাই হুনলাং যে দ্বিমাইলর ভিতরে আহিৎ মানু না পড়লে অতি সন্তর্পণে ছাতিগরে পেখম ধরুরেয়া মুরগর গজে থর। মানু দেখলেই বারো আহাতুলিৎ। উহানেতে ছাতিউগর তত্ত্বকথা হুনানির মতো আমার কুনো উপায় নেয়ছিল বার সুযোগও নাপাছি।

অজানারে হারপানির আকাংক্ষা এহান মানুর চিরন্তন প্রকৃতিহান। উহানলো সাজৌ মাস্টর যতই তার ছাতি উগর রহস্যহান গোপন করে, ততই আমার মনহান রহস্য ভেদ করানিরকা দ্বিগুণ উৎসুক অয়া উঠে। অনেক দিন ধরিয়া ছাত্র মহলে এ বিষয় নিয়া আলোচনা চলতে থাইল। হাতীরও একদিন পা পিছলে - মিয়াঙর পৌরেই আহান আছে। আকদিন খাংতা মাস্টর মহাশয়র গজে শনিদেবর কুদৃষ্টি পড়িল। প্রাণবন্ধু ছাতি উগরে অসহায়ভাবে বেলেয়া কুংবেদে ধূমা আসুলাং গেছেগা ঠিক নেই। সুবর্ণ সুযোগ! আতহানর লক্ষীরে কুংগই জাঙেদে ঠেলার? বহুদিন পিছে ছাতিগরে পেখম ধরা অবস্থায় চেয়া নয়ন দ্বিয়গিরে সার্থক করানি। কত ভাগ্য! মিতে কুন ছার, ডাঙর অজা পেয়া ছাতিগর পূর্ণাবয়ব দর্শন পানার কামনা বাসনায় বিভোর। পইলাকার রাগহানাং কিন্তু গন্ডগোল লাগিল। ও ছাতি উগর পাকহানি সালকরতইগাগতে কুংগ? তারাং আতহান দেনাতে দূরেইং থাক কাদাং চেপনির মত বুকগর পাটা আকগরতাও নেই। মহাশয়ে হারপেইলেই হয় তি থাক নয়তো মি থাইং অবস্থা। ছাত্র হাবির মন ফর্ ফর্ করানি অকরল। এবেদে সময়ও নেয় আহের। উহানলতে অন্তিম কালর একমাত্র কাডারী সেই 'যেবা যেই বাঙ্গা করে কল্পতরু' শ্রীহরির শরণাগত অইলাং। লগে লগে ফল ধরিল। ডাঙর অজাই হাতে হাতে নারগ নিকালল, চক্রবর্তি, আজিতে ছাতিগো দেহিক। যাম হবা করে বাধ-বোত চা। তা সুপ হার নাপেইবতা। কথাহান কানের ভিতরে গিয়া মরমে পৌছানির আগেই বরনর দিনর লেইশৌর দেকি ছাত্র হাবি আকপেইং পুলয়া কিলবিল করানি অকরলা। পি সি সরকারর ম্যাজিক দেহানির খৌরাঙে গাবুরাপুরাই বাপক লকেইর বারনে হমানির বারো পুরিজেলেয়ে মালক লকেইর বাহ্যর চুঙ ফারানির যারির হুনলেও আহিলতে নাদেহেছই। সুতরাং এ গুহ্যতত্ত্ব এহান ফলাও করে মাতিয়া সম্প্রদায় দ্বিয়হানর চক্ষুঃশূল অইল প্রয়োজন নেই। কিন্তু ধান বার চুঙর পয়সাতে তুচ্ছ। আমার অমূল্য চাংনিঙর খলিয়া বারো বাটোরাগি পেয়া কুংবেদে বেলেয়া অইলাং

ঠিক নেই। চক্রবর্তি বীর পদক্ষেপে ছাতিগর কাদাৎ গিয়া ছাতিগ তুলল। বাতবোত হবা করে পরীক্ষা করিয়া 'জয় মাবৈ' বুলিয়া ছাতিগর পাকহানি সালকরল। খাংতা যেমন কুম্ভকর্ণর ঘুমহান বাগিল। ছাতিগ সালকরিয়া টেবিলহানর গজে থইল। ছাত্রর থতাৎ মাছি বইতেও হার নাপেইলা। ছাতিগর মূলফুতিহান দেহিল কুনো ক্ষমতা নেই। পুরাপুরি দ্বিগু সমাসর কারবার। রাঙা, নিলুরা, দলা, চিতারা রঙর অণুতালি, মধ্যতালি বার রাজকীয় তালির বিরাট সমাহার। মাস্টার মহাশয়র সৌন্দর্য জ্ঞান কিন্তু প্রবল। দলা চিতারা ফুতি উতারে কালা করানি অইলেতে কেহুরিয়ার রসর (বর্তমান খাদি কালি বুঙ্গেও যাকরের) সাহায্য নিতেগা কুনো রকমর কৃপণতা নাকরেছে। ছাতিগর বয়স লেপকরানির মত উসাদে ক্ষমতা না থাইলেও হুদা অনুমানর সুভ্রগ ধরিয়া মাতে পারতো যে মোগল রাজত্বর আমলে নাইলেও ইস্ট-ইন্ডিয়া কোম্পানির হাকতাকে জরম অছেগ। মাস্টার মহাশয়র আগেকার বেয়াপার মেইথং পাল করিয়া এবাকা অবসর অয়া সাজৌ মাস্টারর আহাতুলির তলে বুড়াকালর বিশ্রাম করানিং লাগেছে। উত্তরাধিকার সুত্রে ছাতি উগ পেইলেও তা কামে নিয়াম লাগা নুরারেছে। উতাপেয়া ছাতিগো না সালকরল। মূলহান উপ পারলু। ম্যাজিক লমইল। হাবি ফামে আসন নিলাগা।

দ্বিমিনিট পিছে সাজৌ মাস্টারর আবির্ভাব। লগে লগে কতগই সিকি মাত্রা, কতগই অর্ধ মাত্রা, বাকি উতাই পুরা মাত্রা ফিকফিক আহানি অকরলা। উহান দেহিয়া মাস্টার মহাশয়র বুকগৎ শক্তিশেলগ পড়িল। ফিঙয়া তার রকেটগর বারাদে আহিথম বুলেইল। ধরে নুরারল। খাংতা বাবুদর দেকি ফাটিয়া মাংল, 'কিয়া আহরাইতা? দেখতাই হু!' হাবিহান চুপ। ঠাঙা বরফ। হাতে হাতে চক্রবর্তিয়ে গারিগ কুনোমতে উবা করিয়া আত হানিলো ভংগি করিয়া মাংল, 'অজা কালি শ্যামই উনি এগুলিগ্গারা গাত আগৎত এগ্গপারা মাগুরা ধরেছিল।' মাস্টার মহাশয়র থতাহানাৎ আনন্দর জোরার আহিল বারো লগে লগে ঝলক আহান আহে বেলল। তার লগে পবুয়া হাবিয়ৌ যোগ দিয়া তারার পঞ্চমে সুরগ তুললা।

ফাগু

পোষ্ট অফিস

বসন্ত ঋতুর আগমনর পৌহান পেয়া আম্র কুঞ্জবন নুরা কঙালা পত্রাঞ্জলি আতে থায়া ঋতুরাজর পূজারকা বাছেয়া আছি। অনেকদিন লুকেয়া থাইরী কোকিলাও মেইথংহান নিকালল। হারৌহানে থা নুরারিয়া তেইর কালা ফরি উহানি মেলেয়া ফরদে ফরদে এ পৌহান বিলানিৎ লাগেছে। তেইর কঙালা অথচ ভুবনমোহন সুর উগর ঝংকারে জগৎহান আনন্দ উৎসবে মাতিয়া আছে। চারিবেদে হারৌপার মেলা। হাকহানর নীলুরা কোণ আগদে মেঘর খঙ কতোহান তানুর দলা ফুতি উহানি উরিয়া নিঃশব্দে বয়া আছি। হাদি হাদিৎ বৌহানে পাতার কুঞ্জে কিতাপারা আকেইগিরে লাংকরে লাংকরে কুনবেদে নিবুদ্ধেশ অয়া যারগা। বেলি গিরক পশ্চিম দিগন্তে থায়া তার কঙালা মিঙাল উহানল পৃথিবীহান ঙালকরিয়া থেছে।

এসাদে দিন আহানাৎ চন্দ্রপুর গাঙর মুঙর পথগ ধরিয়া বরাবর চলতে আছে মানু আগ। সুপুরুষগ মাৎলেও যাকরের। তবে যৌবনর জোরার হাতে হাতে ভাটিয়ল দেনা অকরেছে। বয়স দ্বিকুড়ির কাদাকাদি। আহিগিৎ চশমা। নীলুরা রঙর সুট বার কোট গারিগৎ। চেইলেই ডাঙর চাকুরিআলাগ বুলিয়া আহিগৎ ধরের। কপালহানাৎ ফুটিয়া আছে কর্মময় জীবনর প্রদীপ্ত রেখা। মেইথংহানর ভাব গম্ভীর অথচ বানাপেইল রাসিহান বর্তমান। হাদি হাদিৎ উদাস অয়া চারিবারা চেয়া থার, বার হাতে হাতে পথগ ধরের। কুনো আগর লগে কথা নেই। অনেকগ পিছে পুরাণা পহরি আগর মুঙে আয়া উবা অইল। হাতে হাতে পারগর গজে আয়া উবা অয়া থাইল বার পহরিগর চারিবারা হবা করে চেইল। খানি পিছে পহরিগর মুঙর পারগর তিরা আকজারির কাদাৎ আয়া উবা অইল বার দৃষ্টি আহানাৎ গাছ উজাররে চেয়া থাইল।

খাংতা দিন আহানর দৃশ্য তার মুণ্ডে বাহিয়া উঠিল - পহুরিগরমা বুকগ
সেনাপুলগর অজে থয়া আস জেলাগর সাদে পানির গজে গজে খেলা খেলা
ডেপর ফুল ছিড়ানিৎ লাগেছে কেতকী। মাদানকার বেলির মিঙালহান তেইর
দেহাগর গজে পড়িয়া তেইরে আরাকৌ লাবন্যময়ী করেছে। হুনর মাচু গারিগরমা
রাঙা যাবেবুনিহান নাপয়া তেইরে আরাকৌ রূপবতী করেছে। খানি আহান বিভূলা
অয়া চেয়া খাংতা তেইর মিঞ্জেলহান বুলানির সালেদে কমলে পানিহানাৎ টেম্পাক
আগ উরা দিল। শব্দহান হুনানি ফাৎনেই ফিংহান পারা অয়া বুলন দিয়া চেয়া
কেতকীয়ে খিল-খিল আহিয়া মাংল-

‘অ কমলদা! কুম্বাকাৎত আহেছৎগ?’

‘বান্ধা আগেৎত। তোরে চেয়া চেয়া মি বন্দনা আহান রচাউরিতা।’

‘কালিদাস কবির শিষ্যগ হানতে রচেইতেইনাই। হুনিং বেনাই বন্দনাহান।’

কমলে দ্বিগুণ উৎসাহল মাতানি অকরল, ‘নমঃ তস্মৈ, নমঃ তস্মৈ, নমঃ তস্মৈ,
নমঃ নমঃ। যঃ দেবী পদ্মবনেষু হংসীরূপেন সংস্থিতা।’ কমলে আতহানি বন্দনার
সিজিলে থয়া বার মাংল, ‘নমঃ তস্মৈ, নমঃ তস্মৈ, নমঃ তস্মৈ, নমঃ নমঃ। যঃ
দেবী পুকুরঘাটেষু কুম্ভ কক্ষেন সংস্থিতা।’

কেতকী আতহানলো থতাহান গুরিয়া আহানিহান থামেয়া মাংল, ‘বাঃ - পুরা
কালীদাস পণ্ডিত। মোরেলো কাব্য আহান ইকরতে নাপাহুরিছ।’

‘তথাস্থ, কাব্য আহানতে কিয়া, বহু। কিন্তু তি রস না যোগেইলে মোর কলমগতে
কিসাদে চলতই? উহানলো তোরাং শরণাগত কিংকর ভীত মনে মম দয়া কর
প্রিয়ে দীনজনে।’ কমল আহিয়া চেয়া থাইল।

‘হু! তোরে লগে কিসাদেগই কথার আরাআরি করতইগ? তোরে দেকি মানুরে দীক্ষা
দিলেই হাবিতা শেষ। মানে, দ্বিদিন যিতেগা নাযিতেগা গুরুরে দেউলিয়া করে
বেলতেই।’

‘তোরে অভিযোগ, অনুযোগ, বিযোগ বার পূরণ হুনানির সময় নেই। মাতিলহান
ত্বরা করে মাং।’

কেতকী সেনাপুলগ হিলগর গজে থয়া কুন্দপুষ্পর দেকি দাত উগিলো কেঙ
আঙুলিগ কামারেয়া থতাহানাৎ মুকসির জোরার, আহিগিৎ হারৌপার ভাব তুলিয়া
মাংল,

‘ওরে মুণ্ডে আছে তিরা উজার দেহরতা?’

‘হুম্।’

‘উজারর খানি গজে পারা আছে গাং উগ অইলতাই আমার পোষ্টাফিসগ।’

‘কিতা?’

‘হাঃ এহানিও বু নাপড়লে!’ কেতকী চেয়া থাইলী কমলরে।

‘অহো আগেত মি মাতেছুগ। এ বিষয়ে তোরাং মি শরণাগত কিংকর।’

‘মানে তি নিক্কা চিঠি ইকরিয়া ঔ গাং ঔগং থদিছ। মোরতাও উগংত পেইতেই। দীক্ষা দিয়া নিয়াম সময় থানা থকনেই,’ বুলিয়া গরবিনী কমলর দারছেদ কথার আগেই তুরা অয়া ঘরবারাদে জাঙহানি তুলল।

পরিকল্পনাহান ঠিকঠাক অনার পিছেই দ্বিয়গিয়ে উহানরে রূপদান করানিরকা উঠিয়া পড়িয়া লাগলা। কমল নিক্কার দিনে চিঠি ইকরিয়া পোষ্টাফিসগর ভিতরে বেলা দিয়াদের বার কেতকী উহান পেয়া যথাবিধি উত্তর ইকরিয়া থদিয়া দিরা। বুড়া তিরাজাররে পোষ্টমাষ্টরর পদে ফাম দিলা উহানেতে পোষ্টাফিসগ পাহাড়া দেনার আর কাম নেই। চিঠি মাঙনির মত পথও নেই। দ্বিবছর এসাদে চলিয়া গেলগা। কোনো বাধা নেই, বন্ধনও নেই – হুদা আনন্দর মেলা।

মিঙালর পিছে পিছে বুলেরতাই আধার। জরমর পিছে আছেতাই মরণ। হারৌর পিছে পিছে আটেরতাই দুঃখ। ভগবানর এ চিরন্তন নিয়ম এহানর আর পরিবর্তন নাইল। মানুর জীবনে যেহানি আনন্দ উপার্জন করেছিল উহানি নিঃশেষে ভোগ করিয়া লয়করলা। অবশিষ্ট বুলতে নেই। উহানেতে দুঃখর কালা আধারর জালে বার বন্দী অনা অকরলা। কমলর বাপকর লগে কেতকীর বাপকর মোকদ্দমা চলিয়া আছিলতাই অনেকদিন ধরিয়া। ভিটাগর মোকদ্দমাহান। ভিটাগর মালিকগ অছিলতাই কেতকীর বাপক। হবানেই খেলতামে পড়িয়া কমলর বাপক মোকদ্দমাং হারিল। পিছর দিনে ভিটাগ এরে দেনার নির্দেশনামাহান কমলর বাপকর গজে জারি অইল। নিয়াম ডিল নাকরিয়া কমলর বাপকে আতে আছিল রূপা উতালো দূরেই দেশ আহানাং ভিটা আগ লয়া আকুবালা যানারকা ঘরে ফৌঅইলহা। কথাহান হুনানির লগে লগেই কমল প্রায় অবশ অয়া পড়িল। পৌ এহানে কতিরৌ অন্তরগ জ্বলেইল উহান মাতানির মত কথা নেই। ফামহানাং ঘুমজানিরকা গেলগা কিন্তু আহিগিং ঘুম নেই। আকাশ পাতাল খালকরানি অকরল কিন্তু কোনো পথ বিসারেয়া নাপেইল। কমলর আহিগিং আজি পেয়া আহির পানি ফুটা আগ কুনোগই নাদেহেছি। কিন্তুমান

আজি উহানর ব্যতিক্রম ঘটিল। নিঃশব্দে তপ্ত আহির পানি তার গালগর বারাহান তিঙা তিঙা মুরগর তলে আছে মল্গ তিঙেইল। আকবেদে জনমর ফামহান, গাঙর মারুপ-মাসাং, অন্যবেদে জীবনর পইলা ফুটন্তি ফুলগ - কেতকী। হাবিরে আকেইগি করে জীবনরকা বুলিয়া বেলেয়া যানা! কমল কুনোমতেই নিজরে সামালা নুরারল। দ্বিতিন দিনর ভিতরে কমল একরকম ফামহানর আশ্রয় নিলগা।

কতদিন কমল পোষ্টাফিসগর কাদাং নাগেলগা। কুনো আহান হারপানির মত মনহান নেই। কেতকীরও কুনো পৌ নেই। হাতে হাতে দিনহান বাটি অনা অকরল। চেইতে চেইতে দিনহান মুঙে হাজির অইলহা। কালি বিয়ানেই ররানা দেনা - পরিচয় বার নিজর মানু নেই ফাম আহানাং। কমলর আটানির পাংকালহান অনেক কময়া গেছেগা। তবুও শেষ সময়ে লমনির মত নিজে চেয়া যানার আশাই দুর্বল দেহ উগলো হাতে হাতে কেতকীগাছিরাং গেলগা। কিন্তু কল্পনার বার বিশ্বাসর বাহিরর পৌ আহানে কমলরে আরাকও নিস্তেজ করিয়া বেলল। কেতকী নেই। দ্বিদিন আগেই মামাকর ঘরে গেছেগা। কমলর মুরগ ভোঁ ভোঁ করানি অকরল। অনেক ক্ষণ থায়া অনেক ভাবল। একমাত্র আশাহান হুদিগং থায়া পোষ্টাফিসগর শরণাপন্ন অইলগা। কিন্তু হায়! কপাল মন্দ অইলে হাবিতাও মন্দ। পোষ্টাফিসগং কুনো চিঠি নেই। কমল পাগলগর দেকি ঘরেদে সালইল।

ধন-পইসাগত প্রতারণার ব্যাপারে মানু নিজর মনোবেদনারে সহজে পারতারা সহিয়া যানা। কিন্তু প্রেমর প্রতারণা সহ্য করানির মত শক্তির মানু জগতে থাইবা বুলিয়া কল্পনা নেই। সুতরাং প্রেমর প্রতারণার জ্বালা কমল কুনো মতে সহ্য করে নুরারল। প্রেম স্বর্গর দান। উহানরে নারকীয় পরিসমাপ্তিং বেলানি কুনো মতেই কমল গ্রহণ করানি নুরারের। কেতকী অমাটিক হুরু স্বভাবরগ অইব এহান কমলর চিন্তার বাহিরে। এদিনেই ধরিয়া প্রেমর যে মন্দিরগরে সাজেয়া থাছিল আজি যানার দিনে কেতকী অতি নির্মম ভাবে চূর্ণ বিচূর্ণ করিয়া বেলল। কেতকী ছলনাময়ী, রাক্ষসী নিষ্ঠুরা! বরাবালা আদরর নিঙলগর লগে রায়ংগর পুতকগর প্রেমর স্থিতিহান আহিৎ আহিৎ দেহুরা দিয়া গেলিগা। দুঃখে অপমানে অনুতাপে কমলর দেহগর রকং হাবি শিরাই শিরাই রি রি করানি অকরল। প্রতারণার প্রতিশোধ নিয়া যানারকা দেহগ বিদ্রোহী অয়া উঠিল। কিন্তু অস্তুর সাহায্যে প্রতিশোধ গ্রহণ নাকরল। তাই অস্তুর চেয়ে শক্তিবান কলমগর আশ্রয় নিলগা।

লগে লগে শত শত কালা কালা সুতীক্ষ্ণ বাক্যবান দলা চেহানরমা লুকেয়া থইল।
 বিয়ানহান ফুরেইল। বেলি গিরক মেঘর আড়ালে আড়ালে থায়া তার কঙালা
 মিঙাল উহানলো পৃথিবীরে মাঠিয়া দেনাৎ লাগেছে। কমলগাছির চির বিদায়
 এহান যেন বেলি গরক নিজেই চেয়া থানা নামনার। উহানলোছাৎ লুকালুকি।
 গাঙর শৌরাংত অকরিয়া বুড়াবুড়ী পেয়া কাদে কাদে বিদায় সম্ভাষণ জানেইলাগা
 কমলগাছিরে। কমলর ভাবহান কিন্তু আরাক জগৎ আহানাৎ। তার বিদ্বেষ বুজা
 বাক্যবাণর চিঠি উহান পোষ্টাফিসগৎ থদিয়া যানারকা তিরাজারর কাদাৎ আয়া
 উবা অইলহা। কুনোতা নাভাবিয়া চিঠিহান পোষ্টাফিসগর ভিতরে থদিল।
 আশাহান - কুনো আকদিন কেতকীয়ে নিশ্চয় পেইতই। শেষবারর মত হাবিতা
 চেয়া যানারকা জাংহান তুলল। খাংতা কৌরা কতগর বিকট রৌহানে কমল
 তিরাজারর গজেদে মিল্লেং বেলল। চিনুনি আগই কৌরার জম আহান আক্রমণ
 করানিৎ লাগেছে। তুমুল যুদ্ধ চলানিৎ লাগেছে। চেইতে চেইতে জমহানর
 খেইপক বাগিয়া পড়িল। বাগা জমর অংশ উহান কমলর কাদাৎ আশ্রয় নিলগা।
 লগে লগে হুর্কাৎ চে টুমা আহান বিচ্ছিন্ন অয়া তার জাংহানর কাদাৎ পড়িল।
 কিহান খালকরিয়া কমল চে টুমা উহান আতহানলো লকরল। হাঃ কী আশ্চর্য
 ঈশ্বরর লীলা! সাধারণ চে টুমা নাছে। কেতকীর কঙালা করপদ্ম পরশনর শেষ
 পত্নহান! কালা কালির রেখা কতোহানে সযত্নে ধরিয়া থছে কেতকীর মনর
 কথারে! নিংশা আহানল পাকরে নেরগা কমল -
 কমলদা,

বহু আপন জন মোর মুণ্ডেৎতপুри চিরদিনকারকা চলে গেলাগা। হাবিরে
 মোর এ নয়ন দ্বিয়লো চেয়া থানা পারেছিলু। কিন্তু তরাং এ আহিথম এহান
 পরাজয় বরণ করল। উহানলো তি যানার আগেই মি সেচিয়া পড়লুগা। মোর
 আচরণে তি মনে অনেক দুঃখ পেইতেই উতা হারপাউরি। কিন্তু মি যে একান্ত
 উপায়হীনা। মি মোর হাবি দোষারকা তোরাং ক্ষমা চাউরি। তি কুনোদিন মোর
 কুনো কথার অবমাননা নাকরেছৎ। তাই ওঁ আশা থয়া তোরাং মোর শেষ
 প্রার্থনাহান নিবেদন করলু। আজি মোর মাতিলতা কিংতাও নেই। ইকরানির মত
 মনর কথা হাবি ভাবর তলে চাপা পড়িল। ইকরিল কুনো শক্তি নেই। যতদিন
 শ্রীকৃষ্ণ অর্জুনর লগে আছিল ততদিন গান্ধীবহানর শক্তি আছিল, তাই
 অপরাজেয়। কিন্তু শ্রীকৃষ্ণ অর্ন্তধানর পিছেই তার শক্তি নেয়ছিল কুনো। মোর
 অবস্থাও উসাদে। তোর অনুপস্থিতে মোর জীবনে কুনোতাও আর অবশিষ্ট

নেই। মনে অর আমার পোস্টাফিসগ আজিৎত আর না খুলতই। পরিশেষে ভগবানরাং মাগৌরি যে আকদিন তি ধনে, বিদ্যাই, মানে জীবন হান ঙাল করিয়া গৌরবর মুকুটগ পিদিয়া মোরে দাবী করিয়া নিয়া যানারকা বাবার মুণ্ডে উবা অইতেইহা। আশা খৌরি তোর ডেকি মানুগর পক্ষে নিয়াম সোজাহান। মি উদিন উহান বাছেয়া থাইলু। ইতি -

তোর চিরদাসী কেতকী

এক, দুই, তিন... না তবু মনহান না দমিল। একে একে বহুবার পাকরিয়া নিলগা। কম ইকরেছে বুলিয়া কমল মনে দুঃখ পেইল। প্রত্যেকগি অক্ষরর ভংগি কমলর আহিগির মুণ্ডে অপূর্ব শিল্প সৃষ্টির নিদর্শন অয়া বাহিল। বাঃ কতি হবা লেখা। আহিগির তৃপ্তি শতবার চানির পিছেও সুপ না কমে। বরং বাড়ে। আজি প্রত্যক্ষ ঈশ্বর করুণারে অনুভব করল। কৌরাগর চিঠি চরকরানির দোষহান ভগবান যেন নিজেই বিচার করল। হাতে হাতে তার ইকরা চিঠি উহান পোস্টাফিসগৎত নিকালেয়া খন্ড খন্ড করে বেলল। খাংতা কাদানির হকগই খৌনিগ বন্ধ অয়া আহিল। কুনো মতে নিজরে সামালেয়া চারিবারা হবা করে চেয়া মাংল, 'হে মর জন্মভূমি, মৌনমুখী পহরি, কেতকীর হংকরা পোস্টাফিস... বিদায়... চিরবিদায়...'

কেতকী নেয়ছে আজি। অসহায়ভাবে কমলরে বেলা দিয়া মরণর পরপারে নিরবে ডুবিয়া গেলিগা। চিঠিহানর পিছেদে কেতকীর লগে কমলর আর দেহা অনির কুনো সুযোগ নেয়ছিল। কমলর অঙয়া যানার মাত্র বছর আহান পিছেই খাংতা টাইফয়েড নুরারার কবলে পড়ে পড়লিগা। তাপহানর হাদিৎ বিভুল অয়া হাতে হাতে অস্পষ্টভাবে 'কমলদা কমলদা' উচ্চারণ করেছিল। কিন্তু হাই, কুংগই তেইর ভাবহান উপইতই। কুংগর কানেওবা ঔ হৃদয়বিদারী কথা উহান ফৌ আইতইগা? হুদা কমলর বদলে থতাহানাৎ কমলার রস দিয়া দেছিল শিচ্ছিল। কিন্তু উতাই কী কমলর খৌরাংহান মিটতইতা?

বিদ্যা, ধন, মান হাবিতা তিলে তিলে আকর্ষণ করিয়া কমল গৌরবর মুকুটগ পিদিয়া আহিল কেতকীরে দাবী করিয়া নিয়া যানারকা। কিন্তু অদ্ভুত বিধাতার ইচ্ছা। কমলর জীবনর হাবি বাসনারে নির্দয়ভাবে ছেদ আহানাৎ খেইকরিয়া বেলা দিল। আজি প্রতিমা নেই, আছে জীর্ণ শীর্ণ কাঠামহান। বাছেয়া আছু বুলিয়া জীবনকারকা বুলিয়া ফাকি দিয়া গেলিগা। পনরো বছর পেয়া উবা অয়া

আছে তেইর একমাত্র চিহ্নহান - পোস্টাফিসগ। কমল বিভুলা অয়া উদাসীনভাবে পোস্টাফিসগ চেয়া থাইল। খাংতা কিহান মনেয়া গাংগর ভিতরে আতহান থইলগা। মনে মনে আরাক চিঠিহানৌ আহান আশা করে। যদিচৈ কেতকীয়ে থয়া গেলেগাতে। কিন্তু কপালদোষ, পোস্টাফিসগও শূন্য। এক দুই নাগই পন্দর বছর বন্ধ অয়া আছেগ। কমলর মনোভাব হাতে হাতে অন্যরূপ অইল। কাদানির হকগই বুকগ নিয়াম বরি করে বেলল।

সাধারণ তিরাজারর গাংগ। উগর নেই কুনো প্রাণ, নেই ভাবরূপ বারো ভাষা। হয়ত দ্বিদিন পিছেই বানুকর নির্মম আঘাতে শতছিন্ন অয়া জিতইগা। আজি কিন্তু কমলর আহিগত অন্যরূপ। এ পোস্টাফিস এগর যে রূপ, যে ভাব, যে প্রাণ, যে ভাষা হাবিতা অন্তরর তলে লুকেয়া আছিল, আজি হাবি অনুভূতিলো তা অনুভব করল। তুচ্ছ গাংগ নাগই, কেতকী শেষ অভিজ্ঞান চিহ্ন। তীর্থক্ষেত্র পেয়া তুচ্ছ মনে অর। কিংতাও নেই মাটির দৌগ যেসাদে ভক্তুর হৃদয়রে আকুল করে। উসাদে এ নগণ্য গাং এগ কমলরে অনাদি কালর ভাবর রসে তিঙেয়া ভাবর সাগরে ডুবেয়া থইল। এরপিছে, এরপিছে, কমল আহিগির শেষ পাওনার চাহনিহান চেয়া লইকরল। আত হানলো দিয়া গেলগা তার শেষ বানাপেইল মাঠিয়াহান। ভাবলো জানেইল চিরদিনর নীরব বিদায়। হাতে হাতে আহির পানির ধারাই আখিগ আধার দেহানি অকরল। উতার লগে লগে সন্ধ্যাদেবী তেইর কালা ফুতি উহানলো জগৎহান হাবি আধার করিয়া থইল।

খুৎতল

তাপ্ত তাপ্ত আটতে আছি - আটতে আছি। কুনো আহান শব্দ-শব্দ নেই।
রাতিহান দ্বি বাজের। টেঙারার তুরারে তুরারে হিলর লুম্পাকর হাদিয়েদে কইনা-
কইঠেক পথেদে আটতে আছি। আকেইফির গজেদে কায়ার, খাংতা তলেদেও
লামে পড়িয়ারগা - কুনো দিশা নেই। ঔতার হাদিৎ কাটার ছপা মাহিয়ে
আটিয়ার পথ ঔগরে থেপকরে থেপকরে উবা অয়া আছে। হিনে জাংহানি আট
নাবুলের - জিং জিং করের। পেট্রলিঙে যানা ঠই আতে করিয়া যানার লগে
তান্না দেব। ঔতার গজে টেঙারাগ। কুনোদিন আহান ভিতরেদে না আটেছি।
তেব তেব বিপদ-আপদর লগে সিংনা দিয়া মুঙামুঙি অনা এহান সিবেইর
ধর্মহান। ঠইগিল পারাহানলেহে খেলেয়ার। ঠৌনাল হাবি সময়ৎ থেংনা দিতে কা
আনচিল নায়ার। জংগলে নাগা পাহাড়র পথগ দুর্গম। উতারে ভেদ করিয়া
আটানি ইজ্জুহান নাগই। বৈরী নাগাই কুনো আকপেইৎ লুকেয়া থায়া কিহান
করতাই, ঠিক নেই। নিয়াম হুসিয়ার অয়া আটিয়ার। মুরে লুরার টুপি। টুপির
গজে গাছর ডেং। লেম্পালে রাইফেল লামকরেছি - কাকালি বেরেয়া আছে
বুলেটর বেল্ট। মরণহান পারাহানিৎ থয়া কাকেই কারিয়ার।

এ মরণর খেলার হাদিৎ আরাক আচানকর খেলা আহানল মন এহান বিভুলাগ
অছে। এমন অয়া বিভুলাগ অছে যে মরণহানরে শ্যাম সমান, টেঙারাগরে
জ্বলহান, জংগলহানরে দুরাহান, কাটার পথগরে ইজ্জুগ করে দেহে যারগা।
মনহান হারৌহানে বিভুলা - মোরাংত দূরেই অয়া হৌ কুংবেদে বুলতে আছে।
মনে মনে খালকরুরি - না, ভুল নাইতই। দেহুরি পারা... ঘুমে অচেতন অয়া
ফামহানাৎ পড়িয়া আছে - মেঘদূতর প্রিয়ার সাদে। হপনে বিভুলা অইয়া আছে।
হয়তো মোরেল খেলা খেলা আছে। মোর খালকরানির হাদিরমা, নিংশিঙর
ছবিরমা, কল্পনারমা হাবি সময়, ক্ষণে, দণ্ডে তেইরেল বিভুলা। মোর আকহান
ইম্পানি চিন্তার তেই চিন্তামণি।

খাংতা দিন আহানর ছবি আহান নিংশিঙে নিকুলিল। আহির পট মারতে নামারতে দেখলু - ঘরশৌ আগ, নির্জন গাংশৌ আহান, শনর চারি চালি ঘরগ। খাংলালহানর শনর হাদিৎ চ'ষ্টরাই যম বাধেছি। ফুরুৎ ফুরুৎ ফরদিয়া হমেইতারার বার নিকুলতার। উঠানর গুরাজারে টিল্লাই জম বাধিয়া বসতি করেছি। উঠানহানর তুলসীপুংগ বেয়েয়া মদলেই, কাপক্লেই, মাকাকলেই কিতাকিতি ফুল। গুরুদেবরে হমবুকুৎ থয়া চারিয়বারাদে শিম্বাকুল হাবি বহেছি পারা। কাদাৎ হরিউথ্থানর দিনে কুপেছি ফিরালহান উবা অয়া জাং আহানল। ঘরগর ছেয়াগ আহেছে উঠান হমবুকুগ পেয়া। মাংকলহানাং মোর নুংশি গিথানক মেইখ্যুগ অয়া বেংহানল খৌ হিজা হিজা খৌ দিয়া আছে বুনরি ফুতি উহানাৎ। হাতে হাতে তেইর পিঠিৎ উবা অইলুগা মি। পিঠিবারাদে থায়া তেইর রূপ ঔহান চেয়া আছু। খাংতা বেংহানর আগাগ মরাং লাগিল। ঙাকয়া বুলন দিল। মোরে দেহে বেলল।

'অ মোর পুড়া কপাল!' তেই গম্ভীর অয়া মাংল।

'কিতার পুড়া কপাল?' মি উল্টা আংকরলু।

জুরাব নাদিয়া মুরগ নঙেয়া থাইলি - রইদর বারি খাছে থাম্পালগর সাদে।

'মাংনে।'

'মনে হিন পেইতেই।'

'মোর হিনল মি থাইং গিথানক, মাংনে।' তেই জুরাবহান দিল আহে আহে।

'বিয়া করিল কইনা নাপানিৎ পড়লে।'

মি ফাক্ফাক্ করে আহে বেললু। তেইও মোর লগে যোগ দিল। তেই খানি থায়া জুরাগ বাধে বাধে ঘরে হমেইলিগা। কোট আহান আতে করিয়া নিকুলিয়া আহিলি। সাইকেল দুর্ঘটনাৎ আতহান ফারেছিলহান। তেইরাং লল্করানিরকা দেছিলুহান। মোর আতহানাৎ দিল। তেইর লল্করা কাম উহান দেহিয়া মি আচানক অইলু। অমাটিকর হবা ললগ। ফারেছিল বুলিয়া চিনিল উপায় নেই। হারৌহানে তেইরে মাংলু,

'তোর কাম এহানর সিংনাপা দেনার মত মোরতা কিংতাও নেই। তবে পারিল খুৎতল আহান দিতৌ, কিন্তুমান আজিতে না।'

তেই মুকসি দিয়া মাংল, 'দেনাহান অইলে এবাকা দেনা, পিছেকারতা পিছে থাক।'

'উহ্, তিও ওমর খেয়ামর কথা দেউরিতাতে। এবাকাতে কুরাংত দিতু?'

'তোর লগে আছে উগতে।'

মি ঙাকয়া তেইরে চেয়া থাইলু। মোর অংতাহান দেহিয়া তেই আহিয়া মুরগ নঙেইল। খানি থায়া জেপগদে আঙুলিগল দেহুরেইল, 'উগতে।'

'অ, এ রাঙা লেহাউ এগ?।' মি ঙাকয়া তেইরে চেইলু। তেই মুরগ খাজুরেয়া বুলন দিল।

'কিৎতাও নেই ফুল এগরকা অমাটিক কইনা-কইঠেক কথা।'

'হুংতুমেও দিতেইথাং?'

'তবে শর্ত আহান থায়া।'

'খুংতলহানাতৌ শর্ত?' ঙাকয়া চেইরি মোরে। মি মুরগ খানি নঙেয়া চুলর ভিতরেদে আঙুলিগি থায়া খানি লরা লরা মাংলু, 'খানিপ্পারা এহানি হিনপানে। মি পিদা দেনি মনাউরি তোৱ জুরাগং। ইমে এহানি।'

আহিয়া তেই মুরগ নঙেইল।

গুরুম...গুরুম... চিন্তাহান খাংতা পৃথিবীর মাটিং লামিল। হুং বুলতে হুং। মাটিহানাং উবুরি অয়া শত্রুর জুরাব দেনিরকা রাইফেলগি তাক্ করলাং। লগে লগে চালানি অকরলাং। গুরুম গুরুম শব্দল কান কালুরা অনা অকরল। বারুদর তীব্র গংহান নাকগদে বারি দেনা অকরল। বেইরি নাগার দলহান আমারাংত ডাঙর। কিন্তুমান আমার রাইফেল এতার লগে তান্না দেনা নারের। তেব তেব, হবা অয়া থেংনা দিলাং। হাবিয়ে আমি প্লাটন আহান। আরাক আধাঘন্টা থাংনাং আরাক আহান আহিতাই। আশাল বুক বাধিয়া ফায়ার করিয়ার। খাংতা 'চিং' শব্দ আহান কানহানাং বারি দিল। পাথরগং বুলেটগ লাগিয়া ফেরেংগা দিল। আহির পট মারানি নাং নাইল। মোর আঠুগর তলে আয়া বুলেটগ লাগিল। লগে লগে মি অজ্ঞান অয়া পড়লু।

মণিপুরর হাস্পাতাল আগং পড়িয়া আছু। যন্ত্রণাং ছটফট করুরি এ যন্ত্রণার মাহাকে তেইরে মনেপ্রাণে নিংশিং অইলু। মনে মনে খালকরলু - কিতাপারা তেই কাদাং থাইলইছতে - কতো খালকরানি। কিন্তুমান তেইরেতে কিসাদে দেখতৌ? তেইর লল্করা কোটহানও লগে নেয়ছে। মনহান আরাকও চিন্তাল পুড়ে যারগা, ডহে যারগা। হাঙা আহানর পিছে কেম্পে ফৌঅইলু। পইলাই উপুগ আংকরলু। কোণ আগদে লুকেয়া আছিল কোট উহান নিকালেয়া আনলু। জিংধরে চেয়া থাইলু তেইর লল্করা অংশ উহান। গারি এগ হাতে হাতে অবশ করে নেরগা। হক আগ আহিল। আর খাংকরে নুইলু। কোটহান বুকগং থায়া

ঘুমজিয়া থাইলু।

ছয়মাহা লাল গেলগা। ঘরেদে হিনপেইতাই বুলিয়া চিঠি কিতাও নাদলু। জাংহান বালা অইল। আটে পারলু হবা করে। তিন মাহার ছুটি লয়া ঘরেদে সালইলু। পইলাই তেইর খুৎতল আহান নিংশিং অইলু। কিসাদে খুৎতলহান দিতৌতা। মনে কিংতা আহানও ঠিক করে নুইলু। ইফলর বাজারহানাৎ বুলতে আছু, খালকরতে আছু। দুকান আহানাৎ তলফুতি আহান আহিং পড়িল। দুকানদারিগরে ফুতিহান চেয়া থাইলু। ফুতিহানর মাচু, লল - হাবিতাই আহিগি চরকরল। মনে মনে প্রায় ঠিকঠাক অইলু। ফুতিহানর দাম আংকরলু। দ্বিহৌ বৃপা বুলিয়া মাংল। লগে লগে ফুতিহানর গুণাগুণ মাতে নেরগা। খামতলে গুরুত্ব দিয়া মাংল যে রাণী গিথানকগাছিয়ে এ জাত কবারাঙর তলফুতি এতা পিদতারা। মোর মনহান্তে পইলাই গেছেগা উহান্তে দুকানদারিগর ডিগল ডিগল কথা মাতানির দরকারও নেয়ছিল। ফুতিহান লইলু মি।

রেলহানাৎ চড়িয়া মনে মনে খালকরুরি - রাতিহান কিসাদে লালইতৌতা। এক্সাকা ঘরে ফৌঅইলেগাতে... আর আর দিন পাহাড় লাইনর দৃশ্য চেয়া চেয়া বিভুলা অউরি কিন্তুমান আজিতে মনর ছবিরমা বিভুলা। হিনে দুঃখে ফৌঅইলুগা ঘরে, সেন্দ্রার আগে। মোরে দেহানির লগে লগে ঘরর শৌ হাবি নিকুলিয়া পথমেরাকেৎত মাল হাবি বয়া নিলাগা। অবশ্যি, প্লাস্টিক বেগগৎ লুকেয়া থছু তলফুতিহানতে আতহানাৎত এরা নাদুরি। ঘররতার লগে য়ারি-সিংকুল দিতে সময় খানি গেলগা। খাংতা তেইর কথা নিংশিঙে আহিয়া পড়িল। থাকেবাকে নারলু আর। বৌখানি খেইংগা বুলিয়া দুরাদে নিকুললু। যেতাও অক হে - বুলিয়া নিংশাহান পড়িল পারা।

কনাক কইনা আগ জিনজিনিলা হাজিয়া নিকুললি। চমকি লাগাছে আঙিহান। খাংতা দেহুরি তানুর ঘরর মুঙে মি। উবা অয়া থাইলু খানি আহান। কাকেইহান কারানি অকরলু তানুর ঘরেদে - তাপ্প তাপ্প। গারিগ রমকাটা দিল নিংশাহান বাড়ি অর পারা। উঠানহানাৎ পারাহান দিতেই বর্তি কতোগর মিঙাল দেখলু। খানি লুকেয়া থাইলু। তাপ্প তাপ্প তুলসীপুঙেদে তেই আটিয়া আহিরি। বৃন্দাগ রাসর মন্ডলীগর ভিতরেদে হমা আহিরি পারা। বর্তিগির মিঙালহানাৎ তেইর মেইখংহান বাহিয়া উঠিল। মোর নিংশাহান আরাকও বাড়ি অয়া আহের। চেয়া থাইলু তেইরে। নিংশিঙর ছবিং বাহিয়া উঠিল কালিদাস গিরকর কাব্যং জিংতা অয়া আছি আতে দীপশিখা ধরিয়া তাপ্প তাপ্প আটে যিতারাগা মালবিকাগাছিরে।

বর্তিগি পাতাশৌ আহানাৎ কুপিয়া ধূপ হেইকরিয়া ঘরেদে আলথক অইলি। আর ডিল নাকরলুমি। জুতাহান রহুরেয়া মিলিটারি কায়দাল তেইর মুঙেদে আটিয়া গেলুগা।

‘কিসাদেগথাৎ?’ তেই পিঠিৎ অয়া আংকরল। মি জুরাব নাদিয়া উবা অয়া থাইলু। তেই হাতে হাতে মোর মুঙে উবা অইলিহা। বর্তির মিঙালহানাৎ তেইর ‘মেইথংহান দেহে বেললু। তেই ঙাকইল। কুনো আহান মাতে নারল। মোর থতাৎতও কথা না নিকুলিল। অপরাধীগর সাদে ঘরেদে হমেইলুগা। তেই হৌনাকার কুঠা উগৎ হমেয়া চারিয় বারা চেইল। তেই মোর মুঙে উবা অইলিহা। আহিয়ে আহিয়ে পড়াপড়ি অইলাৎ। খাংতা তেইর আহির পানি ফুটা দুগ আগ নিকুলিয়া আহিল। লুকেইতে লুকা নারল তেই। হাতে হাতে নারগ নিকালল তেই,

‘আমার গাঙর দুগ আহান ছয়মাহা আগে নাগা পাহাড়ে মরেছিল - হারপা থাইবে পাউরি?’

‘মি নিজে তানুরে সৎকার করেছিলু।’

‘তোরেল তিনগ ফাইল পাউরি এহান মোরাৎ বিধিয়া আছিল। তেই গম্ভীর অয়া মোরে মাংল।’

মি যাতা দিয়া মাংলু, ‘উতা কতো কথা। আরাক আকদিন মাংতৌ। এবাকাতে -

‘অ চাহা? হাইদে।’ তেই যানারকা কাকেইহান দিল।

মি থক্ক আতহানাৎ ধরিয়া মাংলু, ‘এবাকা নাপিতৌ, খানি পিছে।’

মি হাতে হাতে ফুতি উহান নিকাললু। তেইর আতহানাৎ দিয়া মাংলু, ‘তোরকা আনেদেছু খুৎতলহান।’

তেই প্লাস্টিকর খৌগৎত তলফুতিহান নিকালেয়া চেইরি। মেইথংহানাৎ হারৌপার কুনো ভাব আহান নাদেখলু। মি ঙাকয়া চেয়া থাইলু। তেইর পেটে নাপড়িল পাউরি - খালকরানি অকরলু। যেহান দেমাক করেছিলু উহান সুমঠিগ অইল পারা। তেই মোর মুঙে ফুতিহান থদিল। মনহান আরাকও সাক্তি অইল।

‘মোর খুৎতলহানতে অনেকদিন আগে দেহৎগতে।’ তেই চেয়া মুকসি দিল। মি আরাকও আপাং অইলু।

‘হাঃ, তোরকাতে কুনোদিন...’

‘না খাঙই, দেহাদিং। খানি আহান ধৈর্য ধর।’

তেই আলমারিগত বইতলশৌ আগ নিকালেয়া মোর আতহানাং দিল।
বইতলগর ভিতরে রাঙা লেহাও আগ দেখলু। নিংশিং ফিটকারির পানিং এক্বাকা
শাতয়া আছেগ পারা। বাঃ, কতিয়ৌ যতন করিয়া থছেতা। মি আপাং অয়া
আংকরলু, এগতে মি কুনদিন তোরে দেছিলুতা?

তেই মোরে বারিহান দিয়া মাংল, 'কুরাংতে নিংশিং অইতে। ডাঙর শর্ত আহান
থয়া মোরে নিজে পিদা দেছিলে। উহান হেইরাপ আহান নিংশিং অ দিবেনাই।'
তেই বইতল উগ ধরিয়া বুলা বুলা চেইরি। গালগরমা খুৎতলহান থেংকরিয়া
মোরে খেপাং আহান দিল - হবা করে।

'এতাৎত জিঙে খুৎতলতে আর কুরাং পেইতেই।'

মি উবা অনা নারলু পারা। মুরগ নঙেয়া থাইলু। আতহানর তলে তলফুতিহান
চাপা পড়িয়া থাইল।

ফাগু

দলা চিঠি

ঘুমেত উঠিয়া চেয়াহানাৎ বয়া আছে নীলমাধব। লেরিক আহানাৎ আহিগির মিল্লেংহান থছে। আর আর দিন হাত বাজানি ফাৎনেই বইজকে চাহালো আয়া মুঙে অইরিহা। কিন্তুমান আজিতে খানি আহান হেরফের অপড়িলগা। সাত বাজিয়া আরাকও আধা ঘন্টা লালো গেলগাতা পেয়া বইজকর মেইথংহান নাদেখল। নীলমাধবর পেটগ বাক্সা আহান অলাং করে নেরগা। পেটগ অলাং অইলে মনহানও অলাং। খাংকরে বাংকরে নারের পারা। চেয়ারহান এরে দিয়া দুরাদে নিকুলিয়া যানারকা বুলন দিল। খাংতা কল্পনাৎ নেয়ছিল দৃশ্য আহান দেহে বেল্প। তাপ্প তাপ্প কাকেইহানি বেলা বেলা নিঙল আগ হমা আহিরী। আতহানাৎ তার ভোজনর জিনিষহান। নীলমাধব ঙাকয়া তেইরে চার। খাঙয়া আলথকবারি তেইও চেয়া থাইলী। কুনো আহান টটরা টটরি নেই দ্বিইয়গিরতা। থাংনাৎ তেই চাহা কাপহান টেবিলহানাৎ থ দিয়া দাবহান করে দিয়া নিকুলিয়া আইলী। নিঙল উগও লাজুরেইগ। দুরাৎ নিকুলুয়া খানি আহান উবা অয়া থাইলী। বুকগৎ আতহান দিয়া নিংশাহান বেল্প ডিগল করে। ডাঙর ফারা দশা আহানাৎত জিংতা অইলী পারা। নীলমাধবও উবা অয়া থাইল। মেৎতমহানাৎ অয়া গেলগা নাটকর দৃশ্য উতা তার নিংশিঙরমা খেলা খেলা আছে। ডিগল করে নিংশাহান বেলেয়া মুরগ নঙেয়া টেবিলহানর কাদাৎ উবা অইলইগা।

স্কুল মাষ্টারির চাকুরি আহান ধরিয়া লক্ষীমপুরে আহেছেগ নীলমাধব। দ্বিবছর লালো যারগা। বি এ পাশ করিয়াও পইলাই ধরেছেহান। মানুর লগে চাল খেলানি নেই। নেতায়া কামহান বুলিয়া তা বাছেছেহান। পইলা আয়া থাইল ফাম নাপেয়া দিবারা দিশাৎ নেয়া বুলের তাঞ্জা উগৎ খাংতা ধনো পুলিশর লগে পরিচয় অইল। ধনো পুলিশে তার থানার বাসা যোগৎ করে দিল। তার বাসাহান খেংনাপা বাসা চেয়া লেপ করে দিল। হুদ্দা উহানে লয় নার - নীলমাধবর খানা পিনার ভারহান নিজরাং তুলিয়া নিলগা। নীলমাধব ধনো পুলিশর ঔ উপকার উহানি নাপাহুরুছে। তা নিংকরিয়া তারে দাদা বুলিয়া ডাহের। ধনোর দাদা

পদবীহান লগে তার গিথানক লেহাউ বইজি, পদবীহান আইনমত পাগেলীগা। হাবি তিলইলা দিন উহানাৎত পুরি আকেইগিয়ে আকেইগির বিপদে-আপদে, হারৌ-তাপিত্বৎ ভাগাবাগি করতারা। হাবিয়ে ঘর আগরতা বুলিয়া নিংকরতারা। আজি নীলমাধবর মিল্লেংহান আছুল্প নিঙল উগর নাং অনিলতাই ললিতা। লেহাউনুর বেয়কর জিলক। মালক মরিয়া অশান্তির জ্বলাই ডহিয়া আছেগ। পিয়নকর ঘরে শান্তিহান বিসারেয়া কতদিনকারকা আশ্রয় নেছেগা। থিং বারো গম্ভীর তেইর প্রকৃতি। উতা বাদে লাজর মা শিরোমণিগ। টটরা বকবকাৎ মিতলপীগ - কিন্তুমান আহানির যমগ। কিংতাও পারা নেই ইলেইলেই কথা আহানলো দিনহান হাপদিয়া আহিয়াই থা পারিরী। সরলমাও খম থেঙছেগ। আহানি গার অইলও মানুর মুঙে থক থাক না আহিরী। নীলমাধবরে তেই নিয়াম ডরেইরী। দূরেইং থায়া তার গম্ভীর মেইথং উহান চেইলকপুরি কাদাৎ গিয়া চাহা দেনা পেয়া কাইনচিল অইরী। ললিতা আহানির থাংনাং লেহানুরতাও কাম খানি কমিল। মাংতে গেলেগা প্রায় হাবিকাম ললিতাই সিজিল করানি অকরল। আকদিন নীলমাধবর কুঠাগ হুরানিরকা ভিতরে হমেইলীগা। আর আর দিন হমেয়াও চাহা টেবিলহানাৎ থদিয়া আইরীগ। হবাই কুঠাগদে আহিগি আকখুরুম পেয়া বুলা নারেছে। আজি হমেয়া হবা করে আহি ফাংকরে কুঠাগর চারিয়বারা চেইরী। নিজে নিজে আকখুলিগই মাতিরী, 'হো ইমা, কিরও জমজাকাই কুঠাগ। হুংতুমেহানর গাই। তার কুঠা উগ চানার দেকিগ। ফামহানর তিনবারা লেরিকে হিংখিল আছে। তলে সিগারেটর তুপশৌ দলাগ। আলনাগৎ ফুতি আকতা - মাটিং পড়েছে আকতা - ফামহানাং সিতারাছে আকতা। এমনকি মহরিহানর দড়িগাছ ছিড়েছে উপেইং দড়ি নালাগেয়া নেকটাইহানলো বাধিয়া থছে। জুতা আকবেদে, বুরুশ আকবেদে বাপক মালক নেই শৌর সাদে পড়িয়া আছে। পেটকো ফুতিহান আটেয়া ললিতা পাজালাং লাগলি। ললিতা হিনে হিরিঘাম পাহাং অইলীপারা।

নীলমাধবও ভাব আহানর মানুগ। ভাবর ফরিলো ফরদে ফরদে থার - জগতর ঝামেলা নিয়াম হুরা নারের। মাষ্টরি পেশাহান অইলেও নিশাহান সাহিত্যদে। মানুর লগেও নিয়াম টটরানি নেই। আকদিন জাং আহানাং চট্টিহান আরাক জাঙে কাবুলী সেডেল লাগেয়া ভাতর কুঠাগদে হমা আহিতে ললিতাই দেহে বেহ্ন। ললিতা লগে লগে লেহাউনুরাং ভারহান বেলা দিয়া তেইর কুঠাগৎ হমেয়া দিনহান আহিয়া আছিলী।

দ্বিদিন পুংখাং লালো গেলগা। নীলমাধবর তাপহান আর না কমের। বরং

তাপহান জবর অইতে আছে। ধনো পুলিশে ডাক্তরগ আনলগা। পরীক্ষা করিয়া নুরাহানর নাংহানন মাংল - টাইফেডহান। ধনর মুণ্ডে হাকহান বাগিয়া পড়িল পাৰা। রূপারে রূপা নাচেয়া চিকিৎসা করানি অকরল। তেব তাপহান আলইং না বুলের। দ্বিদিন না ঘুমজানিয়ে ধনোর গারিগও হেইফেই নাইফেই করেৱ। থাংনার দিনে ললিতারাং সেবার ভারহান দিয়া ধনো নিংশান বেঙ্গ। কাদাং উবা অয়া নুরাৱাগর কৌশালি দেহিয়া কাদিং কাদিংগ অইলী। কিরৌ অসহ্য যাতনাহান। যদিচৈ বাটাৱাটি যাকরলইছতে। একিন অয়া মনে মনে নিংকরিৱী ললিতা।

‘উহ্, মুরগ বুলিয়া নীলমাধব ৱাৱাহান বুলন দিল। ললিতা কাম করানিরকা যোগং অইলী। পইলাই পানির পট্টিহান নিৱালহানাং থ দেনারকা আত দিল। পট্টিহান নিৱালহানাং সন্ধরানি ফাং নেই ললিতার আতহান খাংতা থর থর নিক্করানি অকরল। নারিয়া আতহান তুঙ্গ ৱারো হম্মা করিৱী ৱারো নারিৱী। লাজহানে মুরগ নঙেয়া থাইলী। মিতে কিসাদেতে সেৱা করতৌতা? নিজে নিজে আংকরিৱী। থাংনাং হাবি পাংকাল আতহানাত আনিয়া পট্টিহান কুনোমতে নিৱালহানাং থদিল। কৌশালির হাদিত নীলমাধবে তেইর অবস্থাৱান হারপেইল। মনে মনে ৱানা আহান হমেইল। চেইতে চেইতে ৱাতিহান ফুঅইল। ললিতা সুপ না গুমজিয়া ৱাতিহান ৱয়া আছে। ঙালফুহান অনাই তেই ঙাকইলী।

এবেদেৎত টেলিগ্রামহান পানা ফাংনেই নীলমাধবর ৱাপক টেক্সিহানলো ফৌঅইলহা। অনেক ৱিবেচনার থাংহাং নুরাৱাগরে ঘরে নেনা লেপকরলা। কথাহান হুনিয়া ললিতার বুকগ থুক করল। নুরাৱাগর কাদাং তাঙ্গ তাঙ্গ গিয়া উবা অইলীগা। নীলমাধব ললিতার মেইথংহানাদে কূপকরে চেয়া থাইল। কুনোদিন হৱাই নাদেহেছেগ। খানি হাতে হাতে মাংল ললিতারে,

‘আজিতে যাউরিগানাই - তুমাৱেউ হিন দিলু দলাগ।’

মেইথংহান বুলেইল ললিতা। তেইর মনর ৱনে দাৱানলর জ্বিগ ৱৌহান লাগিয়া নিভানি নাকরেৱ। কুনো মতে নারগ নিকাঙ্গ তেই,

‘ৱালা অইলে নাইলে কিসাদেতে হারপেইতৌ। পৌ পেইলেতে হৱা অর - নাইলে হুদা খালকরিয়া থাইতৌ -’

‘গিয়াও হৱা অইলে ইকরতৌ - ইকরতৌ চিঠি - তিতে জুৱাব দিতেই?’

‘ঠিকানাও হার নাপাছু হান্তে...’

নীলমাধব হিনপা হিনপা মলগর তলেৎত খাম আগ নিকাঙ্গ। আতহান নিক্করে নিক্করে তার ঠিকানাহান ইকরে দিল। ললিতার আতহানাত দিয়া মাংল,

‘এগর ভিতরে চিঠিহান দাপেঠেইছ।’

ললিতা মুরগ ঝাকারল।

টেক্সিহান নুরাণাগরেলো শিলচর মুখা দাবদিয়া সালইল। ললিতা উবা অয়া থাইলী। উবা অয়া থাইলী কূপ করে চেয়া চেয়া। যতিহান তেইর মিল্পেঙে পড়ের ততিহান চেইরী। হাতে হাতে তেইর আহির মুঙে মুঙে টেক্সিহান মাঙ গেলগা। ডিগল করে নিংশাহান বেলেয়া মুরগ নঙেইল।

হাণ্ডা আহানর থাংনাং নীলমাধব মারাম অইল। খাংতা নিংশিঙে আহিল। ডিল নাককরলো আর - চিঠিহান ইকরানিং বহিল। তা নিয়াম খালকরিয়া ইকরানি অকরল। তার সাহিত্যর যতহানি ঠৌনা আছিল ততহানি কালা মেয়েক উগির ভিতরে লুকেয়া থদিল। বানা নুংশি বারো কৃতজ্ঞতার পৌহানলো চিঠিহান সাল গেলগা।

ললিতা তেইর জীবনে কুনো আগরাংত চিঠি নাপাছে। চিঠিহান তেইর আতহানাং ফৌ অইলগা। তেইর জীবনে পইলাকার চিঠিহান হারৌহানে দিক বেদিক ঠিক করে নারিরী। তেই কুঠাগং গিয়া চিঠিহান জিংদরে চেয়া থাইলী... চেয়া থাইলী... উতার থাংনাং চিঠিহান থনালো ডাঙর বিভ্রম আহানাং পড়লী। মলপাকর তলে থয়া আইলীকো পুরি বারো পিয়নকে পেইতই ডরে উপুগর ভিতরে লৌশিল করিরী। রাতি চিঠি উহান নিকালেয়া বারো চেইরী। আকখুলিগই আপন মনে আহিরী। এবাকাতে জুরাব দেনার পালাহানাং পড়লী। অবশ্য তেই উহানও ডিল নাকরল নিয়াম। দলা চেহান হবা করে ঠিপ করিয়া তা দেছিল খাম উগং লৈশিল করল। ঈশ্বররে নিংকরিয়া তেই চিঠিহান পোস্টাফিসগং চালান করে দিল।

নীলমাধবর আতে যথাসময়ং চিঠিহান ফৌঅইলগা। তেইর মনর কথা আজিতে পেইতৌকো বুলিয়া তা হারৌহানে বিভূলা আছে। অলাং অছিল মনহান রাইসাঙিল। নিংশা আহানাং খামগ ফারিয়া চিঠিহান নিকালেয়া আনল। তুরা করে পাকরানি মনেয়া চিঠিহানর ঠিপ বাগানি অকরল। অবায়, এহানতে কিহান!? নীলমাধব খাঙয়া নিজরে আংকরের। তার আহিগিরে ঠাচা করে নারল। কালা মেয়েকগতে থাক কালির ফুটাশৌ আগ পেয়া নেয়ছে। খালকরিলতা খালকরল - কিন্তুমান কুনো সীমা আগ নাদেখল। তার মনর হাকহানাং পুলয়া আছিল আশা কুনবেদে মাঙয়া গেলগা। মনে মনে খালকরল মোর দেকি

গ্রাজুয়েট আগরে সাধারণ নিঙল আগই ফাগি করতকো। অমাটিকর নির্দয়া ঠিচালাই। নীলমাধবর গারিগ সৌঅনিয়ৈ নিঙ্করানি অকরল। এহানর প্রতিকার আহান আকদিনতে করানি লাগতই। ঔ দিন ঔহানর সালেদে তা বাছেয়া থাইল।

মাহা আহান লালো গেলগা। নীলমাধব নুরারাৎত হবা অয়া বালা অইল। কামে যোগ দেনারকা বাসাৎ ফৌঅইলগা। ঘরগর ভিতরে হমেয়া ফিজেৎ কিতা অংকরিয়া চেয়ারহানাৎ বয়া সিগারেটগর ধূমা নিকালাৎ লাগেছে। ললিতা কিন্তুমান হাবিতা মিল্লেৎ করিয়া আছেগ। তাম্ব তাম্ব নীলমাধবর পিঠিবারাদে উবা অইলীহা। তেইর শব্দহান তা বৌ পেইল। তার হুদিগর ভিতরে গুমজিয়া আছিল জিগ হজাক অইল। কান্দিহানে হাতে হাতে কানহানি তপ্তা অনা অকরল। চেয়ারহান এরেদিয়া তেইর মুঙে উবা অয়া নিরালহান ঠিপ করিয়া একাঘাতি বাণগ এরে দিল - 'বারো ঠিচালাই করানিরকা আইলেতা?'

ললিতা খাংতা হাকহানাৎত পড়লীপারা। কুনোতা উপআপ নারল। নীলমাধব কুঠাগর এবেদেৎত হৌবেদে আটানিৎ লাগিল। বারো তেইর মুঙে উবা অইলহা। নংসাগ অরিঙীর মুঙে দেহা দিল পারা। নীলমাধব বারো অকরল, 'কইতে মোর চিঠিহান দে। এক্সাকারগাই দে।'

ললিতা হাবিতাও খাংকরে পারেছিলী - কিন্তুমান চিঠিহান আলথক দেনার কথা এহান খাংকরে নারল। বুকগৎ থছিলী চিঠিহানর গজে আতহান থয়া নিরুপায় অয়া লাংলাং অয়া চেইরী।

'ডিলকরানি থকনেই, দে।' ললিতা লাজে ডরে খুংকুল নাপেয়া চিঠিহান নিকালেয়া দাদিল। মুরগ নঙেয়া তুরা অয়া তেইর কুঠাগৎ হমেয়া ফামহানর আশ্রয় নিলগা। বজ্রর শিক খাছেগর সাদে বুম মারিয়া থাইলী।

থাংনার দিনহান। নীলমাধব চাহা বাছেয়া বহিয়া আছে। ললিতার দেখা নাপেইল। বইজক লেহাউনু চাহালো হমা আইলী। চাহা দিয়া হদেয়া নীলমাধবরে মাংল, 'তি ডাক্কারগরাৎত খানি আহিছগাতা।'

'কিয়া?'

'হু কালিৎত ললিতা জুম মারিয়া তাপহানলো পড়েছে।'

নীলমাধব ডাঙর বিভ্রম আহানাৎ পড়িল। খালকরিয়া কুনো কুল নাপেইল। যেতাও অক নুরারাগর যথাবিধ কামহানিতে করানি থকছে বুলিয়া ললিতার কুঠাগদে হমেইলগা। ফুতিহানলো জাপদিয়া ললিতা গুমজিয়া আছে। মলগর গজে চুলতলা আহান ছিতারেয়া পড়েছে। নিরালহানর বারা আহান দুরাৎ

নিকুলেছে। তাপহান চানারকা আতহান দিল। আঙুলিগি থেংনা অইতে নাইতে
 তারতাও আতহান নিক্করানি অকরল - গারিগ রোমকাটা দিল। লাজহানে থক
 আতহানি তুলল। ললিতার অছিল উহান নিংশিং অইল। নীলমাধবর জীবনে
 এসাদে ঘটনা নাছে। মুরগ নঙেয়া খালকরের। ঠৌনাহানল বারো আতহান দিল।
 নিরাল হানাৎ বারো কঙলা বারি আহান দিল। হজাক অয়া লড়িয়া বুলন দিল।
 আহিয়ে আহিয়ে পড়াপড়ি অইল। ললিতা হিনপা হিনপা কোণ আগদে বহিলী।
 কাদাৎ উবা অয়া আছে নীলমাধব। ললিতা নারগ নিক্করে নিক্করে মাংল, 'মি
 আর উসাদে নাকরতৌ - মোরে দাপেঠাছিলে চিঠিহান আলথক নেনা মনাউরি।'
 'আহির পানিলো ডল ডল করে তেইরতা। ফুতিহানলো মেইথংহান গুরল।
 'কিয়াকাতে কুনো আহান না ইকরিয়া দলা চেআহান দা পেঠাছৎ?' নীলমাধব
 আংকরল।

'মিতে ইকরানিও নারুরি - পাকরানিও নারুরি।'

'হাঃ সুপ লেরিক না তামকরেছৎ?'

'না।'

'উহান অইলেতে মোর দেছিলু চিঠিহান না পাকরেছৎ?'

'ছিঃ।'

'কিহান হারপেয়াতে থছিলে?'

'বালা অথাইবে বুলিয়া নিংকরেছিলু। জবর অইলেইছততা ইকরে নারলেইছ।'

'মানুরাং পাকবুরানি থকছিল - কিয়া নাকরলে?'

'ছিঃ, লাজ পাউরি।'

'কিহান মনেয়াতে চিঠিহান দিলে?'

'চিঠিহান পেইলু উহান জানেইলুতানাই। তি সৌঅইতেই পাউরি বুলিয়া।'

নীলমাধব আপাংপীর মেইথং উহান কূপকরে চেয়া মুকসি দিল। তার ব্যাগগৎত
 তেইরাং দেছিল চিঠি উহান আনল। তেইর আতহানাত উহান বারো আলথক
 দাদিল। ললিতার কাদাৎ বহিয়া পিঠিহানাতৎ আতহান থয়া কঙালা করে
 বানাপেয়া মাংল,

'মি দলাগ ইকরিয়াও কানা নাইলু। তি সুপ নাইকরিয়া মোরে জিঙে গেলগা।

নিয়াম হবা করে জিঙে গেলগা। তোর দলা চিঠি উহান মোরাং থাইতই।'

ললিতা আপাং অয়া আকখুরুম নীলমাধবরে চেয়া মুরগ নঙেইল।

ফাগু, ৪র্থ বর্ষ, ৫ম সংখ্যা, ১৯৬৪ ইং

দ্বাপরর গদা খেংনাপা কলির গদা

আশি মণ চৌল। খেলি মেলি চৌলর ঢেরাগ নাগই। জবরধস্ বুলানি যাকরের। কিন্তুমান য়ারি হুনেছিলাং যে, দ্বিতীয় পাণ্ডব শ্রী ভীমসেন গিরক ঔ আশি মণ চৌলর ভাতর টেঙারা উগ ইলেই লেইকরে বাগে বাগে পেটগর ভিতরে লৈশিল করেছিল। এমনকি কুপাংহানাং পেয়া ক্ষুদি পেপুরাগই খেইল মত কনাসৌ আগ পেয়া লেম নাকরেছিল।

এ য়ারি এহান কলির জীবরাংতে হপনমু মায়ামু মতিভ্রমানু ! য়ারিহান হুনানির লগে লগে কানে তালা, আহিৎ জিনজিনি। কিংতাওপারা নেই তিন লপ চৌলর ভাত কুনো সুর্তিলো মাদাই করিয়া পেটগর ভিতরে চালান করতে গেলগা দিনে দ্বিখুরুম ডন বৈঠক করানি লাগের। উতার থাংনাং, তার আতহানর নাগরতি গদাউগর ওজন বারো আয়তন খাল করতে গেলগা মুরগর শিংলেই আগাছ থাইতই কিনা সন্দেহ অর। উতার গজে ঔ গদা উগর য়ারি আহানও আছে। ভীম গিরকে গদাউগ হেইকরতেই পাক উহানে পুংখাং ষাইট হাজার সেম্ সেম্ আত্তি আট্টিংগাহানাদে চালান অছিল। এবাকা পেয়া আকাশসম্ম নিরালম্ব বায়ুভূত নিরাশ্রয় অবস্থালো পৃথিবীহানরে বুলে বুলে আছি। ঔ আত্তির দল উহান - যেতা নুরা বরনে ইকা কাইতারা পুঠির সাদে আট্টিংগাহাং কাছিল - উতার দুঃখর আর অন্ত নেই। খেইল মত ঘাস পাতা আহান নাপেয়া এবাকাও বরনর হাদিত গুড়ং গুড়ং ধাবদিতারা বুলিয়া হুনিয়ার। এ য়ারি এহানলো গদা উগর বিচার করানিৎ গেলগা এহানি ভৌ পারিয়ার যে - এবাকার কলির জীব এতা গদা উগর কমসে কম মাইল দু হানর ফারাকে থানা লাগতই।

কিন্তুমান এবাকাতে গদার ফাম আর নেই। লংমেই কামান রকেট কিতা কিতির জিনা। তেব তেব পুরানা বস্তু উতার নাশ নেই। মাঙয়াও মাঙনার, মুতয়াও

মুতনার আরাক অংতা আহালো সম্ভবামি যুগে যুগে বুলিয়া হাজির অর। উহানলো দ্বাপরর গদা কলিকালে আরাক হুরুকাং মডেল বা অংতা আহানাং বৃপাহান নেরগা। কলির এ গদা এগ অইলতাই আরি। প্রয়োগ বিদ্যার মা কিন্তুমান পারেং তঙাল। ভীমে আগেদে দুর্যোধনর উরংগ সুমঠিগ করেছিল ও গদা উগল। এবাকাতে গতিহীনা, পাংকালহীনা জেলেই বুলতারা জাত উহানর পিঠিবারা তপ্তা করানিরকা কামে লাগেইতারা। কুনোদিন আহান ধূমা আছুলাং আতহান নেই গিরক উগই নুরা বিয়া করিয়া হজক আকেইকারি মিহুনা করতারা। উপেইং হজকারি নিবেদন করতে ডিলইলেই আরিগ গদাগর কামে লাগের। হাচা অক বা মিছা অক ভীমর গদাগর নাংহান কিন্তুমান অমর অয়া আছে। হৌ দ্বাপর যুগেংত পুরি আজি পেয়া নাংহান পালয়া আছে। এ কলির গদারমা নাংকরা গদা বা আরির য়ারি আহান আছে। য়ারিহান সাক্কাহান বারো ঠাচা করানির মত।

সাক্কাল শৌ দুগ ভার আহান বয়া আনতারা। রাসলীলার দিনহান। খুমেলর মানু উতাই লাইটগ আনতারা পাউরি বুলিয়া খৌরাং অয়া চেয়া আছি। উতার লগে আরাক ডিগল মানু আগ। বং বং ধূমা নিকাল নিকাল আহের। উতাও লাইটগর ধূমা বুলিয়া হারৌ অয়া আছি। মুরগর গজে ফুতির বকচা শৌ আহান। গোপী অয়া নাচতাই গিদেই গাছিয়ে পল্লেই আনেদের পাউরি বুলিয়া হারৌ অছি। হাতে হাতে মানুগ কাদাং চেপইলগা। হাবির আহির ভ্রম বাগিল। গাকয়া চেইতারা। পল্লেই বকচাহান বুলতে বকচাহান নাগই- কয়ংহান। আরিগর চুহি উগরে চুহিগ নামাতিয়া বরং পারার পাম্পর পাইপগ বুলানি য়াকরের। আরিগর ভিতরে পানি উতা দিন গুজুরের পারা। আন্তিগর খংচেংল আটে আটে য়ারগা। এরূপ এহান মিয়াঙে দেখানিয়ে - মাইগো মাই, মৈতেয়ে দেহানিয়ে - মাইবেমা বারো আমারতাই দেহানিয়ে - হইম্মা বুলতারা। হাবিয়ে এগ কিসাদেগ বুলিয়া কানাকানি করতারা। উতারমা চিনেছে আগই জুরাব দিল,
'হাঃ কাটাখালর গোলাপ গিরিরে নাচিনেছথাং?'

আমার সমাজেও দলাগ মানু আছিল। যেতাই আচরিত কর্ম আকেইহান করে গেছিলগা। যেতার ঠৌনা পাংকাল জাতর গৌরবহান অয়া আছিল। কিন্তুমান সাহিত্য নেয়নির কারণে আজি তানু আমার নিংশিঙে নেয়ছি। মি উসাদে গিরক আগরে আমার নিংশিঙে জিংতা করিয়া খনারকা হম্মা করলু শিচ্চিল। - লেখক (ফাগু, ৬ম সংখ্যা, ১৯৬৩ ইং)

ইমা

ইমাম মাম রাতিহান। প্রায় বারো বাজে যারগা। হাদি হাদিৎ পকজকর রৌহান ইষ্টিক রাতিহানরে ঘুমেৎত হজাক করের পারা। উতার লগে লগে মাক্কু বার বিদুতিতুর বিকট বার ডরপেইল মাচাক ডাকে আধারর বুকগ নিক্করে নিক্করে উঠের। কুম কালা গাছ বিরুকর পাতার লগে বৌহান ছড়ছড় পৎপৎ বৌনাপেইল কথা মাহেই টটরাৎ লাগেছে। চারিও বারাদে বিরাজ করেছে ইষ্টিক চিক ভাব আহান। আট্টিংগাহানাৎ তেরা হাবি ঝকঝক করে জিংধরে চেয়া চেয়া আছি পৃথিবীহানরে।

কুনো আহান কথা নেই - ফিস্ ফিস্ আহানও নেই। মোহন ঘরেদে সালছে। আকখুলাগই আহানি ডরার। ঔহানেতে আরাক আগরে লগে করে আনের। নিয়াম নাপ্পাল হবা বার পাংকাপ্পাগ মোহন। কিন্তুমান, ডাঙর দুর্বলতা আহানে চাপেয়া বেলল তারে। নানান ভাবর লগে, যুক্তির লগে নিজরে আজি বিচার করানিৎ লাগেছে। নিজরে নিজে আংকরে নেরগা -

যেগর লগে কনাক অইতেৎত মারুপানা, যেগর লগে জীবনর বানা নুংশির বন্ধনহান আছিলতাই অচ্ছেদ্য, যেগর লগে কুপাং আহানাৎ খাছিলু বার ঘুমজেছিলু ফাম আহানাৎ, তারে বানা পাছিলু হুদিগ ডালিয়া - হবা পাছিলু আহিগি বুজিয়া। খানিপ্পারা আহান নাদেখলে দরফর করল মনহান। কিন্তুমান আজি কিয়া এ বিকার?! কিতারকা মনর রাজ্যহানাৎ এ বৌবরন এহান? হুদা মরিল সুরাই! নাকগদে নিংশাহান নানিকুলিল সিচ্চিল! এহানি তফাৎহানি? কিন্তুমান এহানি তারতম্যরকা কিয়া ডরাউরিতা তারে? রাতিহান তার লগে থাইতে কিয়া হাংকৈ আহান অউরিতা? যেগরে জিংতা অইতে বানাপানি বার মরলে ডরপানি! কী আচানক ধারাহান! জিংতা বাঘগরে ডরপানি বার মরলে ঔগরে ডর নাপানি। অথচ, বানাপাউরি উগ মরলে ডরপানি।

কতি খালকরের উতার শেষ নেই। উতার গজে তার মারুপগর দেহাগ সৎকার করিল ছবি উহান আহিগির মুঙে বাহিয়া উঠিল - আহা, হুনার দেহাগরে ছালিগ

করে বেলল। অথচ ঔ দেহা উগরমা বুজিয়া আছিল কতি প্রেম, কতি আশা,
কতি হারৌপা কল্পনা। কিন্তু হাবিতা পুংখাৎ ছালিগ অয়া গেলগা। হায়রে মানুর
আশা, হায়রে দেমাক! খাংতা ম্যাকবেতর জীবন-নাট্যর খামতলর কথা উহান
নিংশিং অইল—

Tomorrow and morrow, and tomorrow
Creeps in this petty pace from day to day
To the last syllable of recorded time;
And all our yesterdays have lighted fools
The way to dusty death, out out brief candle
Life's but a walking shadow, a poor player
That streets and frets his hour upon the stage
And then is heard no more; it is a tale
Told by an idiot, full of sound and fury
Signifying nothing (Macbeth, scene V)

কালি, কালি, কালি,

আটে যারগা হাতে হাতে যতি দিন হাবি

তিল যারগা লাপছে সময়ে;

পইলাকার মেয়েকগ গেলগা কালি

খামতলর মেয়েকগরে আকপেইং করিয়া

নিয়া যারগা পথ ইলকরিয়া

তিলকরতেগা শ্মশানর ধূলির লগে।

যাগা, নিভে যাগা, নিভে যাগা

হে মেৎতমকার বর্তিগ।

আটের ছেয়াগর সাদে এ জীবন

হুরকাং অভিনেতাগ,

যেসাদে অভিনয়কালে

দেমাক করে হমা যারগা রংগমঃ

আতজাং জাকারেয়া - লৌদে লৌদে।

খামতলে তার তত্ত্বহান হরনাপেইতারি কুংগৌ

আপাংপার ইয়ারির সাদে এ জীবন

অর্থ নেই কুনোতা।

খাংতা বার চিন্তার গুড়িগ বুলন দিল । না... না... কিংতাও পারা নেই অবলা
পাংকালহীনা জেলা আগইতে নির্ভয়ে স্বামীর দেহগরে লগে থয়া সাগরে ভোরহান
বেয়া আছিলী। তেইর মুঙে স্বামীর মাউ গলে গলে সাগরে তিলয়া গেলগা। হুদা
আরগি অবশিষ্ট আছিল। উ বেহুলা গিথানকর ছবিহান বাহিয়া উঠিল। উতার

থাংনাং সাবিজী - নির্জন, নিঘোর জংগলহানর ভিতরে পতি গিরকর মরা দেহাগরে নির্ভয়ে রক্ষা করেছিল। স্বয়ং যমরাজা সতীত্বর পুরস্কার স্বরূপ সত্যবানরে ফিরা দেছিল। কি বিশ্বাসলো, কিসাদে পাংকাললো, কুন অন্তর্নিহিত সত্ত্বাহানর গুণে তানু এ আচরিং কাম এতা করে পারলাতা? মোহন বেদ-বেদান্তর জংগলহানাং হাতারল। কিন্তুমান, কুনো আহান মিঙাল নাপেইল।

হাতে হাতে ঘরগর কাদাফু ফৌঅইলহা মোহন। ঘরগর খানি দূরেইং ছড়াশৌ আহান। ছড়াশৌহানর পারগং গাঙর যতি মানু মরতারা ততি উপেইং সংকার করতারা। হৌ আদ্যেত পুরি অদ্যাবধি পেয়া নিক্কারলেহে মরার আঙারা ছালি কিতাকিতি পুলকরে পুলকরে ডাঙর গাটহানাং বেলা দেনা অইলতাই এ ছড়া এহানর নিক্কার কামহান। তেইর পারগং জাংহানলো উবা অয়া আছে তিরা আকজার। নিয়াম ডাঙর গাছজার। লাংটিয়ার জম মুরগং থয়া সাত্তীগর সাদানে উবা অয়া আছে - যেমন শ্মশানর রাহালিগ।

ছড়াহানর পারগ ধরিয়া আটানিং লাগেছে মোহন। কিহান মনেয়া তিরাজারর তলে টর্চগর মিল্লেংহান বেলল। তেরাগির সাদানে আহি দুগ ঝক্ঝক্ করিয়া বাহিয়া উঠিল। মোহন ডরহানে থরথর নিক্কারানি অকরল। জাঙেত অকরিয়া মুরর চুল পেয়া চপ্ চপ্ উবা অইল। খানি আহান থায়া মোহন ডরা ডরা নারগ নিকালল -

‘কুংগ, তুরা করে মাং।’

খাংতা কঙালা রৌহান কানহানাং বারি দিলগা—

‘মি এনা নাডরেই—’

মোহন কূপকরে মূর্তি উগ চার। মুরগং ইনাফি আহান, কাকালিহানরে চেৎকরে আটা নেছেগা খাংচেং আহানল। হাতে হাতে কাদাং চেপইল মোহন। টর্চগর মিঙালহানাং মূর্তিগরে চিনতে কুনো হিন নাপেইল। খাঙয়া মাংল,

‘অবায়... মই... এহানতে কিহান! কিয়া এপেইং...’

হাতে হাতে মাতিরী, ‘মোর মানুরে বাছেয়া আছুতানা। তারকা কমলা বার মিঠাইও আনে দেছু - তা নিয়াম মনেইলতা...’

‘মানু।’ আহা! কপালখিপীর আকগ তম্বকগ। মাত্র দ্বিদিন আগে এ ফাম এহানাং ছালিগ অইলগ। মরলেও কিতা অইব, মালকরাং উমরকার ‘মানু’। মরলেও ডরনেই, যদিচৈ জিংতা অয়া আহের - কমলা মিঠাই দিয়া মানুরে চেৎকরে বুকগং থইতই। মোহনর আহির পানি গোমুখী নিঃসৃত গংগার ধারার সাদে দাবদানি অকরল। যেতা চিন্তা, যেতা যুক্তি, যে যে কল্পনা মোহন করে নেছিলগা, আজি ইমার শক্তি হাবিতা চুরমার অয়া পড়িল।

ফাগু, ২য় সংখ্যা, ১৯৬৩ ইং

হুনার অরিঙী

দেশে দেশে বুলিরী - গাঙে গাঙে বাসক দিয়া দিয়া আটিরী। বাসুকুলী বুলিয়া হাবিরাং পরিচয় আছে। ঈশ্বরর লীলা কীর্তন করে করে ভক্তরে কাদুরেইরী, নাছার ভংগিলো হাবির মন চরকরিরী। এলা দেনা তেইর জনমকার নেশা - হাতে হাতে পেশাহান অয়া পড়েছে। বাসুকুলী উগর নারগ নুংশি উহানাৎতও নুংশি তেইর রূপ উহান। রূপহানর লগে আছেতাই তেইর যৌবন - কঙালা নাগই, মজা নাগই পুরা যৌবনে ডেফা। যৌবনর জোরারে, নাছার তালে লয়ে ঢেউ খেলার। আতে, জাঙে আহিং, হাবি দেহাগ বুজিয়া ঢেউর পিছে ঢেউ নাছের। ঔ ঢেউ উতা যেবাকা বিদম্ধ গাবুরাপুরার বুকো আয়া উবুরি পাকদিয়া পড়ের - উতারে সমালানির মত হিম্মৎ আর কতিগরতাও বা আছে। বাসক দেনাৎ নুরা নিকুলেছেগ। উহানেতে লাজর ভাবহান নাগেছেগা। ঔ ভাব উহানে তেইর রূপ উহানরে আরাকৌ অপরূপ করে তুলেছে।

মার্সেলাইস লুরির আঙালুরি পিদিরী, কাকালিহানরে চেৎকরে আটেয়া থইরী। খেলমাচির তেনুরালাঙর ব্লাউসহান উরেছে। পাতালা ইনাফিহানে মুংবারা গুরিয়া পিঠিয়েদে লাময়া পড়েছে। গারিগর রংহান লেহাউগর মাচু। তেই উরেছে ব্লাউস উহান আঙালুরিহান পেয়া না ফৌঅছেগা - উহানেতে পেটগর খানি আহান অংশ দোরা অয়া থার। ঔ অংশ উহানি আর্টিস্ট গিরিগিথানীরাং মাচু শিক্ষারকা নিয়াম লোভ করানির মত ফামহান। আরাক আকতারাং কিন্তুমান জবর যন্তুণার ফামহান। বিশেষ করিয়া আহিচৈ বারো কারেম সাক্তি জন উতা পানির কাটা অয়া বয়া থাইতারা। সেপ পেইলেই থক্ক আহিগি বুলেয়া চেইতারা। নাদেহিয়া থানারও উপায় নেই। জিংদরে চেয়া থানাও কিহান? আত্ম সন্মান বুলিয়া হাবিরতাও খানি আকচুটিতে আছেনাই।

বাসুকুলী উগর দেহাগ হাবি মঙে মাতাঙে ডেফা দেছে। উহানেতে তেইরে

পাংকরানিরকা মানুহান মাহেই দলে দলে চাষ্টরা পারাদেনার মাটিক দিগ্ বিদিগ্
শুন্য অয়া আটতে হারনাপেইতারা! কত মানু খানা পিনা বেলাছি কত মানু কলে
মইষ গুরু হুকেইতে হারনাপাছি। তেইর লগে ডাকুলা খলপাংপা হাবিতাও আছি।
কিন্তুমান লগে আগ আহেছে উগরে হাবি আপাং অয়া চেইতারা। নুংপাং সাংপাং
অয়া য়ারি হুনতারা। লগর জন উগর আতহানাং ঘড়িগ, আহিগিৎ চশমাহান।
বেশ তারু তারু গারিগ। মানুহান হাবি তার য়ারিলো মুরর ঘাম জাঙে অর অর
বেলতারা।

‘এগ কিসাদেগ?’

‘বেয়কগও নাগই - হেয়কগও নাগই...’

‘হান্তে কিসাদেগ?’

‘রাহালি বুলতে রাহালিগও নাগই। কিয়াবুললে, তেইর চাহা রাধের বারো খানি
দানি তালাবি করের। দরকার অইলে সুটকেইসও বহের।’

‘হান্তে কিসাদেগ অইলতা?’

‘হাবি ধনপইসাও তার আতে থইরী!’

এতা ভাবনালো, কথালো মালঠেপগর চারিয়ফালুয়েদে মানুহান মাহেই
কবিলালটুমহান রহিতারাপারা।

বাসকুলী ঔগর এলা নিয়াম নুংশি । কতদিনর ভিতরেই হাবি হুদিগি হুরিয়া হাপ
দিয়া নিলগা। তেইরে এলা দেরানিরকা মালঠেপে মালঠেপে আলোচনা চলিল।
উতারমা জবর অয়া খাটতরাই- পইলা নম্বরে, মইলক মরিয়া কত বছর বিয়া
নাকরিয়া আছি য়ারি মুনি। দ্বিতীয়ে - বাপক মরিয়া নুরা সম্পত্তি পাছি
কলাপাকনা আউরি গাবুরাপুরউ। তৃতীয়ে- বিয়া করানি মনেয়া জেপে কুষি
বরেয়া আটতারা, অথচ বাপক লকেয়ে এ দুঃখ এহান হার নাপেইতারা এ
পারেঙর জিপুৎ। এতিনো পারেঙর মানু একযোগ অয়া চান্দা উঠেইতারা। অবস্থা
এহান দেহিয়া দেশর কর্মীয়ে বুকে আত দিয়া মাংতারা,

‘আঃ, সমাজরকা যদিচৈ এসাদে খাটে দিলা অইছতাও।’

তেই কিন্তুমান কোনো আগর লগে নিয়াম না টরেইরী। হাবি সমইয়ৎ আপাংপী
ভাব আকেইচুটি দেহেইরী। কাকালিহানাং আতহান থয়া দেহগরে ভংগি করিয়া
গারগ খানি হেইরাপ কাতিরা করিয়া, কেঙ আঙুলিগ কামর দিয়া চেইতে
সিকিমাত্রা মুক্খিশৌ আহান দিরা। কতগো মানু উহানি চেয়াও আপাং! মাহিমন্ত্র

করিয়া ঘরে বন দিয়া থইতারা ভূত প্রেতর ডেকি লড়া চড়া বন্ধ অয়া থাইতারা।
কতগো আহান কিন্তুমান কথা টটরানিরকা দরফর - ধুলিরচেং উটতারা।
খামতলর উতাই টটরানি মনেইতারা অথচ সেপ নাপেইতারা। সেপর কাম
সেপে করতে নাপাহুরতারা। এলাহান হবা অইল বুঙ্গেই দলহঙরগি অয়া উরেছে
আঙেই হানাং সেপ্টিপিনলো তাংখা লাম করেদিতারা।

তেইর লগর গিরক উগ ইপিদের চশমা উহানর পারার অইলতাই জিরো। তার
পদফামও উসাদে জিরো। মিকুপ আহানাং তেইর হর্তাকর্তাগ, দরকার বোধে
চকিদারগ। প্রায় দ্বিবছর তেইর লগে লগে বুলে বুলে এপ্রেন্টিশ খাটের সুরাই।
পদফাম লেপ নাছে। দ্বিবছর আগর য়ারিহান। তেই পইলা আত্ম প্রকাশ করল
হাকতাকহান। কমলপুরর মালঠেগং নিজে যাচিয়া এলা দিল। মানুহান হাবি
আচানক অছিল। তেইর নারগং, এলার সুরে, নাছার তালে। কমলপুরর ঔদিন
নাপাহুরানির মত দিনহান অছিল। ভক্ত মডলীরে আহির পানিলো জলে নালে
করেছিল। বারো গাবুরাপুরার বুকগিং শক্তিতশেল বেলাছিল। আরাক জন আগর
বুকগং শক্তি শেলগো এমনভাবে দারিয়া পড়িল যে বিশল্যকরণী ছাড়া তার
উপায় নেয়ছিল। মুঙেই বিশল্যকরণী স্বরূপা বাসকউলী গিথানকরে দেখল। ঘর-
দুরার, সায়-সম্পত্তি পুংখাং উরাবেলেয়া তেইর পিছ ধরল। ঘরে তারতা
কুনগও নেই। দীলগ ডালিয়া বানা পাছিল তার দীলজান মইলক তিন বছর
আগে তারে বেলেয়া অগস্ত্য যাত্রা করেছে। বিয়া করানিং আর মন নেয়ছিল
তার। উদাসিন অয়া বুলের অথচ ধন যৌবন দ্বিয়হানিও তার পুরাপুরি।
হুংতুমে মাংতে গেলেগা, বাসকউলী উগর রূপর মোহে পড়েছে কিনা মাতানি
ছিল। সংগি নেই আকখুলা জীবন এহান তারাং রাইছিলিয়া পড়েছিল। কীর্তনর
এলার রসে ভাবে তা প্রায় বিভুলা অছিল। এলার মাহাকে জীবনহানর হারৌপা
মিঙাল আহান দেখল - হাতে হাতে তেইর পিছ ধরতে হাংকৈ নাইল।

মানু এগরকা বাসকুলী গিথানক নিয়াম খালকরিরী। তার চরিতে বারো কথাই
কুনোদিন হবানেই বারা আহান নাপাছে। ধীর গম্ভীর মেইথংহান। কাম করের
নীরব অয়া। মানুর নিন্দা প্রশংসাং তার লক্ষ্য নেই। কিহান মনেয়া তেইর লগে
লগে বুলের এহান তেই উপ নুরারিরী। তেইর হুদিগ হাতে হাতে দোলা দেনা
অকরল। উল্টা তেই তার খনা পিনা আনা যানার বারাদে নজর দেনা অকরল।

দিনর পিছে দিন লালয়া যারগা -হৃদিগও খানি খানি গলে যারগা...
হাতে হাতে সাদহবা জেলেইর লগে টটরা বক্-বকা থিংকরে দিল। হজকে
নাধরের নুরারাহানলো তেই উল্টা ভোগানিৎ পড়লী। মহা বিদ্ভাট আহানাৎ
খালকরিরী।

তেই জনমহান আরাকৌ আচরিত। জীবনে আকখুরুম ঘর পাতিয়া চাছিলী
জীবনহানরে ভোগ করানিরকা। তেইর আশাহান কিত্তুমান নাথুঙইল। হাবিতাৎ হু
দেখল। তেই অনা চেইরী মুক্ত পাহিয়াগ - হেয়কে চার বন্ধনময়ী অরিঙীগ করে।
এলাৎ তেইর নেশা - জনমকার নিশা। এলার মাহাকেই তেইর পাচগ ঠই।
হেয়ক কিত্তুমান তেইর পুরা বিপরীতে চলিল। সমাজর এলা নাছার ব্যাপারে
তেইরে কুনো অধিকার নাদল। রাইচিল অইল তেইর জনমহান। সংসারে মন না
বহিল। বাধহান ছিড়ানিরকা দরফর করানি অকরল। আকদিন রাতি নঙেই
নুকুলিয়া আইলি। সংসারর বন্ধন-জাল পুরাপুরি ছিড়ে বেলল। হবা অজা আগর
আশ্রয়ে মন দিল। ভগবান তেইর নারগৎ কুনো কৃপণতা নাকরেছে। শিক্ষা
লয়করানির পিছেই তেইর নাঙহান ইলেই লেয়য়া দেশে দেশে ঝংকার অইল।
যতই এলাদিরি ততই নাঙহান ফুটানি অকরল।

অনেকদিন বিদেশে থায়া দেশে আলয়া যানারকা সালইলী। বদরপুর রেল
জংশনে সেন্ধা অয়া গেলগ। হিনে আকয়া লগর গিরক উগর ঘুম আহানি
অকরল। বাসকুলী গিথানক নীরত ফাম আহান চেয়া ফামহান সালকরে দিল।
লগে লগে ঘুমে অচেতন অয়া পড়িল। তেই তার কাদাৎ বয়া থাইলী। জিংদরে
তার মেইথংহান উহান চেইরী। ইলেক্ট্রিক বাতিগর মিঙালে তার মেইথংহান
মেয়েক সেঙয়া উঠেছে। আহিগি জিপেয়া নিরুপায় সরল শৌগর ডেকি ঘুমর
রাজ্যৎ বিভুলা। তার মেইথংহান চেয়া তেই খালকরিরী। মন প্রান প্রায় তারাৎ
সপিয়া হদাছে। হুদা কাৎকরানিহান বাকি। নানান তথ্যর লগে তেই আসুলা-
পিসুলিত থাইলী। জীবনর পথগ কুংগ? কিহান জনমর উদ্দেশ্যহান? কুরাৎ
থাগেলগা উমরকার শান্তি? হুদা খালকরিরী... খালকরিরী... ঘর পাতলে বারো
জঙ্ঘালে পড়তৌ...

চিন্তার আর বিরাম নেই। খাংতা তেইর চিন্তার হুংগ আলথক দিল। তেইর
আহির মুঙে ভাহিয়া উঠিল, ভাবুক বৈষ্ণব সাধু-সন্তর করুণাই বুজেছে মেইথং

উতা। তেইৰ এলাই মুখ অয়া তেইৰে কত আশীৰ্বাদ করলা - কত আদর করলা। মানুর জীবনৰ দুৰ্গ্গভ বস্তু সন্মান বারো আশীৰ্বাদ তেই রাশি রাশি পা যিৰীগা। তেই কতি ভাগ্যবতীগ। এক ঈশ্বরের কৃপা থায়া তেই পেইরীতা। কিন্তুমান, হাবিতার মূলে আছে তাই তেইৰ ভগবানে দেছে নার উগ । উ নার উগর গুনেই তেই দুৰ্গ্গভ সন্মানর অধিকারিণীগ। আহা, কীর্তনে কতি ভাব, কতি রস, কতি হারৌ । তেই আহির পানি আর ভর ধরে নুরারল। তেইৰ সার্থক জনম এহানরে তেই আজি প্রত্যক্ষ উপ পড়লী...না না - আর সংসার জ্বলাই পড়ানির দরকার নেয়ছে।

ত্রিপুরাং যানার উদ্দেশ্যলো সালছেগ। কিন্তুমান আর দেশে যিতেগা মনহান নাকরল। লগর হাবিরে আসাম লাইনর গাড়িহানাং টিকেট করিয়া কাকরে দিল। হাতে হাতে গুমজেছে উগর কাদাতং আয়া কূপ করে মেইথং উহান চেইল। দশ টাকার নোট দুহান জেপগং থদিল। লগে চিঠিশৌ আহান। তারে বেলাদিয়া তেই গাড়িহানাং কাইলী। নিয়াম সময় নাগেলগা বাশীগ হাকমাটি কাপেয়া উঠিল। গাড়িহান প্লেটফর্ম এরাদিয়া লামডিং মুখা সালইল।

আধা ঘন্টা পিছে ঘুমেংত হজাক অয়া বিড়ি আগ নিকালানিরকা তা জেপগং আতহান বরেইল। বিড়িগর লগে দশ টাকার নোট আহান! আপাং অয়া বারো জেপগং আতহান বরেইতে আরাক নোট আহান, লগে আরাক চেটুমা আহান! পাকরিয়া চার...

...মরেলো আর হিন নাপেইছ। মোর সন্ধানে কানা নাইতই। আককুড়িহান রূপা জেপগং থদিলু উতালো ঘরে যিসগা। ইতি -বাসকুলী।

চিঠিহান পাকরানির লগে লগে আহিং জিনজিনি বারো থতাং সেলাই পড়িল। মুরগ উং উং বুলানি অকরলো। কিন্তুমান লাভতে নেই। লাভর মাঝে একমাত্র আককুড়িহান রূপা - মাত্র দ্বিবছরর তার জারতির ধন।

খামতলর হজকারি

সাজৌ অজা চেয়ার হানাং গারিগ এরাদিয়া ছাত্র পচারে বারেয়া মাংল,

‘পচা মাংতা, গরার জাং কইহান?’

গারিগ কেজা কেজা পচা উবা অইল। লগে লগে উত্তরহান সেংকরে নিবেদন করল, ‘অজা, জাং আটহান।’

‘তেস্ , তেস্।’

সাজৌ অজার কথাই পচা হারৌ অয়া বহিল। খইতুগৎত নিংশাহান নিকাষেয়া পিংগলা নাড়ীয়েদে বেলল। খাংতা পার্লহারবারে যেসাদে জাপানর যুদ্ধ চলেছিল, উসাদে পচার গজে অজা একরাশা বোমা বেলানি অকরল। আহিগি পাকদিয়া থতাহান ভংগি করিয়া সাজৌ অজাই মাংল,

‘গেইঙিতকর পুতক। অলম্বুস তো অলম্বুস, ডুফা তো ডুফা, হুলু ডুফা। আট ঠেং পালপা গরাতে কুরাং দেহেছিলেতা?’

আহির পট মারিল সময় নেয়ইল। পচার পিঠিৎ ডিনামাইট ফাটিল বৌহান কানহানিতং বারি দিল। মহরম উৎসবর লাঠি খেলোরাড়গর দেকি পচা আত জাং বারো দেহগরে ভংগি করিয়া মাংল,

‘অজা মিতে বন্ডার বারো গরার জাঙ আকসাটে বুলিয়া-’

কথা লয় নাইল। খপ্ করে লুপ করিয়া অজাই মাংল,

‘হেমাবুতা, অলম্বুস। কালুরা অছৎ থাং?’

পচা পিঠিহানাত আতা আতা বহিল। কথার আর জুরাব নাদল। কিয়া বুললে আরাকৌ কথার আড়া আড়ি মানে নিয়াম দহিনা পানার বুজ করানি। রেজিস্টারিহানাং নাংহান অছিলতাই মদন। কিন্তু প্রচলিত নাংহান অছিলতাই পচা। সুলভ সংস্করণ পচা নাং এহান স্কুলে ভর্তি অনার পিছেই রাজসংস্করণ অইল। পচা নাংহান মদনে রূপান্তরিত অইল। কিন্তু মদন নাং এহান বাজারেদে না বিকিল। স্বয়ং ভগবান শ্রীকৃষ্ণ একশ আটহান নাঙর মালিক অইলেতে কিতা

অইব। মালক যশোদারাংতে হৌ নন্দদুলাল। নাং আহানর মালিকগ মদন।
ঔহানে পচা নাং এহান ছাড়া কতিরৌ বা নিয়াম আশা করত?

পচার গারিগর বাট চানার মত। মুলঠুমা পেটার্ন। ঔহানে ছাত্র মহলে 'গদা'
বুলিয়া আংশিক পরিচয় অছিল। তার চরিত্র, কামে কথাই বারো ভাবে হাবিরাংত
আলাদা বিশেষত্ব আকচুটি আছিল। স্কুল তামকরানি তার উপলক্ষ্য। জীবনর
লক্ষ্য ড্রাইভারি। হাবি সমইৎ ড্রাইভারর একটিং। গাড়ি চালানির কথা।
আকদিন সাজৌ অজাই কতোগ ফুলর নাং বারো হৌপাতর নাং ছাত্ররে আকরল।
পইলাংত পুরি হাবিয়ে উত্তর দিয়া অজারে হারৌ করলা। খামতলে পচার পালা
পড়িল।

'কইতে পচা মাংবেনাই।' সাজৌ অজার হুকুম জারী অইল। পচা উবা অয়া
পইলাই স্কুলগর মুঙে আছিল ফুল উতা চেইল। এর পিছে জুরাব দিল,

'মুরতার ফুল, বান্দরর লাঠির ফুল, গকুলর ফুল, চিকংলেই।'

'তেস তেস। এবাকাতে হৌপাতর নাং মাং।'

কথাং ফুট দিলহান দেহিয়া পচা আরাকৌ হারৌ অয়া মাংল।

'কন্তল, মিয়াং টটুরা, তক্‌পা নিংকং, ঠাকেইচলা, নানিয়া -'

'ফারে ফারে । হৌর নাং মাং-'

'বেরেডি, খাটলর আঠি, মুকখি, লতা, হেইকিরি, হা -'

কথাহান হুনানির লগে ছাত্র হাবির বুক স্যাং স্যাং দুক্ দুক্ করানি অকরল।
পচা কিন্তু 'হেলায় লংকা করিলাম জয়' বুলিয়া বেণ্টিহানাং বহিল। হাবি থম থম
ভাব। নিংকরলা উহানার ব্যতিক্রম নাইল। অজার মেইথংহান গম্ভীর অয়া
আছিল। হাতে হাতে কেশব ধৃত নরহরিরূপ বেশ ধরানি অকরল। ঔ রূপ উহান
দেহানির লগে লগে পচার আহিগি মাম্ মাম্ করানি অকরল। অজা নারগ
উদারার পর্দাহানাং থয়া মাংল,

'তোরে কিতালো বার্তন করতু? ডিগালা, গুলডুপা না চেপ্টা!'

সাজৌ অজার খৌরালগৎ তিন জাতর অস্ত্র আছিল। গুলডুপাছাপা বুকুর,-
বোমার শ্রেণীভুক্ত। ডিগালা ছাপা তিংখুল ফ্লেপনাস্ত্র শ্রেণীভুক্ত। চেপ্টা চাপর
রকেট শ্রেণীভুক্ত বুলে পারিয়ার। উতা এরেদেনার আগেই ছাত্রর লগে অজা কথা
পাকাপাকি করতই। এর পিছে আক্রমণর পালা। পচা মুরগ নঙেয়া থাইল।
উদুর লুম্পাগর ডেকি রাং রাং আকেই খুরুম চার। পিঠিৎ জলদ তেতালা

বাজতই এহান পচা হারপেয়া লয়করল। ঔহানে পানির কাটাগ অয়া থাইল। সাজৌ অজা চেয়ারহান এরাডিল। ফেইচমহানর গুনজাগ ঠিক করানি অকরল। অবশ্য অজাই ঘন ঘন গুনজা ঠিক করানির পিঠিৎ ডাঙর ইতিহাস আহান আছে। অজা দশ আতি ফেইচম হানরে এমনভাবে পিদের যে পাচ আত গাদ্দা অইলেও পাচ আত নুরা থানা। ঔহানে পিদানির অনেক কেলামতি আছে। পনরদিন পাচ আতলো চালেয়া থর। বাকি পনর দিন মকতক মধ্যে থছিল পাচ আতলো চালার। মাহানাৎ আকফির ধইলেই কারবার ফতে। দোকানেৎত পুরি ফেইচম লনার প্রয়োজন না পড়ের। আশ্বিন মাহার দূর্গা পূজা লয়ইলে বামনগর ঘরে গিয়া কম দামে কাৎকরা ফুতি লয়া আনেরগা। যেতাও অক। গুনজাগ ঠিকঠাক করিয়া সাজৌ অজাই পচারে মাংল, 'হে হুলুডুফা তোর মুরগর গবরর পেলিগ কুংবাকা নেয়ইতইতা !' এর পিছে একটিং করানি অকরলো-

'অথচ সকল হতে ডাগর ডোগর

পড়াতে সকলের পাছে পাছে।

এতবলি গালি দিলে গুরুমহাশয়

শরমেতে মাথা পেতে হেট করে রয়।'

কিৎতা আহান নাকরল পচারে। হাতে হাতে চেয়ারহানাৎ বহিলগা। অমাটিক মারাত্মক ঘটনা এহানরে সাজৌ অজা কিৎতা আহান না করল এহানর পিছে আরাক যারি আহান আছে। স্কুলে আহানির পিছে অজা উবাকা পেয়া ধূমা না আসুলেছে। এ ব্যাপারে পচার সাহায্য বিনা উপায় নেই। গাবধরা উপারারিগ খৌনিগৎ মৈনিংগৎ ফিট করানি। উগর গজে হজক হাজেয়া টিকিগ লাগেয়া উপারারিগ পূর্ণ করিয়া দেনা পুরা পচার গজে। একমাত্র পইলাকার ধূমা নিকালানিৎ অংশহান গ্রহণ নাকরের। অবশ্য সুযোগ পেইলে খানি আহান উহানতৌ পাংকররেদের। খুশ মেজাজে সাজৌ অজাই ডাকল,

'পচা...'

'অজা কিয়া?'

'কইতে এবাকা পেয়া নাপিয়া থাইতু?'

হারৌহানে পচা হারৌপা পৌহান আহান দিল,

'অজারকা খামিরা আনেদেছু।'

খামিরা শব্দ এগ কানে বারি দেনার লগে লগে অজা মহাশয় চিৎ। পচারে মাতানি অকরল,

‘হে অলম্বুষ, তোরে দাবাউরি এহান তরে আলিপেয়া নাগই। মাস্টরে কি ছাত্তরে আলিপেইতারাত? হুদা তুমি মানু অই বুলিয়া। পাঠশালাৎ হবা অইলে গজেদে হবা অইতারাই। পিছে মোরে আপ্পানেও নিংশিং অইতারাই।’

‘না অজা কিতাও নেই।’ পচা জুরাব দিল। খামিরার হজকারি পচা অজার আতে নিবেদন করে দিল। খানি পিছেই অজা বং বং ধুমা নিকালানি অকরল। পচা খানি থায়া মাংল,

‘অজা মোরতা তাপ তাপ কররে। মি ঘরে যিংগা।’

হুনানি ফাৎনেই অজা উঠিয়া পচার মেইথংহানাৎ আততহান দিল। তাপহান উঠেছেহান হারপেয়া মাংল,

‘হেমাবুতা, আগেদেতে কিয়া নামাংলে। যাগা যাগা জবর অইলে কালি স্কুলে নাহিস।’

পচা লেরিক হাবি শিলটহানর গজে হাজেয়া, পেন্সিল বারো ফরি কলম বাটগর ভিতরে বরেয়া মাকুমহানলো বন্ধ করলদ। মুকখুর জতাহানর ভিতরে মুকখুগ থইল। হাতে হাতে উবা অয়া অজারে নমস্কার দিয়া দুরারহানর বাহিরে গেলগা।

অজাই পচারে ডাকদিয়া মাংল,

‘সাবধান অয়া চলিছ।’

‘জবর অইলে খবর দিছ। মি তালাবি করিমতা।’

‘হাই অজা।’

হাতে হাতে পচা হাবির মিল্লেঙেৎত নেয়গেলগা।

তিন দিন পার অয়া গেলগা। স্কুলেৎত গেলগা পিছে পচা আর ফিরিয়া নাহিল। আকুবালা স্কুল ত্যাগ করল। ছাত্ত হাবিয়ে পাচ মিনিট কাল উবা অয়া পচার মৃত আত্মা ভগবানর খয়াৎ মুক্তি পাকগা বুলিয়া প্রার্থনা জানেইলা। তার শূন্য ফাম উহানাদে চেয়া আহির পানিল মারুপ হাবিয়ে সমবেদনা জানেয়া বিদায় দিলা। সাজৌ অজা টেবিলহানাতর গজে মুরগ থয়া নারগ নিকালা নিকালা কাদিয়া আছে। বাপক স্কুলগর ভিতরে রৌমেলে মেলে কাদে কাদে গড়াগড়ি দেৱ। এর পিছে ছাত্ত হাবি পচার মৃত দেহগর পিছে পিছে শ্মশানে গেলাগা।

ফাগু, ৯ম সংখ্যা, ১৯৬১ ইং

পরিশোধ

To me every hour of the light and dark is a miracle (হুইটম্যান)
খাংতা কঙালা রৌ আহান কানহানাং বারি দিল -

‘দাদা, পইসা সিকিগ।’

মেইথংহান বুলেইতেই গৌরহারির মুক্খিহানে ঙালকরেছে লাজপা লাজপী
মেইথংহান আহিগির মুঙে পড়িল। কথাহান উপ নুরারিয়া আংকরলু, ‘কিতার
পইসা সিকিগ?’

‘ঔরে লেরিক হান জিন করে দেছিলাং ঔতার পইসা। ইস্ যে লাজর কথা -
অতদিন হাবি দাদারে দেনার কুনো সেপ নাপাছু।’

কথাহান লয়করিয়া গৌরহরি বুমালাহানর গাঠিগ ফুকানি অকরল। মি কিন্তু
পাওয়া থাইলু। কথাহান কানহানর ভিতরে হমেইলগা সত্য কিন্তু লেজগও
মুরগও ধরে নুরারলু। অনেক ক্ষণ নিংশিঙর রাজ্যে উমকরানি অকরলু। খানি
মিঙাল আহান পেইলু। হাতে হাতে পুরাপুরি বৌ পড়িয়া মাংলু,

‘ঔহানর পইসা, তোরে দিস বুলিয়া মাতেছিলুথাং?’

গৌরহরি কিন্তু নাছোড়বান্দা। এক রকম জোর করিয়া পইসা সিকিগ
পাল্টুনহানর জেপগর ভিতরে থদিল। মি কিন্তু প্রায় আপনভোলা। তার
মেইথংহানাদে চেয়া আছু সিচ্ছিল। পইসা সিকিগ জেপগং থদিতে কুনো বাধা
বিপত্তি নাকরলু।

‘এইগা নাগই কাম আহানতে আজি করলে,’ মি মাংলু।

‘ইস্, দাদাই মোরকা যতহানি করেদেছিলে—’

কৃতজ্ঞতাই গৌরহরি মুরগ নঙেইল। খানি থায়া মধুর ভংগিলো গৌরহরিযে
জানেইল মোরে বিদায় সম্ভাষণ। হাতে হাতে আহিগর মুঙে বাজারহানর ভিতরে
হাজার হাজার মানুর হাদিৎ মিশিয়া গেলগা। থক্করে মন এহান যেন অস্থির
করিয়া থইল। উদাস মনে বাজারহানর ভিতরে আটানি অকরলু। কিন্তু কিংতা

আহানও ধরে নুরারলু।

প্রায় বছর আহান আগর কথা। ব্যাকরণ বার আর আর বামনর বিধি বিধান তামকরানিৎ গাঙর এইগা গাছির ঘরে গৌরহরি আশ্রয় নিলগা। রংহান পুলেই কচু। দেহগর বাটহান নিয়াম বাট্টি নেই, বার ডিগলও নাগই। মধ্যম। বেশ পরিপুষ্ট গারিগ। কিন্তু দেহ উগরে আরাকও ঙালকরিয়া থছিল তার মন চরকরা মুকসি উহান। মেইথংহানর প্রকৃত নুংশিহান অছিলতাই ঔ মুকসি উহান। গাছজারর কঙালা কঙালা নম্রমুখী পল্লবর হাদিৎ শত শত ফুল হারৌহানে শাতয়া গাছজারর শোভাহান যেসাদে অপবুপ করিয়া তুলতারা, উসাদে গৌরহরির মুকসি ঔহান তার মেইথংহানরে বানানুংশির আনন্দময় মিঙালে ঙালকরিয়া থছিল। আচরিত তার প্রকৃতি। হাবি সময়ৎ মুকসি মুকসি থতাহানর ভংগি। সৌঅনি শব্দ এগ তার জীবনর অভিধানে নেই। তাই, এসাদে প্রকৃতির মানু গিরিগিথানীর বানানুংশির পাত্তগ অইতে কতি সময়ও বা লাগের? গংহান নুংশি হুনর বরণী লেহাউ ফুলগ হবা গিদেইগাছির জুরাগর হাদিৎ ফাম পেইতে কতিহানও বা সময় লাগের?

আকদিন গাঙর এইগার লগে যারি সিংকুল দেনার খৌরাঙে সেন্দ্যার পিছে তানুরাং আইলু। কিন্তু এইগা নেয়নির কারণে খানি বয়া বাছানিৎ লেপইলু। খানি পিছে গৌরহরি পুরানা লেরিক আহানলো নিকুলিয়া আহিল। লেরিকহান মোর আতহানাৎ দিয়া কাদাৎ উবা অয়া মুরগ খাজুরা খাজুরা তা মাৎল, 'দাদা, লেরিক এহানর অবস্থাহান নেয়ছে, এহান কিসাদে করানি?'

লেরিকহান আতহানাৎ লয়া পাতা উল্টানি অকরলু। মুখবোধ ব্যাকরণহান। লেরিকহানর অবস্থাহান কাহিল অয়া হদাছে। সুনুর দাগ, টিকির কালি বার গানুরার বারানিয়ে তেনা-বেচেরা করিয়া পেরেলেই থুংকরিয়া থছে। মি তারে জিন করানিরকা যুক্তি দিয়া দিলু। কিন্তু গৌরহরিয়ে জিন করানির ভারহান মোর গজে বেলা দিল। কথাহান যাকরিয়া ঘরেদে জাংহানি তুললু।

কতদিন পিছে বিদেশে যানার দরকার আহান আয়া হাজির অইল। মি পেরেলেই থুংপা লেরিক উহান লগে করলু। শিলচরর বুক বাইন্ডিং দুকান আহানাৎ দিয়া গেলুগা। চারিদিন পিছে আলয়া আহিতে রূপা আহান মাহেই পুষ্পমূল্য

দুকানদারিগর আতে সমজা দিয়া লেরিকহান নিকালেয়া আনলু। লেরিকহানর বাকলহানর সাজেলহান অতি ইলেই লেইকরে আহিগি চরকরল। কিন্তু ভিতরগ চেইতে আহিৎ জিনজিনি। চুলে কলপ, আহিৎ চশমা লাগেয়া বুড়াকালে পুরিজেলেই বিয়া করানিৎ যিতারাগা দামান উতার দৃশ্যহান সেৎক আহিগৎ বারি দিল।

যেতাও ওকে, পিছর দিনে গৌরহরির আতে লেরিকহান সমজা দিলু। শিকারীগর লংবেইর মুঙে অরিংগ পড়লে যেসাদে বিভুলা অয়া চেয়া থার; গৌরহরির অবস্থাও তদ্রূপ। যেই লেরিকহান আতহানাৎ পড়িল উপেইৎ বিভুলা। পাতার পিছে পাতা উল্টার, সি সি ঘন ঘন আপন মনে আহের। অনেকক্ষণ তার মেইথংহানাদে চেয়া থাইলু। খানি পিছে তারতা হুসহান আহিল। অতি হারৌ অয়া মোরে মাৎল, 'দাদা যে হবা আছে!'

এর পিছে অকরলতাই পইসার কথা। মি যতই 'দাম নালইতৌ' বুলুরি, ততই গৌরহরি দুলিপকগর দেকি ধরিয়া থাইল। বাধ্য অয়া পইসা লইলু - পাচ সিকি। বাকি থাইল মাত্র সিকি আগ, মানে চারি আনা। 'পিছেদে দিতৌ' বুলিয়া সংকল্প করল। অন্যবারাদে মিও না লইতৌ বুলিয়া হারপুরেয়া দিলু। গৌরহরিরাহি কিন্তু পরাজয় স্বীকার নাকরলু। তা ঋণ সিকি আগ অইলেও তা পরিশোধ করতই মাহা আনান পিছে।

পিছেকার দিন সাকলসেল। কালা কালা মেঘর খঙ মাহেই হিষ্টাপার দেকি হাকহান ছেয়া থাইলা। ভীম গর্জনে বিকট হুংকারে হাকহান তক্দকার করানি অকরল। দৌ জিলকা জিলকা অকরলা তাডব নৃত্য। চের্ চের্ রৌহানে মেঘপুঞ্জরে যেন চিলা চিলা করিয়া বেলানি অকরল। ডরহানে হাকহান কাদানি অকরল। লগে লগে তেইর আহির পানিলো পৃথিবীহান তিঙা দিল। খানি সময় থামিয়া থাইলীকোপুরি রৌহান অইবতাই ডরহানে বার কাদিরী। অনেক সময় নিয়াম বার অনেক সময় কম। হাতে হাতে করিয়া প্রায় দেড়টা বাজিল। বরনহান কিন্তু থামানি নেই। কাদতে কাদতে নাঠেমইলে হেয়কগই মইলকগর বেদে যেসাদে খামতলর হুংকারগ এরেদের। উসাদে বিকট হুংকারে হাকহান ফাটেয়া বেলল উবাকা বরনহান থামিল।

মাদানকার ঘুমহানে মি অবশ অয়া পড়িয়া আছ। গুরুদেব দয়াকরো দীনজনে
 বুলিয়া গুরুদেবর পাদপদ্মহান নিংকরিয়া ফামহানরে আশ্রয় করিয়া আছ। খাংতা
 মানুহান মাহেইর শব্দে ঘুমহান বাগিল। ঘুমহানাংত হজাক অয়া দুরাহানাংদে
 চেইতেই দাবদা দাবদি করতারা মানু মাহেই দেখলু। বরাবর পিঠিবারার
 সড়কগর বেদে দাবদিতে আছি। মিও তানুর পিছে পিছে যানা অকরলু।
 পুলহানর কাদাং মানু মাহেই দেখলু। আটানি ত্বরা করলু। কাদাং ফৌঅনির
 খানি আগেই মরা বন্ডা আগ দেখলু - পড়িয়া আছে সড়কগর বারাদে। এর
 পিছেদে ভীড়হান দেহিয়া ভিতরে হমা পড়লুগা। অবায়! হপনহান না
 টেইপাংহান! মোর আহিগিরে বিশ্বাস করানি নুরারলু। কল্পনাং নেই দৃশ্যহান।
 যেগর মেইথংহান আহিগির মুঙে পড়িল উহান চিন পেইতে হিন নাপেইলু।
 গৌরহরির বজ্রাহত দেহগ। এইগার উঠানহানর গজে মুরগ থয়া নিশ্চিত্ত অয়া
 ঘুমজিয়া আছে। তারে বেরিয়া কাদে কাদে আছি গাঙর যত মানু। মরণহানে
 যদিও তার হাবিতা হরণ করিয়া নেছেগা কিন্তু চিরদিন থার ভুবন মোহন মুকসি
 উহান হরণ করানি নুরারেছে। হুংতুমেও হবা এহানর কুনো ক্ষয় নেই। উহানে
 সেক্সপিয়র গিরকে মাতেছিল -

Death that hath sucked the honey of thy breath

Hath had no power yet upon thy beauty. (Romeo and Juliet)

পৃথিবীর বুকগংত পুরি যদিও গৌরহরি চিরদিনরকা মাঙয়া গেলগা, কিন্তু
 এবাকাও নিংশিঙর ছবিহানর ভিতরে তার মুক্সিপা মেইথং উহানি উকিবুকি
 দিতে দেহুরি। আর কুংগওবা এ পৃথিবীং অমরগ অয়া থাইতই? হাবিরতাও
 আকদিন যানির পালা পড়তই! কুংগ হয়ত আগে কুংগ পিছে। কিন্তু দেহগ
 বিনাশ অইলেও তার কীর্তি জিংতা অয়া থার।

দুইশত হাজার আলোকবর্ষ এ পৃথিবীর বয়স। তেইর হাজার হাজার বছর
 ভিতরে কত যে ঘটনা ঘটয়া গেলগা উতার হিসাব কিসাদেগই কতিহানও বা
 লকরের। তেইর আকেইহান বছরে, আকেইহান মাহাং, পদে, দিনে, ক্ষণে মানুর
 গোচরে অগোচরে আকেইহান ঘটনারে আকেইগ ফুলর দেকি গিথে গিথে
 বানেইরী ইতিহাসর ফুলডাল। আকেইহান মুহূর্তর ভিতরে লুকেয়া আছে বিচিত্র
 ইতিহাস। উহানে বিচিত্র রূপিনী পৃথিবী। আজিকার বিচিত্র ছলনাময়ী দিন এহানর
 বিচিত্র ঘটনা এহানরে কইকরিয়া বারে বারে মি খালকরুরি। যে মানুগ কুনোদিন

মানুহাং লাল নাছে, যে মানুগ মাত্র চারি আনা পইসা পেয়া পরিশোধ করতে নাপাহুরের, তার গজে আজি কিয়া ভগবানে অপমৃত্যুর বজ্রগ বেললতা? গৌরহরি কি পাপীগ?

তার উত্তর আজি পেয়া মি বিসারেয়া নাপেইলু। ভবিষ্যতেও পেইল আশা নেই।

রাতিহান লামিয়া আহিল পৃথিবীর বুকগৎ। জমহানর আশ্রয় বিসারেয়া আহের সেন্দ্বাকার পাহিয়াগর দেকি ঘরেদে আলইলু। মনহান অশান্ত। ভিতরগ তোড়পাড় করে নেরগা। কুনোমতেই নাকমের। খাংতা মোর নীলুরা পাল্টুনহান আহিৎ পড়িল। তুরা অয়া কাদাৎ চেপইলুগা। অপরাধীগর দেকি জেপগর কোণ আগদে লুকেয়া আছে পইসা সিকি উগ নিকালেয়া আনলু। লেমগর মিঙালহানাৎ দৃষ্টি আহানাৎ বুলা বুলা চেয়া থাইলু তার সিকি উগ। তুচ্ছ সিকিগ। বিশেষ মূল্য নেই রূপার রাজত্বৎ। কিন্তু জীবনে আকে দিয়া গেলগা না পাহুরানির মত তীব্র ছবি আহান। যত চাউরি ততই যেন সিকিগর রূপহান বাড়ের। চেইতে চেইতে আহিগি ঝাঙ্গা করে আনল। হাতে হাতে আহির পাতাহানিয়ে আহিগির গজে কালা পর্দাহান নির্মম ভাবে আসুলিয়া থদিল। আর দেহানি নুরারলু।

ফাগু, ৬ষ্ঠ সংখ্যা, ১৯৬১ ইং

অপরূপা, ৩য় সংখ্যা





ইন্দ্রকুমার সিংহ বিষ্ণুপ্রিয়া মণিপুরী কথাসাহিত্যৰ ইন্দ্রগ।
ইন্দ্রকুমার সিংহৰ জন্ম বারমুনি বা নরসিংহপুৰ লয়াং
আকুপীসেনা দেবী গিথানকর উরে, নিংথেম সিংহ গিরকর
ঔরসে — ১৯৩২ ইংরেজিৎ। আমাৰ কথাসাহিত্যৰে
পৌরাণিক বার লৌকিক য়াৱিৰ ঙাল বৃত্তগৎত গিরকেই
আতহানাং ধৰিয়া আধুনিক গল্প উপন্যাসৰ আৰাক ইঙাল
ঙাল বৃত্ত আগৎ আনেদিলগ। ইন্দ্রকুমার সিংহ বিষ্ণুপ্রিয়া
মণিপুরী সাহিত্যৰ পইলাকাৰ সাৰ্থক বার এবাকাও
হাবিৎত জনপ্রিয় গল্পকাৰগ। আজি ইন্দ্রকুমার সিংহ
গিরকর ইকরা গল্প বার নাটকর ভাণ্ডাৰ এগরে মইবংগর
সাদানে কানহানাং দিলে ছনিয়াৰ হৌদিন দিনে
হাতুৰেছিল বিশ্ব-সাহিত্যৰ সুমুদ্রর রৌ, অটগিৎ ধৰিয়া
ফুদিলে নিকুলেৰ বিষ্ণুপ্রিয়া মণিপুরী জনজীবনৰ আহানি,
কাদানি বার বানাপানিৰ মৌলিক শংখধ্বনি; লপহানাং
লয়া কুপকরে চেইলে দেহিয়াৰ বৌদ্ধিক বার শৈল্পিক
কাৰুকাৰ্য। হৌদিন দিনে আলোড়ণ সৃষ্টি কৰেছিল গিরকর
ইকরা অমর ‘ছনার অরিঙী’ বার এবাকা ইকরা ‘সতী’
নাঙর গল্পহানিৎ আমি পেয়াৰ নিপুণ কথাশিল্পী আগর
ঘটনা-বিন্যাস, চৰিত্র-গঠণ, ডিটেলিং, পরিণতিৰ বেদে
হজাক কাকেই — হাবিৰ গজে বলিষ্ঠ নারী চৰিত্রৰ
অপূৰ্ব সৃষ্টি।



amarmanu
foundation

Internet of People

ISBN : 978-93-84388-09-6



₹ 100/=